

近代中國史料叢刊第二十四輯
沈雲龍 主編

志 盒 遺 稿

王式通著

文海出版社印行

志

盦

父

稿

陳三立



王公志奩先生傳

瑞安孫宣敬撰

公王氏諱式通原諱儀通清宣統初辟御名改焉字志
盒號書衡又號郵廬先世浙江山陰人後著籍山西汾
陽其系家先德宣嘗爲公考蘊齋府君妣施太夫人傳
矣施太夫人生二子公其次也自少好學博覽經史百
家兵刑農田水利以逮浮圖老子之說多所貫綜尤練
國典以文辭名當世光緒辛卯舉順天鄉試候補內閣
中書戊戌成進士用主事簽分刑部主橐雲南司參稽
律例隨事指擿所平決靡不厭服壬寅管學大臣張公
百熙奏充編書局纂脩提調京師大學堂兼辦學務處
舉經濟特科不就癸卯補刑部山東司主事充脩訂法


律館纂脩當是時變法議興詔開館損益律令以沈公
家本伍公廷芳領館事二公皆雅政必引公自助公亦
以律令煩多事類溷錯於時非便迺參中外之制度禮
俗宜否更定新律其章奏條教悉出公手丙午擢刑部
安徽司員外郎提調法律學堂學部初立大臣奏薦公
考察日本學務脩訂法律館奏請調查法典公周諮博
訪爲札記數十萬言還條上之於是大理院郵傳部交
章論薦或以私問曰吾嘗治律學大理固其職耳丁未
就補大理院推事用御史記名總辦法律館充禮部禮
學館顧問官戊申擢推丞充學部諮議官宣統辛亥署
總檢察廳丞擢大理院少卿公在大理久因益推明律

意務從寬恕而勢利之求無所關與門庭家整意泊如也民國建立強起公爲司法次長權部務甲寅國務院改政事堂任機要局長丙辰復置國務院遷秘書長尋調水利局副總裁公爲人簡靜少者欲居官慎密克勤厥職凡所撰擬家無留槩接賓客僚屬謙沖自抑常氏首拱手行步言氣款款而志量湛深識慮恂達事利害人賢不肖默察潛計不肯輕用其言及衆論事間見一二言輒出衆意表故人之知公者望顏色上下爲可否其不知者或夸談逸口忘失終始公固笑而不應也故公所居雖巖然出同列上而人與之處未嘗悔望有彼此言者逮其去而後常愛思也公性至孝事親左右和

愉比喪二親年五十餘矣而哀慕過禮庚申秋遂謝病去官寓居京師結社餽酬爲娛知友往還皆一時名素清談極日每不罷散尤喜延納後進因材質爲訓誘片長一善稱譽之不容口晚歲勤於著述嘗預脩國史清史四庫書日又從徐公世昌撰輯清儒學案清詩匯等其已槩行者世多有自著志盦詩文彙寫藏於家公以辛未八月二十二日卒享年六十有八配汪夫人子二蔭泰蔭霖蔭泰游學日本德意志精法家言厯官外交總長司法總長

贊曰始宣弱冠游京師從公問學啍啍講論於凡脩身理人治亂得失興壞之致尤詳蓋公平生雅不欲以文

自名而所表見大氏皆文事世遂徒知推重其文而其志之所存固有不得盡施也然公之有不得盡施而有以遺於嗣人者抑亦盛矣公之卒也宣卽事喪所公子等泣述願言命宣編校遺藁並次爲傳迺謹敘歷官行實而於論議之詳不復盡載焉然觀所已載者亦足以知公矣宣不肖受教門下十有餘年學不少進願迺辱公垂絕之言斯尤所爲執筆泫然流涕也烏虜悽矣



志盒文稿目次

王式通 書衡

卷一

序

漢律考序

唐明律合編序

鸞簫集序

張潛齋尙書賜壽圖序

梅村家藏稿序

寒山社詩鐘選甲集序

鄭齋感逝詩序

宋刑統序

荃察余齋駢體文存序

琴話序

十六家墨說序

蟄園鉢社第五十集詩錄序

湘雨樓詩集序

鞠部叢談校補序

歲朝酬唱集序

吳郡通典備彙序

蟄園詩社集序

越縵堂讀史札記序

水竹邨人詩選序

卷二

跋 書後 題辭

變法經緯公例論跋

秋窗述舊圖跋

越縵堂文集跋

書會稽何烈婦遺札後

書天津徐健廬先生事略後

題郭鷗史女士二喬觀書圖

題高用菴司獄歸養詩冊

題蒔薰精舍圖

書

與汪袞父書

上浙撫請奏建浙江三忠祠書

卷三

家傳

舅氏施公暨配于夫人家傳

墓碑 墓表

昭武上將軍姜公碑文

崞縣徐先生墓碑

武寧李君原配王夫人墓表

墓誌銘

會稽施貞女壙誌銘

吳興沈公墓誌銘

陸軍中將徐君墓誌銘

沈母趙夫人墓誌銘

直隸提督涇陽馬忠武公墓誌銘

清故資政大夫署理廣東提學使于君墓誌銘

吏部文選司主事傅君墓誌銘

徽州府知府王公墓誌銘

清故資政大夫直隸懷安縣知縣江安傅公墓

誌銘

東海徐公繼配席夫人墓誌銘

卷四

記引

重修蘭亭記

釋迦文佛二千九百四十年紀念會引

家君七十壽引

贊

篝燈紉讀圖贊

寫經現瑞圖贊

孫子鈞侍御象贊

遠威將軍徐君象贊

銘

思讀誤書室銘

祭文

祭長沙張文達公文

祭張筱圃提學文

祭孫子鈞侍御文

祭孫仲璵文

祭吳子修先生文

祭錢幹臣同年文

祭郭匏廬先生文

祭章觥室文

祭汪伯唐先生文

志龔文稿卷一

王式通 書衡

序

漢律考序

閩中程子樹德心恫近世律學之微而漢律之久亡也
夙有搜輯叢殘之志目營手錄積以歲年成漢律考七
卷以存一代之制首律名考次刑名考而律文考律雜
考次之律沿革考春秋決獄考又次之以律家考終焉
凡所引證鉤索羣籍咸有倫貫成稿屢易今迺寫定篤
學者古殆罕倫比昔之言漢律者大率摻看遺文佚字
矜爲博奧咸未能通律義長安薛雲階先生始有漢律

輯存一書寫校既竟將付槧人庚子變起稿本淪失歸
安沈寄篋師嘗取巴陵杜貴墀之漢律輯證富平張鵬
一之漢律類纂重爲編次以律爲綱逐條分入目之可
考者取諸晉志事之可證者取諸史記及班范二書他
書之可以相質者亦採附焉都二十二卷名曰漢律摭
遺略謂商鞅之法受之李悝所變者牧司連坐之法二
男分異之法末利息貧收孥之法餘仍悝法也悝之法
撰次諸國豈遂無三代先王之法存於其中漢法亦本
於悝而參以秦法非取秦法而全襲之也今試以周官
考之先請原於八議決事本於八成受獄卽士師之受
中案比卽司徒之大比讀鞫者小司寇之讀書也乞鞫

者朝士之聽治也過失不坐三宥之法也年未滿八歲八十以上非手殺人而坐三赦之法也其他之合於周法者難僂指數先鄭後鄭注周官並舉漢法以爲比況可見漢律正多古意猶爲三代先王之法之留遺又謂歷代之律存於今者惟唐律而古今律之得其中者亦惟唐律以其尙得三代先王之遺意也唐律之承用漢律者不可枚舉有輕重略相等者有輕重不盡同者試取相較而得失之數可藉以證厥是非欲求唐律之根源舍漢律無由惜漢律久亡其散見於史傳者百不存一然使羅絡排列分條比類按律爲篇亦可考見大凡其說如此竊維漢律基於李悝法經是卽亡秦最初之

法而代有增損改易良由法經篇少文荒事寡罪漏悝
鞅僅用之於方隅秦統一六合法令如牛毛刑名罪制
必非六篇所能賅載特興亡倏忽紀載未詳漢興則版
圖遼闊炎祚縣長人事日繁迥殊往代顧於開國舊制
喜增益而憚改作故四百年間律令百出龐雜無緒儒
者侈談引經斷獄考其援用固不必適合經義而傳古
亭疑由此以窺三代先王之遺意謂爲禮經之外篇可
也程子此編致力久而取材博爲究心漢法者所不可
廢他日薛書復出沈書刊行併此而三其有功於律學
者爲何如也

唐明律合編序

長安薛雲階先生精於律學官刑部垂四十年潛心名法融會貫通嘗取唐明律之彼此參差輕重互異者逐條疏證以類相從成唐明律合編三十卷先生一生服膺唐律自言平日尋繹律義有所未瞭攷之羣書稽之故牘猶未洞徹及就唐律求之則事理炳然若網在綱若農之有畔而忠厚惻怛之意油然而溢於屬辭比事之餘常令人思焉而不窮擬議而知其不可易持論若此則其得力所在從可知已三禮喪服之學盛於唐初故唐律一本於禮而得古今之平自五季以迄宋元令條格式代有更張而永徽之傳承用不廢明太祖懲元之法度縱弛故明律多重於唐其大誥諸峻令尤出乎律

之外然其初李善長等論歷代之律以漢九章爲宗而唐集其成僉謂今制宜遵唐舊太祖從其言洪武元年又命儒臣六人同刑官講唐律日進二十篇是明律大旨亦本於唐而損益之世謂明律偏主於重非篤論也明律之苛刻顯著者先生旣於卷末分條臚列唐律之應擬徒罪以上者明律大半改爲笞杖甚至唐律十惡之應擬絞流者亦俱改爲杖罪先生謂理必衷諸至當此以見人心之所同也事苟雜以私心終不能盡歸於一致也於不應寬者而故意從寬則必於不應嚴者而恣意從嚴古今立法之本數語盡之矣近雖律學更新非復舊法而循覽是編可識律之爲用民命所繫根極

於天理民彝稱量於人情事故法有新舊之異其意有終古不變者彰往察來周知百世詎限於唐明已哉先生之治律原本經術折衷至當著述繁富學者宗之余從董君授經假得是編校刊行世蓋不勝耆舊之思典型之仰焉

鸞簫集序

嘗謂善言婚姻者莫如詩結襦秣馬穠李夭桃八鸞百兩之賡宋子齊姜之誦劉覽三百匪可覩縷良以悅豫斃旨必抽緒於詠歌婉變攄懷多埒聲於贈答陽氣萌而元駒步迨冰泮而鳴雁離辭以情發匪偶然矣矧夫蘭臺給札頌神雀於賈逵甯子思居諷育魚於齊佐郎

君早貴鸞壻爭看摘藻簡觚允稱盛事越若同年秀毓
延陵教循仇母屬文四歲扇穎士之清風草賦三都盛
太沖之令謨雕龍馳響靈蛇握珍東方陳奏於漢廷裴
楷知名於弱冠歲甲午應禮部試主文錢唐汪公奇君
才字以女弟陋盧儲之投卷儷劉昫之愛才次年乙未
入翰林遂奉太夫人命於八月上泮行士昏禮於京師
秉畫荻和丸之訓聖善聞而歡顏修立輶駢馬之儀故
里傳爲韻事時則清俸初叨沐湯新賜金蓮燭撤碧玉
簫吹睡鴨棲而蘇合氤氳涼蟾升而姮娥悵望鳴環微
步疑西清宣事之鈴染黛修眉攜東觀紬書之筆比肩
明鏡絮語晨窗燕爾之娛實罕儔偶先期擬表一通徵

詠同志玉溪豔體無翼而飛鄴下詞人同聲相應篇翰
鱗萃都爲一卷用宋景濂送張翰林奉詔歸娶詩語名
曰鸞簫集彙雕篆之軼材發綺縠之高喻劉彥和所謂
視之錦繪聽之絲簧者誠何惡與獨是論者多以清芬
麗藻抗鞮隨園時譽交夸比於伯仲而僕以爲雅懷所
寓殆有進焉隨園邁景承平耽意逸誕山林奇福何補
蒼生著作等身僅輝文苑君則痛匈奴之未滅憤單于
之不庭願覓封侯氣吞強虜宏此偉抱會結主知矢熊
渠射石之誠壯相如完璧之氣恥隨陸之無武知頗牧
在禁中波靖重瀛地還棄郡以君盛齒庶副壯言然則
頡頏前哲旣時勢之不侔杼柚予襄卽志趣之難合惟

茲嘉禮庶絜芬華至如僕者西笑曾懷南華悔讀賃庶
之隱久號吳蒙投畚之蹤差同萊氏以視君之排雲隼
路進草鸞坡旣焜耀於羽儀亦雍容於黻佩衡其豐約
大有逕庭茲之屬綴華言勉作批導譬諸身居裸壤豔
說龍章媿邁無鹽曲形西子老鶯調舌夏蟲語冰詞之
工拙可勿論已

張潛齋尙書賜壽圖序

光緒柔兆敦牂之歲中夏五月京師學界同人爲潛齋
尙書師作賜壽圖一卷附錄三卷同年李伯至編修實
主編輯之役目錄柄具舉示大凡屬綴蕪辭以當批導
聞諸古語圖植物也又曰索象於圖以故五雲煥采晉

卿闢寶繪之堂雙管生姿玉局作傳神之記對令公之
壽相恨不同時瞻洛社之耆英何殊親炙翱翔周覽六
籍同功在昔雲臺列象宣室垂圖煥乎有文昭然可觀
推至蕭門世相衣冠騰八葉之輝唐代論詩主客盡羣
賢之美東平列仙之賜淵源道家西園清夜之游流連
雅集莫不姚聲畫苑發藻藝林若夫際攬揆之良辰荷
宮廷之優禮寵承宸翰賜拜尙方其事爲朝野所豔稱
其人爲海內所相望弟子有職繪事後素用以紀恩榮
志景行於禮爲宜我心實獲進質函丈莞爾可知惟師
丹青神化模範人倫志慕昔賢心在王室幽風寫進備
省覽於廟堂無逸書成厯艱難於稼穡凌煙贊象記侍

臣壁左之名就日摹形妙學士瀛洲之選百官由舊范
希文獻自中洲一德維新張太岳託諸帝鑑鄭俠陳流
民之狀天子動容文翁留學堂之圖羣材就範茂遠百
諫之哀集識貫古今黃筮八壽之標題瑞徵毫臺時維
首夏星應長沙介眉鬢龍虎之文起艸待麒麟之閣芙
蓉苑近鳳詔晨頒櫻筍廚新兕觥宵獻玉階仙仗平添
晝日之光銀漢天章長燦雲霞之色南齋聯詠鏘鳴盛
之和聲太液同舟抱濟時之宏願國尊司馬卜他年入
相之勳士愛元龍多此日捧觴之侶海客歷九萬里知
禮王商門下進三百杯咸親高密有斐君子穆如清風
羅葉語之駢蕃祝花甲之肇始茂矣美矣茂以加矣某

翫歲悒時昧道懵學伯鸞滅竈頗恥因人元暉折簡偏
承餘論桐焦爨下竊有感於賞音桃熟筵前喜躬逢夫
嘉會辭事兼勝悅懌何窮繪香山九老之容遜茲榮遇
序會昌一品之集願待異時

梅村家藏稿序

梅村家藏稿吾友授經得諸都門廠肆糶菜旣竟識其
鈔刻源流增併卷數復以式通髻齷之歲便誦吳都文
獻之徵恆殷江左屬爲偶語概厥平生先生以曠世逸
才遭明末造著西銘之籍夙冠清流彈烏程之黨聿彰
風節留都移宦養望人師太學上書訟寃朝士時則四
凶柄國疊壞家居羣寇滔天延及京邑薄日墮景莫挽

虞淵之沈幽蘭坐燎遂入鼎湖之夢宗社旣覆圖籙有
歸而稽小腆之紀年非無烈士證南疆之逸史亦有頑
民龍漢浩劫之經朱嚼焉食螢火秋光之記碧血猶凝
卽至閩粵流離人懷毅魄匪獨江東餘閩身殉孱王類
奮螳臂於生前或潔蟬蛻於物外靡不食甘薇蕨心苦
卷施炳正氣而特書表骨香而暑集芝焚蕙歎羽換宮
移大患有身爲親而屈母氏歛歔之語兒死誰依故人
慷慨之吟詞悽絕命悔一錢之不值入九地而餘悲余
情信芳人間何世蓋自呵壁問天以後見諸文字鬱爲
聲音者索偶搜逖無此奇痛而香草之拾始老宿以逮
童蒙藻采所敷起宮闈以訖異域亦自有著作者無此

風行焉嗟乎生也有涯情難遣此過殷墟而欲泣恐近
婦人涉洞庭而無言獨思公子義熙已易遐想羲皇淮
南旣仙猶存賓客望水天之杳渺閒話滄桑覩册府之
飄零抱殘灰燼山中終隱書傳入洛之交期海上乞師
色動登臺之慟哭素心泉路死負侯嬴晞髮陽阿生慚
舉羽河山有異曾無風景之殊陵谷已遷試續夢華之
錄初徵博士始改元和閒坐宮人重談天寶下銅仙之
鉛淚親見駝街眺玉女之清臚寓言驍箭侑家質子坐
傷年鬢之秋窮巷空廬追憶宴游之好固宜執珪憔悴
病尙越吟援筆纏綿怨同蜀魄桑乾蓬轉擬嗣宗之詠
懷麥秀黍離賦子期之思舊河梁五字降將發之而慘

顏雍門一彈孟嘗聽之而雪涕可謂掬傷心之抱奏亡國之音不無危苦之辭惟以悲哀爲主者也若夫朱顏獨秀何殊鄴下之聲華白髮填詞亦類江關之蕭瑟論其身世則似蘭成事寫天家恍見草堂之忠愛箋成後學儼奉詩聖之馨香論其歌詠則似少陵莘莊結構應標野史之名法曲淒涼無異蔡州之望論其心迹則似遺山寶績品題雅合鷗波之論畫浮屠贈答差同天竺之求書論其文采則似松雪儼人必倫望古遙集詞客有哀時之作拾遺本良史之才中州深故國之思王孫稱遺臣之雋兼茲數者伊其戚矣雖梨洲舊說糾及無韻之文而長慶嗣音麗軼前人之製是以聲傳河滿播

於禁中豔溢鎔豪寵以宸翰以視漢帝讀子虛之賦恨
不同時宋主興奇才之歎聞諸他日情事不侔契合則
一鹿樵紀在知身後大獄之誣西齋書存儷蘇氏斜川
之集斯則弔鄧尉詩人之墓足語吟魂披婁東耆舊之
編無慚作者云爾

寒山社詩鐘選甲集序

詩鐘雅集盛於閩中片玉碎金時傳佳句湘粵踵興務
爲典博鼎鬻知味流別分涂爲韻語之駢枝亦詞人之
狡獪京師才藪廚俊畢臻遂有勝流具茲偏耆好子雲
之深湛擅少孺之敏捷清譚有侶白戰無喧難燭沈吟
奚奴覩而匿笑斷縑繫積寫官見而生厭數典偶誤雜

以莊諧校藝或偏區於好尙題名放榜類已廢之科場
把臂入林似投時之黨籍跌宕裙屐流連琴尊游讌之
娛得未曾有嗟乎良辰易邁嘉會何常太傅談元見揮
塵之高致謫仙作達思秉燭之名言俛仰之間已爲陳
迹矧復王尼有滄海之歎庾信動江關之悲倚竹天寒
餐梅骨瘦不有佳作何神雅懷勝博塞之歡娛擬絲竹
之陶寫玩物容志可無譏焉固知信陵之飲醇酒與士
行之運齋璧迹雖迴殊心乃一致異同之故境實爲之
夫屠龍至鉅雕蟲至細技之大小所挾不侔無當於時
同歸於廢而無用之用匪可言思蓋自風雅道衰絃歌
聲渺略存韻事卽蒙泉剝果之遺待啟元音亦後海先

河之例將使蘭亭絕唱長在人間柏梁聯吟重來臺上
蔚爲風氣茲其權輿若夫持高論者病其有害學詩挾
褊衷者斥爲好行小慧類斯疣見胥等讐言區脊溝猶
寧復有當昔漁洋論詩謂當如雲中之龍時露一鱗一
爪彼主神韻此取鎔裁餘錦零紈亦鱗爪與寒山社者
地居京國思寄姑蘇郊島聞聲鍾牙答響門稀熱客室
有古歡觴詠於斯月必數舉歲時旣積光景彌新成主
客之圖署花萼之集謂吉符曲傳金縷悽入心脾吟到
梅花香生齒頰見實甫詩凡此緣情之作都付舉坐之歡仿
漢上之題襟黯然一別賦平原之歎逝已矣三君謂印伯味
春芷青蓋一載之中已不勝風雨之懷人琴之戚焉關子

穎人曠世逸才主持壇坫比以社集屬綴弁言式通移
家吳中參禪蕭寺寒山香火夙有因緣白雲在天間門
若練甫一展卷覺詩夢鐘聲如在楓橋霜月間已

鄭齋感逝詩序

流連歡宴開府所銘軫念魂交梁元有序矧在觀河之
年未蠲宿桑之戀已墮刼輪難忘瞥電蕊心不死鉛淚
長傾旣結想夫真靈因發辭而愀愴眷言師友厯閱興
亡託體風人對庸野史此鄭齋感逝詩所由作也君以
天真清裔翔謨神京嘗受知於鄉先達翁文恭公有國
士之目而承明著作未竟其才虎觀朝譚鳳池夕奪郎
潛積歲晦不希榮己庚間設教太學萬流仰鏡龍門之

登士慕元禮雞林之賈詩重香山負海內盛名者逾三
十年閱人既多存者寢寡追憶平生宛然心目蓋不勝
仲宣城隅之慨元瑜異物之傷焉辛亥迄今國如僑置
君以買山無資周南留滯鬱結誰語述造遂繇詩以言
情孤懷可見鼎湖仙去首志攀號餘自文恭以次非爲
沆瀣之合卽有香火之緣異波同瀾零落略盡芝焚蕙
歎歎薄長吟念南皮之昔游聽山陽之鄰笛匪惟思舊
兼及遺聞柱下支流江河不廢若夫精浮神淪忽在世
表晝夜不息彭殤等視固猶宣聖川上之觀莊生齊物
之旨也嗟乎子桓痛逝低徊炳燭之言士衡思哀悽惻
寒林之步智愚同盡不過百年自佛眼觀之一剎那耳

而此一剎那間梅塗沫聚無量愛憎顛倒衆生如夢如
幻詎不悲與

宋刑統序

鄞縣范氏天一閣舊鈔重詳定刑統三十卷爲海內孤
本雖有殘缺甚可寶貴歸安沈寄謬師遣人逐寫未及
刊行會遭世變幽憂奄化歲時遷貿知此者尠吾友定
遠方子樞長法制局勤於其職治事之暇蒐集古今法
典志篤願宏假得此書精校付梓旣成屬爲弁言式通
學殖荒落愧無以應爰舉師說以復於方子曰刑統書
名沿革之可考者唐宣宗時張戣以刑分類爲門而附
以格敕爲大中刑律統類詔刑部頒行之後唐有同光

刑律統類周顯德四年中書門下以朝廷所行用者律疏令式之外有開成格十卷大中統類十二卷後唐至漢末編敕三十二卷格敕條目繁多閱者疑誤命侍御史張滉等十人訓釋刪定爲大周刑統二十卷與律疏令式通行是顯德刑統卽刑律統類之省文宋刑統又本之周其篇目總數之可考者玉海言刑統凡三十一卷二百十三門律十二篇五百二條並疏令格式敕條一百七十七起請條三十二其修訂凡例之可考者建隆三年十二月鄉貢明法張自牧上封事駁刑統之不便者凡五條詔下有司參議而釐正之四年二月判大理寺竇儀言刑統科條繁浩或有未明請別加詳定乃

命儀與權大理少卿蘇曉等同撰集併目錄爲三十一卷舊疏議節略今悉備文字難識者音於本字之下義似難曉并例舉別條者悉引注於其處有今昔寢異輕重難同禁約之科刑名未備臣等起請總三十二條削出令式宣敕一百九條增入制敕十五條又錄律內餘條准此者凡四十四條附於名例之次其削出格令宣敕及續降要用者凡一百六條別爲四卷名曰新編敕又乾德四年三月大理正高繼申言刑科敕律有錯誤條貫未周者都凡三事一在職制律一在斷獄律一在名例律請檢尋刊正於是有重定刑統之作其後熙寧四年二月檢正中書房公事曾布言刑統刑名義理多

所未安又駁其乖舛凡百餘事紹聖元年九月宰臣章惇等復請申明刑統律令事其刑制之可考者元王元亮唐律纂例五刑圖列刑統五刑決杖配役之法與唐制不同其令目疏議敕文之可考者宋傅霖刑統賦注中所引律文之外有服制令公式令戶令品官令容齋隨筆夢溪筆談時引刑統疏議文隨筆又引刑統唐太和七年敕至刑統律文宋人說部中往往引之與唐律頗有異同其書採掇唐開成編敕大中統類周廣順編敕諸書而成遞加刪定條制愈密故終宋之世用之不改又天聖七年四月判國子監孫奭言律疏與刑統不同本疏依律生文刑統參用後敕雖盡引疏議頗有增

損今據爲定本與刑統兼行是宋時律文原有單行之本故陳振孫書錄解題律文十二卷音義一卷與刑統三十卷各自爲書唐律疏議所附釋文本爲刑統而非爲唐律注釋中多律文及疏議未見之語以刑統校之悉在所載令敕諸文之中並非無故闕入其間有與疏議不同者亦刑統所改蓋宋代法制因唐律令格式以此書與律文十二卷並行垂諸功令當時治律者宗之是編行世足備一朝之法制與寄籒師先後所刊唐律疏議元史刑法志元典章明律次第銜接脈絡可尋損益異同心知其意有裨學者功豈淺鮮固猶寄籒師生前之夙願也

荃察余齋駢體文存序

曩寓姑餘樂親才士所至莫逆者則爲武進沈越若同年方標獨秀互競儷辭比入京師與屠結一汪袞父相善結一專精元史不復屬文袞父旣治國聞未盡風好曾相約曰願與子終老於漢魏家言僕躓其語病未能也人海藏身華年彈指重商舊學厥有時英初識成都鄧君守瑕目爲杜樊川陳同甫一流過從寢數出示是編點定謬期低徊歎服君著述至富刪削務嚴所存諸作大都旨歸典則辭尙體裁導源於元嘉永明合轍於咸亨調露方諸往代實四傑之嗣音儼以近人亦二胡之勁敵沈博絕麗疇抗顏行君秉負異資淹貫羣籍衍

禹彪之緒國志姚聲生卿雲之鄉天庭挾藻光分輿井
精懸岷峩固宜炤爛篇章發皇耳目當茲藝文垂盡酷
甚羸燔儒墨交攻咎歸頡製君迺語韓陵之片石發謝
傳之碎金握璧懷珠練青濯絳何異陳章裸國奏雅桑
問梁簡文謂文之橫流一至於此又曰文章未墜必有
英絕領袖之者斯言而信微君誰歸惟念相輕自古子
桓所嗤知音難逢東莞所戚僕固自悔少作筆硯久焚
君亦私懺瓊思金石獨止證果識菩提之義不在優曇
傳燈悟香火之緣非關須曼三千世界生聖解於桃花
八百修羅終敗歸於藕孔蘄窮智度誓守屢提蓋自倉
葛民呼胥餘範演娥臺俄圯桓幕載傾杜陵動奕碁之

嗟沈約作郊居之賦而君與僕之把臂入林者殆從此始焉訪西涯之一角餘話詩龕陟江亭之十尋聯吟瓶社作圭年生日象謁慈仁譯闕賓造論瀾翻烏水凡茲涉覽都雜悲愉錄東京之夢華添宣南之掌故所願中原無事南宇再康滄海不波息龍蛇之起陸艸堂戢景兔猿鶴之笑人君馳喻蜀之書我續僑吳之集閭門匹練望遠他時巫峽清秋相思故國昔稚存之贈言船山曰一日之內僕眺日升君眺日沒一江之水君飲其源我飲其委雅游可眷非想無殊用造勝因以爲息壤

琴話序

有清光緒辛丑長沙張文達公興學京師楊君時伯與

余應公招致同居橫舍治事之暇輒縱譚今古嗣設總理學務處在東鐵匠胡同君與余首公其間者又數載歲時遷貿久而益親君性質直不宜仕宦中年喪偶獨處寡歡凡所陶寫畢寄於琴舉空積忽微之數接摠操持之法劇鉅心神窮盡宦與琴師江寧黃勉之謂授琴數十年弟子數百輩無出君右者君耆琴成癖聞遠近有古琴每傾貲以購物聚所好故蓄琴甚富余每過君見其攷訂律呂羅列絲桐拄指鉤弦沈思獨往數弄之後如夢鈞天不復知人間何世矣君旣邃於琴學洞悉原委思以所得語人成琴粹比著琴話手寫付梓先以示余屬爲之序余維雅樂之重附於經術漢書藝文志

雅琴趙氏七篇名定雅琴師氏八篇名中雅琴龍氏九
十九篇名德凡樂六家百六十五篇出淮南劉向等琴
頌七篇漢制氏以雅樂聲律世在樂官頗能紀其鏗鏘
鼓舞而不能言其義六國之時魏文侯最爲好古孝文
時得其樂人竇公獻其書乃周官大宗伯之大司樂章
也直齋書錄解題鄭子敬書目曰儀注編年各自爲類
不得附於禮春秋則後之樂書固不得列於六藝自此
義發明而琴說寢微近世如清王坦之琴旨目錄家入
諸樂書宋朱長文之琴史明嚴澂之松弦館琴譜清程
雄之松風閣琴譜則歸諸藝術其涂分矣君抗心希古
非僅識曲賞音鏗而不舍將以宣揚中聲羽翼經義琴

話之作特緒餘耳余不知琴何敢爲鑿空之論獨以與君交誼之篤親見君琴學之成書此以應博君一粲亦猶十餘年前在校縱譚時也

十六家墨說序

高平要術造墨兼傳易水世官顯門始顯敏開北學超啟南宗天水以還士夫好事多矧新意親授善工下息明代邵羅程方一流並以文人旁通曲藝康乾之際則有曹氏藝粟汪氏鑑古函璞諸家胡氏蒼珮最後出遭時清晏得名煒赫供奉御府霑漑學林視彼市鬻等諸自鄒松鄰故籍歙州左臺之裔谿南之秀自萬厯時相沿製墨今可述者逾三十人矜重邦族能詳雅故夙耆

收蓄爰逮同好螺九分弄犀壁寢空索過風於前林消
永日於病榻輯十六家墨說自宋元明迄今有專刻者
不錄昔人論墨之書大都首述造法次及名家良以漢
貴隄麋唐重上黨新故相乘流傳有緒旣地靈之迭易
遂歲遠而彌珍李廷珪墨至宣和時價埒黃金蘇浩然
所製世人獲其寸許如斷金碎玉準是類推可知雅賞
鑒藏相詡紀載斯興茲所譔錄皆述各家源流紀諸墨
名品意在汰取菁英昭晰原委區別法式稽鏡毘聞作
客卿之叢書爲松滋之總集用規風尙遐想承平至於
麗藻瑰辭無當攷證舊譜屢列蓋弗取焉僕未儲一笏
可飲三升松鄰顧以衍石敘石華端谿硯史相例姑綴

小言勉答阿好武庫無有文房曷章唐突前賢听然齊
笑

蟄園鉢社第五十集詩錄序

蟄園鉢社始於庚秋歲逾四周說窮五際池灰屢徙興
蹶疾於驚蓬海水羣飛文物淪於廢棘世情雲詭人事
星移瞻烏止之靡依思雞鳴之不已留茲幸草惟我同
岑俊厨顧及不標黨籍之名東馬巖徐能話屬車之舊
荃宰所寄藻詠斯繁樊山匏廬兩公以詞林耆宿同主
騷壇授簡命題開墅選均郵筒練日盃響鏗宵每當風
月可談綦履咸萃明燈煜煜清漏沈沈蘸墨磨稠泚豪
箋疊覩义手於廣坐則健者先成類入定之枯僧則小

奚匿笑寫官腕脫主司目迷不辭狐穴之嘲恐失龍頭
之屬博徵逸典閒采稗諧狀元貴於毬場主客分於圖
畫迷離姓氏爲月泉吟社之遺跌宕琴尊亦草堂雅集
之續刻燭一寸積詩萬篇應寒山之鐘聲合稊園而鼎
足人間何世余情信芳蓋有無住之思悅生之志焉月
在嘉平集符大衍爰啟高會廣攬勝儔大厯數典猶識
韓錢元和主盟仍推沈謝冬儲騰笑設蔬甲之芳鮮雪
意相親問梅花之消息旂亭競唱冰柱分題感或切於
停雲數已符於列宿遂乃導揚金奏吟采華篇王前盧
後並越恆流宋豔班香都爲一集重聽鴻臚之唱榜朝
士無多新開麟閣以賞詩儂家自有敢云墮引略見風

襟以質時賢終慙大雅

湘雨樓詩集序

湘中詩家近數十年大抵言西江者宗湘鄉言漢魏者宗湘綺寢成風氣蔚爲大邦間有異軍等於偏霸顏行疇抗戶視咸歸獨吾師張文達退思軒詩遠法少陵近規七子不囿眾好有過人者雨珊先生爲文達伯兄以倚聲傳致掩其詩哲嗣仲貞旣刻湘雨樓詞繼刊詩集謹諉弁端諷誦桑日詩多計偕行役之作散原稱其歸宿老杜旁兼韓蘇以超逸之才清空驅邁之氣宰制而陵薄之葵園謂得杜髓蓋與退思同源而際遇不侔襟靈遂別文達出入禁闥瞻望神州遭世艱屯涉筆愴歎

先生則自丁丑以後絕意進取讀書事親澡雪羃氛相
羊清晷娛茲野服韻於朝簪花鄂分吟南北相望匪止
勞逸之判殆有舒鬱之殊至於感舊懷人緜邈往復溫
厚之旨埧篋合音斯固蜀州追酌之遺同谷作歌之續
也夫李唐詩人隱居不仕如盧浩然秦公緒之倫眾矣
而婺州南陽後先輝映二張軼事千祀尤昭可知處士
之名勝於高位山林之澤永於鐘鼎風流不墜其在是
與昔沈乙庵文序文達詩儼以張文貞權文公言生前
未見今髣髴遇諸卷中式通之於先生取子同承吉以
相況者亦以拜牀空慕開徑無緣逝矣芳流畢然遐胃
慨明姿之堙暖思獨詠之蒼茫體厥性情契諸篇翰九

京可作三復以期或許爲賜可言詩乎

鞠部叢談校補序

吾友瘦庵以順德世家子入洛蜚英過秦著論旁通四
裔平揖三台光宣間知事無可爲迺陶寫絲竹寄託荃
蓀東墅蒼生歸瓊枝之輭舞南朝坐部尋玉樹之新聲
豔體詩餘秋痕意遠淺見譏其溺志達者咎其幽憂卒
至蠶絲垂盡神游玉茗之堂鸞翩將殘病卧靈蘭之室
發華琳之祕劑百藥虛嘗悟沙界之勝因一葦可渡鋌
鍼肢遍瓊瑰泣盈懷池草於阿連長留斷句焚瓣香於
子固待定遺篇巫陽下招令嫺繼逝是可哀已阿邈居
士與瘦庵吮豪角韻側帽倚聲慕萊國之稱顛擅周郎

之顧誤芳塵瑤席聯吟芍藥之花修夜蘭釭共醉葡萄
之酒無車公則不樂醜譙必借似洗馬之言佳姓名未
識遽摧漸筑幾輟牙琴於其歿後一年取所作鞠部叢
談校補成書冠以醴陵彩筆獨得驪珠殿以謝傅碎金
何殊鳳羽彈宮扣角本自合音奉芳擷腴依然同調將
付剗剗誣諉弁端余交瘦庵歲在辛丑媿散愁之枯寂
絕迹歡場異昭諫之曠夷應徵高館長柄葫蘆之間士
龍所嗟臭味松栢之章太真是贈江亭觴詠攜並載之
璧人蕭寺履綦襍轉喉之車子活秦宮於花底賴有餓
麟禮雲封於笛中忘爲窮鳥朱門蓬戶久作齊觀經卷
繩牀相期老去檀那之題宛在桑下之宿安歸不有妍

談曷徵慧業昔吾鄉李越縵先生爲時琴香錢秋濂朱霞芬作花部三珠贊其序末云傳彼伶官當改題以一行師乎桐子宜易位於三公春秋貴賤不嫌同辭具盪氣迴腸之概寓憤世嫉俗之心稽其年月在丙子仲冬沅江秋思華省名郎際元祐之太平爲東方之遊戲居於好事望若登仙以視瘦庵運觀永嘉時丁天寶宜春藻謝長信鐘沈念協律之貴游椒房揜嫖睠仙韶之故院鞠部銷妍十宅諸王夢回天上二州刺史腸斷花間繼外家飛雁之謳小叢行露工假婦翩鴻之致有態飄煙思金帶於蠻兒悼青衣之小宋固宜流連凝碧憑弔玉熙而子弟之員三百能說元宗談諧之言數千尙餘

陸羽南府授錄供奉猶引爲光榮東朝賜金侏儒不忘
夫恩澤河傳水調屬於宮詞紫雲凌波出自御製渭川
一奏疑鶴年龜年之相逢穎叔再生知聽水聽風之無
恨大唐法曲歷扶桑之和歌炎漢遺音存耶律之散樂
香祖傳內家之譜梅秀孫枝顛官屈宰相之尊譚多嗣
響遙流旣極視聽彌新自菩薩蠻曲之盛行遂崖公蜺
斗之變習進高明琵琶之記珍羞比於五經去和凝鼎
鼐之稱美男別於三婦院本善言兒女星宿探源禁坊
例舞天魔邯鄲學步身輕飛燕治袖調以吳歛髻縮靈
蛇盛鬢樵於昉畫阜紗初褰驚東西鵝鶩之翔游繡幔
雙開眩溟渤魚龍之曼衍雲間寶扇九華擁絕代之姝

月下銖衣一襲倍中人之賦何哉動魄干寶低眉東鄰
羨美於嬌顰北地孕元於初蕊國香所染吉士化之粉
面迴旋埒於京兆紅牙點拍儕於武功品李節之秦箏
客同元朗守良輔之崑律人盡伯龍屬幕雀翎競效德
閭爨弄春銜燕子重繙圓海傳奇希清容之審音踵笠
翁之理曲聰周系黍辯起紛葩轉綠回黃分牛李於絃
索是丹非素爭洛蜀於甃甃月旦有評波瀾未歇推之
柳冠雉尾虞山惜變相之慚顧畫蛾眉樊榭諒致身之
欠訊脫娘於舊院零落人間類鄭妥之韶姿躡躑孫輩
鞠歌含怨蓮舞銷魂近若翠翠移巢促楚澤纍臣之去
國珊珊響佩入松廳御史之彈章取鑿匪遙增華尤甚

汝南空嫁憐劉家碧玉之行嬌月爭看繩季布紅妝之
態易綠珠以三斛詎少齊奴聞絳樹之雙聲如來魏苑
女郎十七雕筵唱楊柳之詞吹臺九重仙隊奪櫻桃之
色彩雲處處錦瑟年年賦上林耳目之娛紓神州陸沈
之痛寄左右風懷之興蠲光陰過客之悲萬古奚愁六
更誰續此則朱顏貽上未免嗚咽秦淮白髮樛村因以
沈吟滄海者焉瘦庵詩詞書翰俱足傳世茲雖餘央亦
露靈襟唐段安節撰樂府雜錄首列樂部次及俳優宋
劉昫輯燕樂新書行諸教坊未分雅鄭臨淄抱殘於板
蕩卯金追志於中興爲藝術之支流著書林之目錄是
編惜徵世業可埒專家至若醉心靡劇形容甲帳之橫

陳選色明僮顛倒華堂之微笑窺雲郎之出浴傍紫稼
之臉波如近代燕蘭小譜金臺殘淚記諸書務狀妖妍
類疏故實以斯相較區涇渭矣

歲朝酬唱集序

著雍執徐春王三朝釋龕居士試筆賦詩和者百人都
爲一冊題曰歲朝酬唱集誣諉弁端將付剗劂余維依
韻倡和恭懿開先李唐著錄斷金久佚漢上題襟亦尠
傳本元白嗣音允推皮陸松陵十卷傑然大邦崔璞以
次附庸是擬宋則西崑同文蘇門南嶽皆酬唱之最著
者逮元顧氏草堂雅集凡七十人玉山主盟稱雄壇坫
至正迄明流風未沫馬厠荆南馮尊海岱金蘭埒錄荆

溪同游綜厥篇章于喁相望近數百年如樸巢同人迦
陵日下江村北墅靈巖樂游等此標華多於束筍而秋
柳名作銅鼓聯吟寫物寓情蒐奇稽古英絕領袖尤關
運會蓋自于湖池上訖於袁譚俯仰盛衰感歎無斁至
於閩中風雅鄭錄可徵抱玉聯肩握珠踵武釋龕先德
償園先生曾刊福州支社詩拾同題分詠嚶鳴友聲人
共鄉閭地非京國盍簪之迹與茲略殊而先河後海父
矩子孳乘皋善邕蔚爲家學清門濟美濁世稱珍上日
雅訶應求有自是集寫定或舉鍾記室之辭日謝客集
詩逢詩輒取又曰以類推之殆同博奕聆所瑕疵病其
徧隘大都論詩偏見榮古虐今並世則相輕積年則增

重儕偶評泊比諸虛車流傳異時猶今視昔詩人作者
罔不愛好亦援鍾說品隲斯編

吳郡通典備彙序

昔江都汪容甫作廣陵通典用編年之體爲釋地之篇
蒼萃條流苞綜鉅細合志於史此其先河實齊同聲
厥指奏孤文疇嗣曠世無聞繼之者則仁和吳伯宛昌
綬有吳郡通典備彙吳自周秦訖今繇國而郡而州而
軍而路而府爲東南隩壤士衡俾其清嘉太沖歎爲煥
炳九藪之一是日具區閭闔之門取象天闕其間沿革
興替戶口財賦水利兵制政教風俗上下數千年摻討
故實難於廣陵伯宛是編例本汪書博以章義起姬代

訖朱明都爲十卷敘錄具存梗臬可觀華郡之才抗手
先輩僑吳之集延聲作家而伯宛以未遑妍鍊有待攷
補久藏匿衍罕示朋儕歿後四年烏程張燕南元節爰
爲校錄味雲同年思其遺佚列入叢書余維伯宛耆學
惜名命翰矜慎茲雖初稿而首尾秩如鎔裁夙絕毋穿
羣籍成如已出鈇析纍疑識能獨斷可監古今得失之
林允符志史合一之誼伯仲江都同風挈矩至其鄭重
簡觚欲然自視所望後之讀者心知其意補闕削繁業
紹撰鈔功資點勘九京可作庶冥契焉

蟄園詩社集序

擊鉢雅集權輿閩中嘉道以還春明稱盛以吾所聞如

遠堂幼丹思雲恂予諸公皆以玉署迴翔金門游戲娛
情鄉飲挾藻詞場近則聽水老人實爲後勁俛仰百年
蒼涼寸肌蟄園詩社始於庚秋汔於戊冬匏廬年丈月
集輩流迭爲賓主會未盈百可紀者四朝陽坊屬相耶
東隅鄴侯擁三萬之籤永叔署六一之號泉石依樹上
有畫樓廊檻導梯中爲精舍硯珍蟬腹炙設牛心觴詠
於斯塵瑳不到是日勝地用糊名易書之法無臨場引
避之規主試至公密親畢萃引鄒陽爲上客有班氏之
佳甥榼梨平章冰玉清潤付諸圖畫望若神僊是曰佳
話詩家輩出替海稱雄客窮倚杵之思人作閉門之索
施諸刻燭復絕操觚白天琴翁侶爲典麗務極瓌妍美

饌合鱗新綾織鳳不有腹筍安望元鑑是日分派楚邦
最大揚鼎居先北地同岑炎方並轡三都蒼雋一卷題
名聽鴻臚初唱之聲信馬射百中之技才無敵手例得
狀頭是日專家然而鈞天樂陳塵寰入夢銅仙泣下鉛
淚凝寒雪訝堯年歲更漢臘是以疊山賣卜鐵崖嬉春
咸寄詠歌眷言身世則有滄桑之感焉一流將盡丸食
同飢出關亦屬壯游過江便稱名士水飲建業卽覓度
遼南浦頻傷渭城罷唱則有聚散之慨焉梨洲苦趣見
既集聞者涕洟石戶遺蹤言之悱惻社集最辰年應讖
自序亥既銷聲歌哭俄遷風流頓歇則有彭殤之觀焉言匪
一端緒乃萬族真靈邈矣傳侶黯然蟄雲同歲既以社

作乞闇叟選定書來索序式通受而讀之流連竟日琴
尊已杳篇翰如新賡老圃之晚香越吟曾預覩中州
之著錄燕說奚辭蓋論其一門風雅則石泉說雲之嗣
響也證諸友聲嚶鳴則寒山稊園之同調也九京不作
愴光霽之難尋四坐益親信因緣之非妄歷龍漢之劫
晚作詩人留鴻雪之痕視茲陳迹以張壇坫固玉山草
堂之遺儻隱姓名亦月泉吟社之續云爾

越縵堂讀史札記序

越縵先生歿後三十年其家藏書盡歸北平圖書館高
陽王君重民方在館最錄史漢以次諸史之批校兼采
越縵堂日記所嘗平識者彙爲札記都若干卷以印行

焉而屬余爲之弁言余惟史漢宋齊梁陳後魏後周北齊諸書自汲冢以還異本雜出真訛糾錯疑似互淆非修學好古之士湛思鉤攷莫能究厥異同而其義例之大著錄之繇亦將藉以折衷攷斷固不獨魚魯豕亥之細有所覬正而已先生於學無所不爲自謂平生致力莫如史故凡諸史經誦讀者丹黃戢香紛綴簡帙精訓詰通假借參引眾說捫釵豪芒每舉一誼便輒理解發隱疏滯良云勤矣第其所校舊槩以爲據依者漢書宋書南北史用明汲古閣本梁書隋書用明北監本祇魏書爲宋監本當時王葵園祭酒假諸華陽葉氏與同人分任讐勘計日而畢先生校列傳十餘卷老輩見書之

難有倍於今人者夫校勘之學有功經史奚待煩言試
約舉之如明道本國語昔我先王世后稷謂我先王世
爲后稷之官也公序本作昔我先世后稷遂譌爲周家
之后稷矣宋本方言吳有館娃之宮秦有榛娥之臺俗
本脫秦有二字馮己蒼遂謂其并榛娥而吳之紹興本
後漢書傳引謝承後漢書初太始至南州以下七十四
字明以來各本誤作大字於文義頗不貫宋本老子道
德經古本集注治大國如烹小鱗不作小鮮天大地大
人大道亦大不作王大均於義爲長中統本史記有項
羽都江一事阮文達檢諸藏書爲之大快謂茲事黯然
不彰賴於月表識別而出又得此霉爛蠹蝕五百餘年

之故紙以爲礪證古本之可貴如此蓋學者讀書將以經世致用必有求益於書欲求益於書則必使書先受益於吾故校勘之學爲讀書之先河而諸史者又前代得失之林也其所以致用爲尤切先生淹於史尤喜究明事浙東自南宋後久爲文獻淵藪延致明季其遺聞佚事如唐魯二王始末及節義之傳類皆未筆諸書寢歸湮沒賴有南雷季野謝山諸老以彊博之才轉相口授得以流行弗替先生躬承其緒志在裁制人倫整齊物類所蓄以應世用者深且遠而乃鬱鬱以終并其遺編在若存若亡間傷已先生於史著書十餘種其目詳於平景蓀氏所爲傳稿佚不可得今見者僅此札記殘

紙瑣瑣未足盡其精意然欲知先生校勘之方致力之
指於斯亦可想見焉

水竹邨人詩選序

蓋聞詩詠爲性情所寄合其轍於臺閣山林聲音爲風
會所關極其則於黃鐘大呂周畿正始禹域承流一代
稱詩坦園舉首申楊巨子朱紀名家北方多視月之儒
南彥有望塵之歎蘇齋繼起廣雅代興惟東海公實爲
後勁公天姿亮特虛氣穆清學貫百家識通四始凡香
象羚羊之超詣鯨魚翡翠之奇情靡不精研歸諸餘映
天上摘淵雲之藻贊醲迪薰禁中姚頗牧之聲軫艱幹
運而時逢陽九治託登三觀蜡而證大同瞻烏而嗟誰

止進關民物退侶漁樵邈矣夢華倏然獨詠闕厥素抱
用敢略陳當夫武漢上游江流頓異東南半壁王氣全
銷士鮮橫戈城皆易幟而天津之佐衆仰宏中國難之
紆朝資伯紀憂心悄悄予羽譙譙纖兒撞壞夫家居沖
人求全於巢覆終安魚服始遂鴻冥黃屋已非赤松待
訪劉越石之歎亂詩句蒼涼庾開府之哀時詞華蕭瑟
爲歸耕堂集四卷然而原君之論梨洲所垂天下之亡
亭林所痛以故見夷吾於南渡江左得賴以無憂起安
石於東山蒼生奚容其不出伊尹自任之重治亂何分
向戍弭兵之謀遐邇咸服而蟲沙徒化鵝蚌猶爭誰爲
借箸以代籌惟有推枰而斂手迺復疏襟耽靜樂漆園

而高瞻艸屨述懷覺南岡之可步遂初更賦歸去重賡
爲水竹邨人集十二卷至於晉公綠野歐九絳雪晨暉
夜燭春煦秋陰文饒洛下羅花烏於平泉凍水園中擁
圖書以獨樂華林濠濮之想在七十二沽翰苑風月之
娛得三千餘首是以契丹使者坐中間潞國之年吐谷
名王牀頭置溫子之卷性靈所主以齒宿而生新詩律
之嚴當歲晚而彌細爲歸雲樓集十六卷又況三絕承
先九能殊衆繪日摹天之手點染寒林鉤河摘洛之才
經營尺幅筆參造化心謝榮觀榮薄曹衣淋漓顛墨龍
眠山色入公麟之琅玕雅頌幽風有鷗波之縑素王朝
川之作畫詩寓無聲李昭玘之藏圖情垂序語梅花設

色粉本遺自中閨蕉葉流馨墨法授於嬌女鳶飛魚躍
盡屬化機麟角鳳毛都臻神品爲歸雲樓題畫詩四卷
退園題畫詩六卷蓼園學士名重儒林世傳經術與公
同登蒞榜相契木天譚藝最歡評詩尤洽鈇捫得失稽
鏡豪芒每一集成俱爲之序今仿精華錄爲水竹邨人
詩選二十七卷公將授梓命爲引隍式通擬古長楊未
獻金門之賦亭疑大李旁讀城旦之書厯浩劫於僊人
行吟汐社歎橫流於滄海恆宿露車彩管已還春華蚤
謝公則慰其蕭閒導以風雅容與盟鷗之館屣屐舞鶴
之儔十載編摩賦緇衣而色動四時觴詠對醴酒而顏
慙緒論久聞神思微會公詩境婁變變而益工靜遠如

其經國盛大如其籌邊沖夷如其持身邃密如其治事
白雲山中之怡悅得於行間圭峯月下之低徊見諸言
外神游一爪露從碧落之龍采攬九苞識是丹山之鳳
所謂合臺閣山林爲一有黃鐘大呂之遺者其在斯與
溯自天水以還詞流輩出摘鈔專集盛於元明其以精
華稱者宋任子淵以尊山谷乾隆間吳榕園選明大復
山人詩遂沿其名盛誠齋曹峩眉施諸漁洋取便諷籀
義尙簡賅神韻特標菁英畢見是編規範前人津梁來
者釋訓纂盈千之指學媿松厓冠年譜第一之文才非
伯定所願九州激翳百族翔飭并里晏安風日清曠從
公陟蘇門覽百泉訪康節之行窩作孫登之長嘯譬諸

游峴首於青春羊傅詎同湛輩望函關之紫氣尹喜知
有聃來夢月金梁追思舊侶過庭玉樹教學詩人續長
慶之千篇此爲初集序會昌之一品留待頤齡則茲之
下士詹言鯁生常語管窺蠡測猶薤薤焉

男蔭泰敬校字

志盒文稿卷二

王式通 書衡

跋 書後 題辭

變法經緯公例論跋

陽湖張筱圃提學承業崇軌奮迹邗邱譽譽匪躬夙宵
家國宣風太學童冠彪文陶物振俗海內稱之少耽經
訓綜極百家兼貫異聞無忘造述恆以周文殷質時有
等衰步驟不同替興迭代雖移瑟柱莫不中音損敝襲
新甯論彝夏譬諸和羹之美在於合異涇渭之流同宗
滄海思祛守株之惑用陳解蔽之篇彰往察來發爲茲
論追觀成法下究世變志禮運之大同筮乾元之用九

一編之中三致意焉至於經緯物宜旁薄眾有偶參伍
之驗測萬品之情形名此詳畢見情事斯則無垠之喻
上契鄒生正名之書旁符荀氏洵立言之極則鑑世之
逸光也綜君材美婉迹經綸苟鬯所施式康天步恢風
魯變應扇游塵屬世艱屯綦嚴文禁澤大雅之明哲矢
槃澗之弗諼卷道背時顯仁藏用一官湘楚世擬賈生
天命弗融歸棺遼左邦人諸友思樂德音瞻仰斯文咸
懷傷愴式通舊勳校事蛩蛆相依每念遺書責在後死
歲時淹歷夢寐係之譚子組庵雅有同志商校寫本刊
於京師永彰茂實用昭來軫後之君子或有攷焉

秋窗述舊圖跋

畏廬先生爲思緘同年作此圖思緘旣爲文以紀復屬
一言余與子順聞聲相思未獲把臂晚識媿室於京師
譚輒移晷時士論多詭黨禍方滋君舉東漢事太息不
已余戲謂君若爲孟博吾其爲林宗乎相視軒渠光景
在目泊還海上病榻詣書以徵車過闕圖索題駢耦文
字比譔寄則君已歿與畏廬哭於江亭距今十六年矣
青簡尙新黃壚已遠夢見徒詠幽墨未宜以視思緘流
連陳迹髣髴平生香火明明證諸緣法電華煜煜駐以
唯心服其精虔祇有贊歎嗟乎歲時代謝速於轉輪魂
魄以去同於秋艸而朱絃輟響琴緒可尋元鳥重來巢
痕宛在追言笑於旣往綿性識於無涯丹青不渝英華

靡絕用記亡友之概足持交道之衰若夫塗旃聚沫止
灤棲蘆浮屠杜宿桑之愛根慧安以見漚爲妄想凡茲
義諦思緘固知之已

越縵堂文集跋

右越縵堂文集十二卷高陽王有三重民校定昔越縵
先生自華絳跼閣詩初集自序謂所讀之書與所爲之
業自經史以及稗說梵夾詞曲無不涉獵而撫倣之見
於作者有散體文有駢儷文有詞有樂府有雜說雜考
雜志而綜爲筆記平氏景蓀爲作傳詳列所著書目先
生歿於甲午越廿餘年其子孟學齋至荀學齋日記五十
一册始獲行世又十年其批校諸書盡歸北平圖書館

有三在館先輯諸史札記次第成書茲復蒐集散文得百三十四篇與虛霽居曾氏所刻駢體文合若析圭曾氏珞錄暨余氏手寫之文俱併入彙刊惟先生復陳畫卿書有散文分內外篇約二百首之語則似當日別有定本又云正名二十篇頗自負爲內聖外王之學足以繼明夷待訪錄日知錄而起須俟身後始出此已闕如復王益吾書云拙著經說以散在日記及經籍眉端擬俟病愈招邑子及門生寫出名目越縵經說今遺書儲館方事遂錄後死之責海內所公尺璧寸珠咸相寶重單詞隻句摻香靡遺夢見禮堂顯顯心目與先生讀書詩所謂意專生默悟力猛忘前紆者如或遇之先生閱

劉孟瞻青谿舊屋文集致慨於逝者髮白燈青霜濃夜
永丹黃鉛槧稿餓自怡而稱其著述長留天地狐狝所
不能噉用知不朽有真先後同揆立言之壽並於德功
固非不實之華無源之水轉陶萎落卒歸無有者所可
並論已先生說經確守乾嘉諸老家法於史學致力最
深平生矜尙名節務矯俗流有裁制人倫整齊物類之
心而道孤命蹇志未少伸形諸簡觚可知梗臬近代越
中巨子如西河考據石笥詞章實齋文史躬恥義理流
衍儒林並光典錄先生晚出學有異同沈思藻翰負極
慮表餘藝具存前賢生畏後之覽者盍審斯言

書會稽何烈婦遺札後

吾越多節義之士而奇氣並溢於閩內曹娥諸娥尙已
後此孝烈之行縣延不替坊碑相屬於道爲海內所僅
見證以近事清季會稽何祖蔭客死於滬旣歸殯其婦
何從容作書訣別家人仰藥以殉鄉之賢者思其湮滅
無聞爲徵詩文以章之或謂夫死身殉出於過情禮經
不著意至深遠持是議者陳義甚高而未合於今之世
也際茲陰教不修彝倫墜地非奇行不足以振之闡揚
芳烈使人監於輕重之所在而羣歸於正極其功用可
以植人紀於兩間故關於烈婦者猶小關於風氣者實
大夫儒者立言必審諸世道體諸人心至當不易一無
偏倚而後其說可信吾嘗有所折衷矣昔方望溪氏書

孝婦魏氏詩後云節孝之過中者自漢以降始有之三代之盛未之前聞也豈至性反不若後人之篤與蓋道教明而人皆知夫義之所止也後世人道衰薄天地之性有所壅遏不流其鬱而鍾於一二人者往往發爲絕特之行而不必軌於中道然用以矯枉扶衰則固不得而議也黃元同氏作會稽王烈婦論曰苦節宜貞也而易曰不可貞非教人失節也節而苦雖欲貞有不可也節與貞美事也曰苦曰不可戒詞也記曰昏姻之禮廢夫婦之道苦苦爲夫婦之切戒以節爲苦心不甘矣心不甘不可貞矣六四曰安節亨九五曰甘節吉烈婦以節爲甘而安之若素其死也君子以爲貞不死君子亦

以爲可貞貞不在死與不死君子獨窺之於其微而嘉其志蓋方氏之言審世道者也以其時代與今日較所謂絕特之行用以矯枉扶衰者不更亟與黃氏之言體人心者也貞不在死與不死止以其志爲衡則禮意用浹而過情可無疑焉兩家之說皆至當不易一無偏倚以此示後則烈婦之論定而禮家之論亦定矣

書天津徐健廬先生事略後

健廬先生受質淵懿曠義濟仁功在治河活人千萬家尸戶祝志乘垂聲儒效之宏彰彰耳目而世之好神僊家言者以爲曼倩歲星金門大隱香山教主兜率新歸表抱朴之外篇求度人之內景比於真誥說類虛車蒙

竊惑焉按漢書藝文志列伊尹太公於道家呂氏春秋先已篇引伊尹對湯取天下之間說苑臣術篇引伊尹對湯三公九卿大夫列士之間旨近道家大戴禮舉太公道丹書之言則歸本於仁而在昔著錄兵家多出於道家隋志始載太公六韜其文義不類三代自是僞書而附會已久斯猶陰符經託諸黃帝三略與素書託諸黃石公謂卽圮上以授子房者又謂三略源出於太公唐王真領漢州軍事取老子之說撰道德經論兵要義進之於朝凡此皆道家所稱述而究厥指歸與神僊家之服餌導引符籙燒煉判若涇渭至朱子答蔡元定書論參同契有但望他日爲劉安雞犬之語則有激而言

非眞慕沖舉也如先生之性善習善志在民物迹未大
顯流澤孔長論其抱負伯仲伊呂若以神僊傳中人儼
之則淺矣己巳五月先生歿於里第其公子以事略徵
題敬感交至因雜采舊說書於後云

題郭鷗史女士二喬觀書圖

右圖爲侯官郭鷗史女士遺蹟春榆太保年丈以零縑
厘在季蘭蚤摧過時而哀徵題同社樊山老人首爲儷
文系以韻語敘江東之身世慰親舍之鬱伊芳悱感人
辭情兼嫩雖崔顥之題詩在上而壽陵之學步忘孱敢
作嗣音以張寶績女士誕育鼎門標格璇閣調鉛初習
能寫溪梅弄翰難休爲對庭竹象禮宗於鞶繡諸姊皆

憐圖孝苑於湘紈在髻已熟年丈謂其十齡始就塾讀
書沈默寡言終朝伏案自知不壽嘗語其女甥云吾於
塵世事無所慕異日能爲文以傳我足矣用知照分瑄
朗悟明月之前身誦舉清風見雅人之深致三生紅蠶
銷蕙質於書叢百笏青麈恣若年之墨戲珠光遽掩粉
本如新以視嘯雪天才清于家法玳梁執硯夢樓有題
畫之詩九英及笄籜石授仰南之筆咸鍾慧性並出名
閨今往相衡幽馨遙接固宜緜素成誦左女稱嬌紫石
刊書白傅歎逝在昔疏香閣冷鸞輶下臨病榻語悽螺
盒追憶寒簧之歸月府松實親貽越畹之見雲中夫渠
在握大都謫從紫室沖舉碧霄以妄塞悲因心成境年

丈則鑒其曠抱念厥遺言重人間形管之名忘天上華
鬢之位湛然真理允矣禮家志壙石於千秋識昌黎爲
傳挈女覓金銀以再世願崇嘏速變男兒信有轉輪請
紆結轡至於然脂賸迹長弄塵寰阿堵傳神精摹國色
珠鈴一卷守橋公黃鉞之銘采翼雙飛啟吳帝金車之
運壽春天合賁匡媿其兵姻建業行尊班育忘爲貴主
王粲英雄之記僚壻同年周昉仕女之圖佳人獨步弔
龍舒之孤塚何處芳魂問鴻漢之五銖都爲末造稗說
采世期之注高格入宣和之編穠麗如生丹青可寶瓌
汝著於郭氏留空山萬木之吟尊玉秀於閩中學大家
百城之擁黻蕤畫史趾美才媛固不必以瑤林芳藹琳

嶠靈蹤援神僊家言釋庭闈隱痛也天闕之戚觸類杳冥離合其詞進質方雅

題高用菴司獄歸養詩冊

同治間利津高次封戶部出典吾郡督視疏鑿病瘖乞歸李越縵先生送之咸歡河側贈序有云君以馮唐之年衰焦先之疾賓客盡散吏役擲掄國無祖筵郊無飲帳行李蕭特山川黯然誦茲數語情何以堪今見是冊爲道光元年高用菴司獄歸養士紳觴之蘭亭爲詩文者四十九人中有閨秀釋子何其盛也獄吏三休勝於太守湖唐一序播於藝林同爲高氏之妍談越中之軼事而風誼厚薄緣法淺深之說可無論已夫廉吏將行

部民惜別沿至晚近文勝質漓舉其古者後漢劉寵去
郡山陰五六老叟人齎百錢送寵寵爲人選一大錢受
之寵之賢誠不能及卽此五六人之懷思過於後世千
百人之歌頌殆可斷言史氏所稱事難再覩與人之誦
後此亦稀存者舊之文辭備輶軒之蒐采邦多君子姓
氏可徵家有後生師資具在斯則侶仁作記徵題之敷
情也至若會稽覽古安仁成詩幕府懷才梅溪能賦凡
茲博識知所優爲張我越風盟諸息壤

題蒔薰精舍圖

吾友虞君和欽登高能賦以息相吹邵菴陶菴先芬可
誦漸水皖水舊雨借游治舍西山寓情香草荃宰所寄

顏曰蒔薰彭子續圖君自作記其辭甚美善於說山是山之巔余兒築室以娛老人余題曰玉秀山房雞犬相習猿鳥久親四時所公敢云專壑百年之後無慮爭墩惟花萼之吟絲桐之奏爲君獨有竊歎弗如君眷念邱墓南望慨然余題亭曰懷蘇蓋蘇之堯峯先坐在焉閭門若練白雲在天以寫寸心同茲遠眺君家甬東余僑吳下山水佳處秀絕塵寰客久則思其土士窮則返其居他日南歸君爲賀季真有湖可賜我爲梁伯鸞依廡以棲詩筒唱酬時來驛使扁舟往返何待飄輪草堂之資取諸文字月泉之社近在鄉閭姓名互見於集中游戲相忘於老至舊巢無恙以長子孫故柯恆春不知歲

月回憶四平台南長安寺外一枝託迹數家結鄰直莊
生之蘧廬浮屠之桑下已香火有因江水曾誓息壤在
彼券以斯言

書

與汪袞父書

都門話別回首惘然讀致彤士書知文從早抵潤州侍
奉康娛述造都富塵襟乍滌樂可懸思勝游多暇壹意
著書絕業在子能無盛妬治經之學竊尊所聞家法貽
留區以二道一由易象春秋以窺游夏此則專用心力
無事廣蒐中人以上數年可就一由周禮說文進求孔
制以前之迹竟非遍讀寶書未能卒業域外文宇驟難

深造可據者釋藏中有數十種譯本中有十餘種而已
漢時中書最富所謂三皇五帝之書猶有存者儒者多
刺取以入己作周禮說文蘊奇儲寶無所不有故信此
二書謂卽孔子之道者固非矣竟目爲鑿空四造符應
者亦非蓋符應能造於中國簡編不能造於殊方紀載
今讀西來之書輒與之合則非當日所能豫計必上古
中西之人同一種教故其遺說亦同則經解明而種人
遷徙之迹亦明矣周禮天官一篇流毒無窮求其藍本
迄不可得自是媚莽之作地官是管子夏官是司馬法
冬官僞缺以示真秋官未詳春官殭石最多而奇其中
至要有二種曰史曰巫惟樂則無從知耳說文更爲古

學之根然求之尙易因其書核練不支蔓也自維寡陋
人事牽率虛抱宏願百無一就以執事之異稟盛年當
可成此舉破碎支離之習一洗而空使人知經學之有
裨實用斷非空談性命者所得抗衡豈非今日一大快
事都中情狀與執事去時迥異鄉愚仇教自齊及燕醜
類媿徒日相附和妖言蠶起皇惑衆聽馴至整隊國門
持械都市金吾無禁鐵牡疑亡出入橫行了無所忌當
軸誼主尊攘慶同與塊極其作用將以召胡塵之犯闕
速金兵之渡河幸而爲突厥朝鮮不幸而爲印度波蘭
推原禍始實誤於二三庸臣之手國事無可說流涕而
已涼燠靡常百惟珍攝

上浙撫請奏建浙江三忠祠書

本年三月二十日內閣奉上諭朕恭讀光緒二十六年
二十七年迭奉諭旨特將誣陷被罪之前戶部尙書立
山兵部尙書徐用儀吏部左侍郎許景澄內閣學士聯
元太常寺卿袁昶開復原官並錄用子嗣仰見我德宗
景皇帝秉承我孝欽顯皇后慈恩垂訓一秉至公惟念
該故員等心存君國忠蹇可矜允宜再沛恩施嘉名特
錫立山徐用儀許景澄聯元袁昶均著加恩予諡用示
朕推廣慈仁之至意該衙門知道欽此仰見聖明繼述
前徽矜念忠藎推恩賜諡感徹幽明故尙書徐忠愍故
侍郎許文肅故太常寺卿袁忠節皆籍隸浙江當世有

浙江三忠之目某等居同里開於節行政績企慕尤深
敢舉大端爲我大公祖陳之徐忠愍爲浙江海鹽人由
刑部主事考充軍機處章京兼總理各國事務衙門章
京補雲南司主事再遷至湖廣司郎中於同治初入軍
機處其時軍書旁午擬進詔旨動中機要爲恭親王所
倚重遷鴻臚寺少卿以憂歸服闋後累遷至工部右侍
郎充總理各國事務大臣又由吏部侍郎充軍機大臣
日本構釁舉朝爭和戰公以東人勢方熾未可輕戰與
朝論齟齬及和議旣成公於上前請退軍機及總理衙
門得請公自充總署大臣十有三載遇事彌縫匡救心
力交瘁至此幸始息肩而德索膠州俄索大連灣英索

威海衛九龍島法索廣州灣外侮狎至公雖不與其事
憂慮成疾光緒二十四年八月孝欽顯皇后再訓政以
公在總署久熟外事復任之旋由左都御史授兵部尙
書寵錫有加而義和團適起於山東公力請勦治俄而
拳匪闖入京師攻擊使館公會同列入告請嚴行禁遏
又擬按公法令各國使臣出京以紓其禍而忌公者遂
日夜媒孽其間時各國兵輪麇集津沽屢召羣臣與決
大計公與許文肅袁忠節皆極言民團不可恃外釁不
可啟凡召見四次所言益切奉命至使館議之美國使
臣猶允爲調停乃首禍者力主用兵謂不殺議和諸臣
則士氣不振迨許袁二公之禍作公亦自知不免未幾

遂與楊忠貞崔佳文直同棄市公平時巽順與物無忤而事關大局安危至以死爭之其大節如此許文肅浙江嘉興人由編修升侍講充出使日本國大臣旋丁父憂服闋值越南事起公疏陳籌備事宜多見施行光緒十年充出使法德義和奧各國大臣十一年兼充出使比利時國大臣時海軍初創前使者於德國訂購鐵甲船二穹甲快船一皆未就公與譯員等歷遊船廠講求船制又增購穹甲快船一船之精良甚於舊制者十有五事著外國師船表十二卷進呈又上疏言太沽口宜設鐵甲礮船膠州灣宜定爲海軍屯埠俄丁母憂歸歸而粵督今相國南皮張公招與商榷時政奏定蘆漢鐵

路章程皆公所參訂也十六年又充出使俄德奧和各
國大臣俄兵游獵每涉我國所屬帕米耳之界公爭之
俄外部始已又議定界執舊議以烏什別里山爲界從
此而南屬中國從此而西南屬俄國俄人則欲以薩雷
闊勒爲界相持三載公堅執不撓俄外部乃爲調停之
說帕界未定以前兩國各不得進兵以保和好雖界議
猶懸而俄害稍戢公之力也時公已由太僕寺少卿通
政司副使光祿寺卿迭遷至內閣學士擢工部右侍郎
蓋駐俄六載矣會我國與日本開戰及事定而俄德法
三國出而預謀使日人歸遼東於我人皆以爲喜公曰
俄人懷自便之謀德人挾責報之意自此以往事故滋

多矣疏言俄德兩大國交涉事繁宜分遣兩使二十二
年命公爲德國使臣未受代以前有鐵路公司之役俄
國悉畢里鐵路欲與海參歲接軌謀取道黑龍江吉林
朝議拒之因改爲商辦設立公司中國亦入股銀五百
萬乃又命公總辦黑龍江吉林鐵路公司公力阻其綫
南侵且與訂約稽查運料之船勿使漏稅而公司例支
之公費悉數咨存總署蓋錙銖弗受也二十三年至德
國甫數月而俄人租我旅順口命公以頭等欽差會同
駐俄使臣侍郎楊公就俄都定議六月事竣請假同籍
九月至京命在總理衙門行走兼署禮部右侍郎調吏
部左侍郎充大學堂總教習管學大臣當辦關內外鐵

路時意大利要索我三門灣公抗言駁之事乃寢外國
公使駐我京城率驕不可制自公入總署稍稍斂戢羣
公皆倚爲重然亦有忌且恃者無何而拳匪之禍起公
與袁忠節聯名入諫首禍諸臣深嫉之迨各國聯軍逼
近都門首禍者又倡言非殺主和大臣將何以戰公與
袁忠節遂同及於難天下冤之袁忠節浙江桐廬人由
戶部主事充總理各國事務衙門章京早年曾受業興
化劉融齋中允之門生平自謂得義理分數爲多又謂
義理之學首重力行故必先廣學識不然雖嚴氣正性
而無裨於事詞章以闡道義攷據以通經術義理以持
古今經變不可偏廢旣入宦途絕不廢學平時交際密

定師事兄事友事官戶部時初有土藥徵倍洋藥之議
公謂非計其議遂寢鄧鴻臚承修以言事被譴責公爲
上書閻文介以公義請其保全直臣爲敢言者勸公以
戶部兼總署者九年餘總署無成案可稽臨事每以學
識見重公於海疆邊塞攷核最詳故與議以防務界務
爲多光緒十八年簡放安徽徽寧池太廣道專意吏事
民事農桑學校次第興舉皆有成效而其實惠尤著者
莫如隄工一役蕪湖上游西南鄉圩十餘里枕江界湖
歲虞衝決自大關亭至魯港各隄尤爲瀕江保障公旣
頌手教敦督屬邑復捐發椿木飯食經費以資所亟躬
往部署修隄一千八百餘丈自關亭至魯港延袤十二

里悉臻完固辛丑之夏東南霍潦爲數十年未有奇災
沿江數省潰隄決堰警報交馳獨公捐廉所修築之隄
屹立無恙不惟圩民田廬得保他圩之避水者乘高避
窪依隄棲止全活不下六七千人僉曰生我者袁公也
膠州事起廟謨咨做公條陳時政綜論全局大略以時
勢所急先言治標詳論當日外交六強之形勢而言中
國之弱由於近代皆恃名法爲治以致文法繁多上下
忌諱隔閡今宜因時制宜不復拘牽常格乃可日起有
功條舉改制之事六官人之事九理財之事十練兵之
事四交鄰之事六陳之撫部據議入告上自題袁昶條
陳四字於冊公由是益簡在帝心矣奉命按察陝西未

行擢授江寧布政使尋調直隸復奉旨以三品京堂在
總理各國事務衙門行走補光祿寺卿轉補太常寺卿
條奏整頓釐金六事極言釐金爲用兵以來萬不得已
之舉明病商暗病民舉廉能之員九人疏上飭諸大臣
議行並諭各疆吏就所舉之員隨宜委任公著作繁富
無漢宋門戶之見嘗慕韓文公願亭林之爲學立韓顧
二齋每論近日士人之弊不知審取精要以立身濟世
致智者挾攷訂碎文以欺世愚者守科舉俗學以自做
故人才敗壞官無專能士鮮實用中夏所以弱於文弊
而四裔乘之故非變法不可讀書有得輒錄入日記公
餘自課爲劬學後生所不逮尤致力於實學會刊農桑

兵醫輿地邊防掌故治術諸書都四十種曰漸西村舍
叢刻光緒二十六年五月十九日公上慶親王請嚴懲
拳匪說帖先後疏陳邪教始末請責成重臣勦撫兼施
又草疏請保全使臣免攻使館又劾釀禍諸大臣凡三
稟皆傳布海內六月二十七日奏劾大臣之疏既具公
密謂家人曰今日言亦死不言亦死與其死於亂民之
手曷若死於司寇苟死而朝廷頓悟吾無憾矣家人環
泣公坦然曰吾以身許國無復他顧諄諄以忠義勗其
諸子蓋不待朝衣東市早辦一死矣十二月二十五日
詔雪諸大臣冤復其官於是海內爭頌天子明聖而益
交口稱三臣之忠伏思賢良之選史不絕書忠蹇之臣

代豈數見今三臣夷險一節出於同省同官平時履正奉公交相砥礪迨難至而節見又道合而志同曲突徙薪發言相應疾風勁草偕死如歸酬國家覆幬之恩壯吳越山川之色此其特絕者一也自漢以後黨禍之興忠良被害每遲之久而後是非乃明若夫歲未一周沈寃立白昭雪之速爲前代所稀聞仰見先朝日月之明何幽不燭慰忠魂於地下動哀感於羣倫屈於一時伸於千載此其特絕者二也康熙五年鼇拜矯旨枉殺尙書蘇襄愍總督朱勤愍巡撫王愨愍八年賜諡并膺祀典今我皇上沖齡御宇上符聖祖表忠旌直先後同揆此其特絕者三也綜此三端足光簡冊宋歐陽文忠有

言人臣之能盡忠者不敢避難言之事又曰士不忘身
不爲忠如三臣之危身奉上誠無忝於忠蹇之褒某等
歌詠深仁景仰遺烈竊謂旣荷易名之盛典宜預祀事
於明禋擬請據情轉奏懇恩敕在浙江省城建立三忠
祠以資鄉里矜式上昭主聖臣直之燬下示成仁取義
之型實於維持世教模範後來至有關係焉

男蔭泰敬校字

志盒文稿卷三

王式通 書衡

家傳 墓碑 墓表

舅氏施公暨配于夫人家傳

公姓施氏諱振瀛字曼仙浙江會稽人今縣名紹興世居縣之澤樂水曾祖諱元龍字冠三萬里尋親以孝子旌事具縣志祖諱雲梯字步青官淮徐海河務兵備道父諱燕辰字夢玉道光庚子順天舉人工詩詞精鑒藏文采動一時著有紅豆秋居詩彙以中書出爲江蘇知縣宰震澤有惠政參蘇完瓜爾佳公勝保索佳公烏蘭泰戎幕薦擢道員母陳太夫人亦工詩聞秀續正始集

載焉有子三公居次幼習庭聞凝重異常童嘗從姑父
馬平王定甫通政學詩從婁縣郭友松先生治經發爲
文辭粲茂條達同治乙丑丁夢玉公憂喪葬事畢奉母
里居以家貧恆客江淮間受知於南皮張文達公有國
士之日後以饑曹官兩淮洞知利病歷年轉餉燕晉秦
隴雖躬歷艱險而志氣益壯光緒戊子陳太夫人棄養
服闋改官江蘇知縣榷稅司識並著茂績宣統庚戌江
北甯公方知揚子縣事殫力振濟活人千萬辛亥參江
北提督幕多所規畫董理清江豐濟倉手定規制垂諸
永遠會十三協兵變公持以鎮定集民團緝餘孽衆賴
以安燹餘苦饑迺開倉平糶民困大紓蓋公履官四十

年勤訊民瘼心力耗盡至是亦頽然老矣是冬共和詔下遂絕意仕進不言時事自營生壙於揚州西山之麓卒於己巳十二月春秋八十有五配于夫人爲金壇文襄公三世女孫禹青廣文第三女母黃太夫人通經史富著作夫人秉母教亦好文史並嫺繪事光緒壬申歸公逮事陳大夫人以孝聞江北之留佐公籌振罄私資以助辛亥後與公偕隱有陶翟之風焉先公七年卒於壬戌十二月春秋七十有一與公合葬揚州西山蓮華塘之阡子一肇夔自五歲受書至十一歲皆自課讀肄業滬江大學北洋大學畢業美國華盛頓大學法學碩士考取外交官補外交部僉事女二長適光緒乙未進

士郵傳部郎中長沙章華先逝次適美國芝加哥大學
法學博士馬景行孫一濟民

贊曰幼時我父母恆舉公言論以爲教公亦垂愛式通
期望甚切五十以後痛失怙恃能話舊事者止有公耳
今公奄化後將誰語公性儉約無世俗聲色之好讀書
務窮其精義作字雖家書必端楷至老不易持身接物
豈出於誠故於標榜之習矯飾之爲皆所心薄平生陰
德惟恐人知人亦莫能知之觀於後嗣之昌其行事已
足徵矣

昭武上將軍姜公碑文

有清道咸間寇起於粵踰嶺涉湘沂洞庭沿江東下踞

江寧分兵北犯羣捻應之豫居燕齊秦晉吳楚之中兵法所謂衝地羣寇出沒自雍而東延於宛洛自皖而西震於淮汝兵燹饑絕較諸道爲獨甚張勤果宋忠勤精選武騎以備追逐豫軍之名聞天下與湘淮埒其舊部之有所建立者後先相望而始衛鄉里游任折衝定亂中原輝威關隴享年耄耋流澤子孫環顧當世莫毫縣姜公若公諱桂題字翰卿生亳之姜家屯聚族而居世有潛德公幼失怙形體魁碩深沈有度旣壯遭亂憤豪強肆橫官不能治乃謀諸族人選勇士迎王師以捍里閭時僧忠親王行師齊魯自詣陳辭王壯其志命領紅衣百人爲衛匪踞黃雙寨久攻不下王令於衆曰有能

克寨者膺上賞公以百人往嚮晨銜枚疾走身先士卒
踰壕登陴羣呼殺賊賊驚自相擾遂克寨王嘉其功以
五百人屬之同治初年擒首張洛行糾衆十餘萬與粵
匪合將犯畿輔公識洛行之戚李世英昭以重金中夜
設伏約洛行飲於世英寨酒半伏起繫以獻王遂斬以
徇三年王命公隸陳國瑞麾下國瑞善戰而驕性好嫖
罵獨於公始終優禮公見其馭下寡恩知必敗遂引去
臨行貽書規勸未幾兵潰悉如公言宋忠勤雅重公以
禮招之乃入毅軍擒首張總愚與粵匪餘孽賴汶洸分
爲東西捻荼毒諸省公隨忠勤轉戰數千里迭克名城
巨寨匪亂遂平後隨忠勤西征逆回大小數百戰攻肅

州時公右腋中槍血溢脛衣猶裹創力戰率衆登城不知痛楚公於是役保提督換清字勇號年甫二十七也光緒初統軍南陽擒匪首王虎豹子四境晏然公既拜瓊州鎮總兵之命李文忠仍疏請留營項城袁公招入新建陸軍公統左翼第一軍兼全軍翼長後改武衛右軍屬榮文忠爲北洋五大軍之一袁公巡撫山東公駐軍泰安青州濰縣肅紀律治奸宄受其賜者久而益思庚子之變公統兵入衛道經博野適樂字營統領呂道生爲拳匪所圍公先以理喻匪不省遂督兵攻之博圍以解越歲被命入都與各國公使兵官相見以誠咸敬憚之嗣典宿衛營精勤靡懈入民國後嘗分兵剿豫匪

白狼草薙禽獮斬馘略盡初任熱河都統值蒙匪擾邊
擊斃匪酋巴布札布餘黨悉平尋以老病乞歸調任陸
軍檢閱使管理將軍府事務辛酉十二月攫疾薨於京
師春秋七十有九其明年某月葬某所公老於行間垂
六十載歷官專閫事具國史屬陽九之會傷大星之沈
表厥平生以式來者銘曰

忠勤人傑治兵於梁豫軍特起虎闢龍驤公隸部曲聿
整戎行禽渠掃穴羣寇走僵且張網合遂繫天狼以克
酒泉軍容有洗以成碣石萬夫之望功成不伐歆然若
忘豐碑紀績休有烈光家聲弗替尙父鷹揚

崞縣徐先生墓碑

昔河津薛文清之教以復性爲宗其所著讀書錄有云
性非特具於心者爲是凡耳目口鼻手足動靜之理皆
是也非特耳目口鼻手足動靜之理爲是凡天地萬物
之理皆是也故曰天下無性外之物而性無不在卒年
七十有六遺詩云七十六年無一事此心始覺性天通
數百年來爲晉人所師法其鄉之賢者往往主靜慎動
心體浩然兢兢於言行間而接物應世各得其宜非才
智之士所能及如崞縣休先生者殆其人與先生諱慶
字某世居崞之巖溝村曾祖滿庫祖榮父萬盛俱孝弟
力田潛德不曜先生幼敦厚耆讀書尤好左氏穀梁氏
家言平生行事每合其義後以家寒歲儉遂廢耕讀商

於大同非其志也與人交無人已之見聞直言輒改容
謝之而稱道其人不去口親之逾衆子永昌生有英姿
見者皆目爲大器先生期望綦切訓以立身之道曰誠
曰信曰義務主實踐又訓以處世之方曰有恆昔曾湘
鄉有言人必有卓立之志方能有成或作或輟不濟事
周程張朱志氣規模終身堅確不撓所以成大儒治軍
亦然必堅忍不拔乃能立節立功先生以斯爲勗猶湘
鄉意也永昌默識不忘故自早歲從戎以至今日境有
險夷而終持一仁民去殺之心莫之或易以愛其鄉以
顯其親推原本始蓋灑瀆於先生義方之訓焉先生卒
於清光緒二十六年十月春秋五十有八配趙夫人以

淑行聞戚郇先卒繼配張夫人食貧茹苦時以女紅助家計卒於清光緒二十六年六月生子二吉昌永昌吉昌早世永昌歷官綏遠省政府主席河北省政府主席山西省政府主席女二長適胡次殤孫二元章元德元章幼殤孫女一元明是年十月葬於大同南關外興國寺側趙夫人張夫人祔焉永昌幼失怙恃自傷於先生嘉言懿行未能悉詒述兒時所習聞者乞爲刻石之文以垂久遠爰書大端系之以銘銘曰

嶢嶢石門峨峨夏屋唐魏風存含真蘊璞中有伊人上德若谷老日守中莊稱緣督隱市以終不殆不辱道在獨善志激澆俗身約報豐酬諸似續手澤流連髫齡卓

準取印提戈建牙擁燾天發殺機龍蛇起陸縱覽中原
羣雄角逐運用從心輕重舉足艸木銷驚桑梓蒙福尋
繹庭聞厓胎家學父矩子孳遺言諄復祿養未伸音容
已邈穆行沈淪孝思純篤迫遠銜哀闡幽虔屬晉乘有
光郭碑無惡以告千秋章茲高躅

武寧李君原配王夫人墓表

夫人姓王氏諱祐存江西鄱陽人爲編修廣西左江道
贈太僕寺卿諱達材之女孫舉人諱慶韶之長女年十
八歸武寧李碩遠國珍癸亥冬十月歿於京師年三十
有八甲子夏將歸葬於南昌羅家塘碩祐寄廬之園碩
遠乞表其墓余諗知懿行未可忍辭夫人誕秀結璘流

聰翦鬢媿媿問字宛宛受書親愛獨鍾相攸矜慎逮歸
隴西僉稱賢婦尤得君姑汪太夫人之歡君舅振威公
薨於湖口節署碩遠哀毀滅性舉止失常夫人將護至
廬範之以禮形神瘳瘳曾不自知厥後碩遠游學日本
六更歲序循陔中關陟屺興懷夫人定省晨昏躬代子
職檢飭閨闈提攜童稚弗稍暇逸用慰旅人負笈有需
斥飾以濟凡茲深識歸善威姑薄徐淑寄外之書厲樂
羊成名之志求野專勤實資內助辛亥以還碩遠有聲
議院連犖敢言夫人曉皦陰憂從容規諷明智咸謨鏘
洋都下甲寅仲春碩遠采風泰西夫人請與偕行自西
伯利亞鐵路閱旬日抵柏林鳳麟爭識鵜鰈相依鉛槧

隨身諷籀答響佉盧文字自爲師友異邦士女望若神
僊碩遠恆謂結褵以來是游最樂嗣以歐洲久戰一載
歸國丙辰丁巳京師多故舉事者雅重碩遠輒相牽挽
夫人策其無成勸以引去海濱避地鶴警鴻冥斯則蒙
山投畚之蹤吳下賃廡之志也綜其平生令淑靡罄相
夫以義此爲尤著夫人秉質清弱遭世艱屯忻戚萬遷
纏緜寸肌伉儷之愛天屬之親縛果交乘思慮千百網
繆姑壽料量兒昏美疢促之皆不及待彌留間有遺憾
焉屬續之日戚儻嗟歎汪太夫人自南昌寄家書云不
能見媳望其歸櫬撫之一哭致此痛語孝可思己子二
晉芳沛芳女一又芳並念恩勤哀號思慕碩遠爲文以

祭至于餘言往復流連辭情悽楚義寧陳吏部三立銘
其墓曰豈琴瑟之靜好亦憎命於鬼神語淺意深誦者
傷之修短數定歸諸宿因夫婦道苦取足風世爰舉其
概表之於壟

墓誌銘

會稽施貞女壙誌銘

貞女施氏諱秀成浙之會稽人吾友星衛部郎次女也
英淑之鍾徵諸在葆禮儀之合鑑於受書妣張宜人歿
時女甫十一齡柴毀骨立有過成人事繼母王宜人甚
謹宜人亦恐憐之大母陳太淑人年躋日耄喜弄諸孫
女則慎其扶持博其色笑顏餽觴舉愉愉如也會有舊

姻某齒長於女陰萌求昏意如飲狂藥戲作密函假手
嬰孺俾達於女焉玉映中閨夙嚴避面波生片楮遽自
通辭迹其險詖幾儕強暴女見書大恚亟白諸母時部
郎方壹意箸述王宜人慮擾覃思未敢驟告爰命臧獲
示某懲誡女以志雖皦然災同无妄扇揮閣下惡蠅集
之何來弓見杯中疑蛇影而成疾張目疇助憤氣填膺
甫逾浹旬遽嗟奄化縣愒之際睫淚汎瀾若有深憾者
部郎異之及逝窮詰其事呼晷無極嗚呼鑄紫石之字
白傳慰情哀金鹿之亡安仁增悼忻戚俄遷誰能堪此
矧茲凋殞足激風霜宜其悲已論者謂女虎口之罹匪
同蹈刃厖吠之使未近鳴環既無拾塵之嫌復異掇蜂

之戾有如白日共鑒其心竟及黃泉微傷於激嫉邪誠
是捐軀似愚不知薑桂之性詎以老而始粹梅檀之香
必待熟而可聞下堂守禮逮火如飴漸臺埃符矢死靡
悔過人之行君子所嘉竭命之故不齊介立之操若一
豈可因斯天闕議其福衷夫清白守節不隱無屈曰貞
湘東褒德會入轎軒之甄采朱育善對庶補典錄之嘉
名女生於光緒七年正月十四日卒於二十二年四月
十一日年止十六部郎將於孟冬葬女吳縣三都十一
圖堯峯山麓麗字圩之阡祔原配張宜人塋次先期以
銘幽之文見屬嗚呼平湖儷潔齊朱家少女之齡杜氏
流芬豨東易真僊之骨敬告史氏視此貞珉銘曰

北宮嬰兒摯性胡忝西道龍憐片言無玷女貞之木優
曇之花綿芳遐禩現影刹那感悅誦詩投梭持禮怒盛
敗肝病革雪涕輕生傷孝苛論勿捐義重熊掌死豈鴻
毛孱稚端嚴懦夫沮沮游魂吳趨延輝越紐澤蘭早世
蕃草空山陵谷有變元石不刊

吳興沈公墓誌銘

清之季年有以耆年碩德治法家言名於時當變法之
初能融合古今中外之律使定於一而推行無礙蔚爲
一代不刊之盛典則今海內所推仰吳興沈公者是也
公諱家本字子惇祖諱鏡源舉人慶元縣學教諭妣卜
氏宗氏李氏父諱麟書妣某氏本生父諱丙瑩進士刑

部郎中貴州安順府知府妣俞氏安順公以忤時解官歸公才弱冠卽援例以郎中分刑部公之學律自是始中本省同治四年補行辛酉壬戌科舉人歷充直隸陝西司主稿時吳縣潘文勤爲尙書公嘗爲同舍郎某擬稿進文勤詫其不類平日所爲詰之某以實對文勤歎曰吾固知非沈君不辦公之以律鳴於時又自是始光緒九年癸未科成進士充奉天司正主稿兼秋審處坐辦律例館幫辦提調協理提調管理提調在部十年無日不以纂述爲事十九年簡放天津府知府津俗故剽悍喜械鬪前守持之嚴風少斂公履任以寬大爲治羣不逞之徒以爲可欺也聚百人鬪於市公擒其魁四人

戮之無敢復犯者望海樓者法蘭西教堂也以庚申毀於火至是重建成津人感念前釁訛言繁興又適有偵獲誘賣孩童人犯事舊律非迷藥不處死刑公曰是豈可以常例論乎竟置之法而民大安於是又知公之用律能與時爲變通也大吏才公調保定府知府保定北關外有某國教堂甘軍過境毀之公聞變卽偕清苑縣令馳往多方撫慰教士感公誠但乞城中一地易之而當路懾於外人之勢遽派員查辦於是教士亦電告其留京主教百端要索勢張甚卒償金五萬兩且與以清河道舊署猶不可以郡廨東偏爲道署舊址應劃歸教堂爲辭將許之矣公獨持府志斷斷爭辨教士始無言

而退於是又知公於外交能守正不阿如此拳匪之變
萌於山東蔓延於畿輔民初有私習者公輒偵得其首
要重懲之俄而朝貴多爲所惑卒不可遏保定密邇京
師故受禍尤烈英美教堂相繼被毀公時已升通永道
擢山西按察使未及行兩宮西狩聯軍入保定大肆搜
索某教士銜公前爭郡廨之隙也則誣公附和拳匪百
計中傷之卒無左驗公遂馳赴西安行在被命以三四
品京堂用授光祿寺卿升刑部右侍郎遷左侍郎自嘉
道以來各國互市開拓及於內地傳教訂諸約章民教
齟齬日遠而益多方其起釁之初大抵薄物細故州縣
吏率不解各國法律往往坐失機會釀成巨案而莫可

收束而中外用律輕重懸殊民益不能堪惡官長之薄
視己也則皆遷怒於外人庚子之變萬口同聲者此其
癥結之所在耳公嘗私憂以謂欲使民教相安當令官
吏普知法律然中律不變而欲收回領事審判權亦終
不可得會二十七年兩宮回鑾變法議起今大總統袁
公薦於朝設修訂法律館命公與伍公廷芳總其事公
於是先譯東西各國現行法每一卷成必考其沿革審
其輕重三復而後已又請先廢凌遲梟首戮屍及緣坐
刺字等刑又別設法律學堂畢業者近千一人一時稱盛
補大理正卿旋改法部右侍郎仍兼修律事三十三年
專充修訂法律大臣宣統二年兼資政院副總裁仍日

與館員商訂諸法草案先後告成未嘗以事繁自解蓋
公生平之學之志至是乃大發摠矣公雖終其身於法
律之學然於他書無所不讀其所自著已刊者刺字集
二卷歷代刑官攷二卷寄移文存八卷又二編二卷未
刊者歷代刑法攷三十八卷漢律摠遺二十二卷明大
誥峻令攷一卷明律目箋三卷律例偶箋三卷駁稿彙
存一卷雪堂公牘一卷奏讞彙存一卷歷綫編一卷學
斷錄一卷文字獄一卷刑案匯覽三編一百卷讀律校
勘記五卷秋讞須知十卷日南讀書記十八卷說文引
經異同二十五卷又附錄一卷史記瑣言三卷漢書瑣
言六卷後漢書瑣言三卷續漢書志瑣言一卷三國志

項言四卷三國志校勘記七卷漢書侯國郡縣表一卷
李善文選注引書目六卷古今官名異同攷一卷枕碧
樓偶存稿八卷日南隨筆八卷枕碧樓詩稿六卷古書
目三編共八卷又有周官書名攷古一卷借書記一卷
奇姓彙編一卷金井雜誌一卷寄篋文存三編一卷皆
未成書其零篇斷楮有待彙集者尙盈篋也非所謂博
學多識者耶宣統三年十二月共和詔下乃引疾不出
以民國二年六月九日薨於京師距生於道光庚子年
七月二十二日年七十有四原聘鄭氏未娶殉髮匪之
難繼配陳氏先公卒子四長承煥分省鹽大使先卒次
承熙舉人內務部僉事出嗣公兄子佳公次承烈附生

英國留學畢業財政部僉事次承煌司法部主事出嗣
公弟子祥公女二長適教育部總長汪大燮次適前度
支部員外郎徐士鍾孫四仁垓仁堪仁培仁堅女孫二
將以三年四月二十一日葬於渡善橋之原式通嘗從
公問律受知最深曷敢不銘銘曰

五刑之屬厥有三千仍世損益大體不愆瀛海旣通遠
人來萃主客互淆如蝸如沸窮則必變窒則思通誰其
尸之翼翼沈公首除殘酷與民更始仁風扇和吉祥止
止孰是孰非何去何從較及毫釐借之大同亦有譏排
徇時蔑古浩然不顧羣疑消阻公學大成匪惟明刑掩
彼衆藝培茲盛名公功在世論久益定刻辭貞石以訊

陸軍中將徐君墓誌銘

君諱世良字瓜農直隸天津縣人其先於明季自浙之
鄞縣遷京師康熙間始入津籍曾祖諱廉鈞道光丙申
進士湖南卽用知縣署晃州直隸廳通判祖諱思穆河
南開封府中河通判父諱嘉猷河南寧陵縣知縣寧陵
公始娶於朱生世杰未婚而殤繼娶於李生君之先有
餽瓜者因以爲字君與今大總統爲從兄弟六歲而孤
依以教養凡廿八年國器初成神鋒遽掩骨月之戚匪
止其私授簡述情可徵行誼君就傅髫齡讀書不輟彊
記善問異於常童畢十三經識其大義兵制將略若有

深契先世膚功公諱學洙於康熙朝官臺灣協副將加左都督通曉經術捍衛海疆奇績爛然閩稱儒將君思繼舊勳遂入保定陸軍軍官學堂每值休息歸與家人述所肄習皆有定程嘗操行軍隊荷槍負裝往返卅里列伍整暇勞不自知體實智增日精戎事丙午畢業次年授協軍校充陸軍鎮兵者三閱月尋以文職薦升道員晉二品銜入民國後改陸軍步兵中校洊擢中將充模範團副官直隸第一區警備隊幫統參第一軍總司令部暨湖南督軍軍事綜所資歷並著英聲戮力神州恆自策厲假以歲月盛烈可期積瘁內傷猝中風疾以戊午年十一月四日卒於京邸春秋三十有三原配袁

氏繼配烏拉德氏妾姜氏子一緒至姜氏出女三烏拉
德氏出已未四月歸葬於汲縣唐岡之原距民國之立
蓋八年矣放恣橫議曾無已時人不樂生哀茲艱厄小
康無望違言大同施濟之功堯舜猶病逝者一瞑寧獨
安然是用勒石銘幽志厥遺恨其辭曰

東海分系鄧邑流徽北遷累葉著籍王畿中有魁碩作
督建威三世循吏列傳所稀君居雁行陸歐是儼齒弱
肩隨導以文史綈裘流連投筆奮起短後躬衣健兒爭
視學優仕進武達文通虎鈴剛練燕領驍雄振振均服
暨暨戎容折衝三輔籌策湘中剝復相循選與方慶人
作頌聲君遘暴病其生有涯此才未竟遵邈雅訶淵悲

短命玉棺今掩金版昔紉樓彫花萼墓冷松楸人間萬
劫地下百憂靈旂宛在幽隧長留

沈母趙夫人墓誌銘

夫人杭縣趙氏諱懿曾字蘅宜其先衢州人宋殿中侍
御史抃之後也移蘭溪又移餘杭明代始占今籍世多
達人曾祖佑清都察院左都御史祖日煦江西臨江府
知府父錦四川崇慶州知州夫人年二十四歸吳興沈
君秉恆沈君嘗入貲得同知而才高不仕佐其仲兄中
丞公秉成治事江南道署以幹練聞擢疾蚤世仲兄以
其次子鳳侄嗣亦殤夫人與七歲孤女熒熒相依女長
而明慧矢以不字侍母二十四病歿與夫人奉嬪之歲

蓋適相符也是可哀已夫人性篤孝讀書明智見史傳所載節義事輒心慕之在室遭親喪摧毀已甚及歸沈舅姑不逮事矣事所生姑於其喪也哭之幾失明沈君始嘗病困夫人隱毀膚體和藥以進疾頓起越歲疾又作療之如前迄不效然夫人創劇幾殆自沈君卒夫人時治佛書齋居閔憂屏華衣美食不御其室廬間整潔特甚服勤以蒞事躬儉而行仁待內外族親胥中禮法視兄子延澄尤有恩紀清旌節孝以姪瑞琳貴贈封夫人民國六年丁巳七月二十三日年七十有一卒於蘇州嗣孫祖衛卜以九年庚申十一月初七日葬杭縣牛山之阡沈君葬久啟祔不宜夫人遺命異葬先期祖衛

以狀請銘銘曰

嶽嶽清獻子姓蒙祉流澤中閨女行邁士作儷鼎門執節沒齒履霜踐冰以光彤史人所難能毀體起死倫紀翊扶不傾不弛德象備嫻表厥殊美瘞銘新宮昭示無已

直隸提督渦陽馬忠武公墓誌銘

公諱玉崑字景山安徽渦陽縣人曾祖天爵祖臨川父貫一皆贈如公官曾祖妣氏葛祖妣氏劉妣氏劉皆贈一品夫人公少負異秉體貌魁岸咸豐初捻酋張洛行肆擾隨父練團以衛鄉里同治三年入毅軍隸宋忠勤部從勦豫境捻匪克遂平仁山寨擢千總賞藍翎此爲

公立功之始張總愚竄秦晉任柱賴汶洸掠魯豫公從忠勤馳驅追逐轉戰數千里鄧州之役張任合力圍忠勤寇勢甚張公奮擊解圍鉅野之役任柱中彈死總愚之姪武亥潛自淮路口擁衆竄出復陣斃之濟陽之戰厯數晝夜斃賊無算降其馬步隊三千餘總愚大創積功保總兵換花翎賞振勇巴圖魯勇號自守備至專閫蓋未逾一年也捻匪旣平隨忠勤西勦回匪所向皆捷會師寧夏掃穴禽渠公以辦理全軍營務處論功加提督銜旋晉提督賞換博奇巴圖魯清字勇號將軍金忠介檄調出關先後克烏魯木齊克昌吉克瑪納斯暨滿漢諸城賞穿黃馬褂給雲騎尉世職駐西域前後凡十

六年天山南北望若神人收復名城以十數軍事粗定
力行屯墾光緒十六年乞假歸省次年李文忠奏調至
北洋隨辦營務忠勤時督師駐旅順令統毅後軍尋補
太原鎮總兵會有平壤之役公以四營臨前敵紀律嚴
明爲諸軍所不及朝鮮士民壺漿迎道左厥後戰於田
莊台戰於感王寨皆以偏師千數百人對強敵數萬俘
馘甚衆中日和議成仍隨忠勤駐兵旅順及移師營口
又駐山海關誅票匪田大成代理武衛左軍會辦左軍
授浙江提督調直隸二十六年拳匪之亂忠勤與公統
兵入衛扈蹕西巡忠勤留辦晉防公念忠勤年老不忍
舍去因遂留晉旋以隨扈功加太子少保銜賞紫禁城

騎馬西苑門內騎馬二十九年日俄失和中國守局外
公被命率所部自通州出關沿邊千餘里置兵列戍駐
節平泉居中調度折衝禦侮屹然長城三十三年撤防
展覲予假回籍省墓准其馳驛假滿回營感恩盡瘁有
疾不肯乞休沐三十四年八月十九日薨於位春秋七
十有一公平生喜讀孟子輒有心得躬行實踐見諸事
功溯自束髮從戎身經百戰殺敵致果有古名將風而
治熱河民變力主寬宥教案索償爲民請命親親仁民
固壹本子與氏之愔焉配王夫人事姑盡孝公在行間
婦代子職遂得安心報國公旣貴凡贍族興學拯災利
濟之舉夫人皆助成之卒於某年春秋八十有一子某

奉公與夫人柩合葬於某所先期以狀乞銘史傳具在
營壘蚤蕪感舊流連爰爲銘曰

豫軍將帥功赫赫公師忠勤光簡冊九邊燁威施蠻貊
七篇言仁守鄒嶧神游山桑何所適同穴於斯悅魂魄
子姓蟬嫣福曼碩

清故資政大夫署理廣東提學使于君墓誌銘

君諱齊慶字安甫號海颿一號穗平江蘇江都縣人曾
祖諱濂祖諱暹春父諱振騏皆以君貴贈資政大夫曾
祖妣氏張氏朱氏尤氏袁祖妣氏蕭妣氏兩氏王皆贈夫
人君卒之次年其孤寶第以狀來乞銘余與君相知既
久尤諗其行誼不敢辭君幼負異資敏讀強記同治癸

酉入縣學是秋舉於鄉光緒丙戌成進士改庶吉士散館授編修甲午大考翰詹列二等君自授館職志在經世中日事起多所建議庚子之亂君居京師與同輩以忠節相砥礪寄辭諷諭惓惓君國辛丑以後數被密薦累擢右春坊右中允翰林院侍講充日講起居注官國史館協修纂修功臣館纂修壬寅充編書處幫提調乙巳充政務處幫總辦嗣充總辦加二品銜記名繁缺道簡授江西臨江府知府未至任旋以道員署理廣東提學使君銳志興學籌資以濟首擴教忠學堂畢立闔省小學教育生徒不遺一鄉遇出洋學生必勸以無忘國學嗣攝廣東按察使平反冤獄輿論稱之以憂去官里

居讀禮服闋後鍵戶湛冥不知理亂君素劬學手不釋卷於文章義法稽鏡精嚴嘗充辛卯乙未及壬寅年補行庚子辛丑等科鄉會試同考官得士稱盛癸卯典試河南甄錄策論務覘根柢一變勦襲摭拾之習著有求放心齋文集小尋暢樓詩草配李氏以君官封夫人子二長寶鑑早卒次寶第京師高等師範學校畢業生女一適泰州王培崧君病篤女刲臂肉以進未咽而目瞑矣卒於民國八年十二月十日春秋六十有四寶第將以明年某月葬君某所君爲學當官不自表襮原本忠孝出處皎然睠念平生流連愾歎爰爲之銘銘曰
淮南論學王阮開先通儒輩出吉士蟬嫣君生其鄉選

樓馳翰弟二登科姚聲虎觀杜陵忠愛天寶亂離哀時
有作庚子秋詞君事重親油然天性不出戶庭里稱孝
行一官過嶺六藝培材頌聲洋溢銜恤歸來素鞵方終
黃冠實始夢寐朝天魂魄入地未竟其用必大其門幽
宮永闕貞石長存

吏部文選司主事傅君墓誌銘

光緒辛卯北闈余出錢塘陳編修昌紳之門知同門傅
君有異才逾七年戊戌與君弟增湘爲同歲生又逾十
年宣統己酉驚聞君疾歿於天津甲子六月其孤德謨
將奉柩歸葬於邑北來龍鄉方碑之原先期請銘諱不
得辭君諱增濬字仲宣號學淵四川江安人曾祖登奎

祖誠父世榕直隸懷安知縣懷安公三子長增涪貴州
學政季增湘直隸提學使君其次也辛卯順天舉人甲
辰進士吏部文選司主事丁未調郵傳部未補官以弟
貴馳封資政大夫娶健爲寧氏丁未年卒馳封夫人君
弱齡劬學文似周秦諸子治經宗江戴邃於聲韻故訓
通輿地疇人之學校綴羣籍精析豪芒默好湛思不輕
議論或就析疑則反復申喻必盡其理桐城吳摯甫先
生主講保定學古堂君從游旣久得其家法著南宋論
三篇斥朝士空談之誤國蓋感事而發也又辨牛李爭
維州是非伸溫公之議設爲四難於唐代吐蕃形勢不
啻躬歷最爲吳先生所激賞謂文得陽剛之美及官吏

部選司治事精嚴嗣調郵傳部部初立官書叢雜君專
理之秩如瞭如會朝議改園法君主用兩乃發十策以
難用園者南皮張文襄方在樞廷與同列見而奇之亟
馳書欲見君而君病矣歿年三十八君性不諧俗獨喜
游佳山水歷二川二湘黔中之勝登太岱泛明湖南陟
金陵京口諸山旣官京師西山翠微潭柘諸寺歲恆數
至更東入田盤西出釜山尋覽古迹流連成詠有超然
遺世之志焉身後遺孤俱幼賴弟教誨婚嫁子二嘉謨
殤德謨天津南開學校畢業生克自樹立女二皆天津
女子師範學校畢業生長適阜寧水崇遜次適新民王
家瑞並有賢聲孫紹堂亦能讀矣君具致遠之資終於

郎署以身殉學士類所悲而猶幸其蚤逝三稔未覩世
變也迺爲銘曰
朔方釋地糾誤前賢藏園聚書仲氏開先思窮倚杵竟
天天年神理不滅遺澤簡編以縣蜀學名美光宣歷千
百載永奠九泉

清故資政大夫記名道徽州府知府王公墓誌銘
公姓王氏諱振聲字劭農順天通州人曾祖士欽祖漢
並贈中議大夫父立藻封資政大夫祖父皆州志有傳
曾祖妣氏方祖妣氏于並贈淑人妣氏高封夫人公蚤
慧州試第二府試第一院試第三中同治元年舉人十
三年成進士授工部主事歷官員外郎中江西道監察

御史署江南福建道監察御史掌河南陝西道監察御史工科給事中署刑科給事中加三品銜賞花翎京察一等出爲安徽徽州府知府改道員告歸公孝友禮讓出於天性家居時同堂兄弟有析產之爭盡舉以畀自甘貧薄癸巳河決州災倡行義振庚子亂後采訪州人死事姓名爲請旌卹乞減畿輔教案民間償款俱造福於鄉之著者官工部廿餘年熟知故事見利不趨癸卯分校禮闈得士稱盛入諫垣先後疏陳皆政體學術惠民整武之大典郡年餘凡設校疏河裕食治盜諸政次第畢舉輿誦方興而公已稱疾引去旣歸顏所居曰澹靜草廬自號遜叟辛亥國變復號心清老人己未重游

泮水辛酉年登八十以次年壬戌重逢鄉舉得御書扁額之賜作詩紀恩都下傳誦歿於壬戌十二月春秋八十有一配郝氏封夫人系出三河賢孝善教與公協趣嘗病女學不修自設家塾以課其族晚歲皈心法乘歿於癸丑正月春秋七十有八祔葬州城西北五里橋邨南阡祖墓之昭子金綬附貢生大理院都典簿保送知府曾綬光緒二十三年舉人湖南勸業道恩綬附貢生禮部司務奎綬附貢生陸軍部主事分省知府孫寶樞民政部小京官寶齋寶成寶琛寶安寶乾寶毅甲子某月金綬等將奉公柩與郝夫人合窆先期請銘誼不得辭公自通籍以至歸田冲夷澹定清修雪白而不居廉

介之名博涉經史三絕成家而不蹈標榜之習黃冠野服湛冥以終而不鳴遺逸之高此上德之極軌常人所難能也乃爲銘曰

萬物皆流金石止行已畢生在有恥方寸靈臺淨塵滓了了死生證如是百年同穴自今始積善燾後委餘祉勒石幽宮永不圯

清故資政大夫直隸懷安縣知縣江安傅公墓誌

銘

公姓傅氏諱世榕字申甫四川江安人曾祖鳳齡祖登奎父誠河北通判並贈資政大夫曾祖妣周氏祖妣李氏妣陳氏並贈夫人公生而敦厚稍長從新城陳廣敷

受學不屑治舉業博覽羣籍所詣日邃同治甲子公父
勵生府君宦游江南公餘輒蒐集書籍謂子孫必有好
此而成名者公省親江寧時湘鄉曾文正督兩江羣才
畢萃公與莫邵亭黎蕙齋李香巖廖養泉游以學問經
濟相砥礪自謂一生學業得力於此後勵生府君爲左
文襄檄赴甘肅行營綜理軍糈公復侍親中衛嗣遊江
浙歷爲奉化無錫海州牧令幕客究心民隱周知利病
光緒庚辰省覲天津值建德周懋慎任津海關道延公
相佐規畫精審廉潔自持閱二十餘年如一日辛卯以
知縣需次直隸充蠶桑局提調銳志興利尋調練餉局
庚子拳匪亂作官吏四散公獨留局監守事亟乃抱所

簡料簿籍道大名轉魯豫歸於所司庫帑數十萬不少
損後謁李文忠於京師有二十萬金不得主名者公爲
一一指晰文忠歎異壬寅補懷安縣知縣莅任一年調
署橐城越二年復任懷安其治懷安凡興學校行警察
設戒烟局皆捐俸倡之故事舉而民不擾藝桑數十萬
株數年後民迺知有蠶絲之利其治橐城息訟弭盜士
庶化服戊申冬以叔子增湘任直隸提學使遂引退就
養津署公襟懷澹定故雅好山水書畫出於天性十四
歲游峩眉陟金頂窺佛光覽瓦屋雪山之奇後住嘉定
五峰書院日對凌雲烏尤諸山時有會心嘗肄習武術
又習堪輿家言泊馳驅關隴所經山河阨塞中北幹形

勢之布濩停結皆能證其所學年將七十猶扶杖入嵩
山觀東漢諸陵登岱嶽攬居庸謁明陵與周慤慎爲浙
西之游少研六法昕夕靡間中年交畫師顧君若波觀
摩契合日撫宋元真蹟畫學因之大進曾游海州雲臺
山見老松蟠屈奇縱大蔭數畝卽涉筆對松寫之顧謂
生氣遠出筆墨盡化雲煙今藏蟠龍丈人卷卽其本也
辛亥以還不問世事讀書譚藝兼涉釋典叔子於都下
葺藏園奉公以居具花木亭榭之勝春秋佳日招邀耆
舊時爲文讌暘台翠微往恆信宿比年孫曾男女有二
十餘人環侍杖履公顧而樂之因里居近怡樂鎮遂自
號怡樂老人歿於甲子十二月癸卯春秋八十有四配

劉氏封夫人毓德名宗孝慈謙約相夫教子禮法咸備
歿於癸丑三月丙戌春秋七十有一妾吳氏貤封宜人
子五長增涓光緒壬辰進士翰林院編修貴州學政山
東道員公歿後九閱月以毀卒增濬光緒甲辰進士吏
部文選司主事先公卒增湘光緒戊戌進士翰林院編
修直隸提學使出後公弟世鑿增淞分省知縣均劉夫
人出增淦增濂均吳宜人出早殤女一適光祿寺少卿
富順陳鍾信長子分省知縣汝恩孫十二德謨國謨興
謨忠謨文謨英謨端謨嘉謨宏謨定謨憲謨宣謨曾孫
三紹祖紹宗紹彭蜀亂頻年公遺命葬京師丙寅九月
辛卯增湘等將奉柩葬於宛平縣西山寨口村鳳皇窠

乙山辛向劉夫人附先期徵銘式通與公仲子叔子爲
同歲生夙聞行治誼不得辭曩讀吳摯甫江安傅君墓
表備言勵生府君好書之專擁書之富於斗室中聚從
子諸孫嘯詒諷詠人書雜揉又言公有父風二子在翰
林不尊己居榮其辭蓋無溢美公諸子多以文學登進
叔子之耆書育才尤爲國人所矜式時當晚近五厄同
嗟獨能以藏書世其家庸非天所獨厚矧燾後委祉更
有大於斯者與乃爲銘曰
章章儒效先佐治作宰三輔精吏事遠追董巨工墨戲
晚歲林泉見高致清門善教日昌熾孝寬明允相軒輊
賢偶地下十年遲最迹鐫辭永幽隧

東海徐公繼配席夫人墓誌銘

夫人席氏諱元棣字移華上元人系出吳縣洞庭山世
爲方雅之族曾祖諱紹聖字述亭始遷上元祖諱世縉
字鎮容父諱存忠字賡揚咸豐間避亂河南有子元鑾
字錦泉宰鄆陵夫人生於湯陰之宜溝驛鍾粹流馥習
禮稱詩年二十有三歸大總統天津徐公爲繼室賃舍
於鄆聿成嘉禮諷誦甥館省覲大梁公母劉太夫人喜
得佳婦足娛暮年善體興居克相賓祭倡隨協趣戚儔
交稱及公登甲科供職詞館夫人奉劉太夫人入都所
居爲洪北江舊廬公貧而好客夫人治具以供忘其匱
乏先是劉太夫人因夫人久不育命撫公弟世光子緒

直爲嗣夫人鞠育恩勤愛如己出公嘗自課讀劉太夫人每聞小兒書聲輒爲開顏公後語夫人生平以此境爲最樂劉太夫人久病夫人侍疾累年不知痺痺逮遭大故佐治喪葬纖悉中禮公尤敬之甲午庚子夫人兩寓定興柯學士劭恣與之比鄰值家祭質明夫人禴翟以將祀事終日無惰容學士聞之歎爲士大夫所不能爲也公自庚子後以詞曹知兵游膺大用入贊樞密出督遼東夫人慮家人漸趨驕惰爰設修齊女學校教以德藝還京仍之宣統初元公復以樞臣入閣夫人亦封晉極品並拜東朝文綺之賜貴而彌肅安不忘劬敬述先姑垂爲家範蓋挈性謙懷終始如一焉辛亥冬共和

將成公盡辭諸職留護宮廷泊事定遂移家青島借夫人詣衛輝祭掃因之輝縣日涉田園夫人謂辛苦數十年今迺知田家之有真樂矣公宅心超曠志在一邱與夫人有以輝爲家偕老躬耕之約嗣項城袁公強以國事相屬未幾引去仍與夫人往還京輝用自怡悅會當首選中外相慶獨夫人知其心苦治內益虔蠶織建工廠苟利民物殫力爲之壬戌公謝政居津夫人意爲少慰而昏嫁之勞侔於盛歲骨月之戚損厥冲襟美疢侵尋寢致絲憊以庚午二月二日卒於津邸春秋七十有三子緒直孫延東延同曾孫保釐公作文志悼累數千言卜葬某所書來督銘銘曰

女有士行時比曾閔孝親夙彰事姑彌謹夫子蚤孤母
教成名遺規不替家道斯亨儒門貴盛易流奢逸葆素
約躬賴茲良匹鼎湖弓墮長樂鐘沈興慶班邈秦室憂
深陵谷貿遷閨闈淑嫵陰教疇持郝法鍾禮旁徵藝事
宜致期頤梅花合畫菱紙寫詩水竹有村饒耕無偶誅
德寓悲信今傳後區明風烈以告司彤鑄辭貞石視此
女宗

男蔭泰敬校字

志盒文稿卷四

王式通 書衡

記 引

重修蘭亭記

蘭亭名勝傳紀所稱歲久失治寢就墮壞邑人集貲繕葺務復舊觀經始於柔兆執徐越年訖功起墮支傾志規久遠洗濯藻績曲水依然旣動臨流之思亦有述德之賦昔人謂右軍高曠實異老莊貞觀好文傾心書翰遺大稱小疑乖素願知人論世斯固然矣而地以人傳肇端觴詠禊序之美又足以發揮懷抱激滌巖壑自開皇刻石以後蘭亭兒孫遍滿天下書中寶正衆生膜拜

精神所寄光景長新以故歲月彫謝忽焉千祀陵谷遷
貿不隔一塵永和風流於茲未替斯文感後詎不信與
工竣以右軍黃庭經十七帖大令十三行及永禪師正
草千字文嵌諸壁間山林翰墨並耀寰區陳迹幽情若
合一契用書厓略以諗方來

釋迦文佛二千九百四十年紀念會引

夏代有書始紀天毒之國秦皇御宇遠齋室利之經漢
武之得金人甘泉頂禮景憲之使月支浮圖口受稽中
壘之傳序成佛者七十四人求阿育之形像入地者二
十餘丈佛教東漸此其權輿迨至蔡王奉使寶偈遐傳
支安譯經圓音妙衍緇流日盛法運代昌震且遙通匪

止摩騰之輩流沙遠渡詎惟法顯之儔遂使八梵頌音
微言畢顯九乘大典奧義宏宣迦葉口授之文靈源可
溯菩薩淨行之品正信同依及夫達摩西至開立禪宗
直指本心不立文字宏濟覃於百億遷拔被於恆沙尤
是溷濯塵冥化導頑固焉昔劉融齋有言自世說出後
人思想爲之一變自華嚴出後人思想又爲一變
誠以世間現見萬法惟心含生之倫同具佛性善財知
見舉目而皆入法門華藏山河立相而無非具德最上
之義覺牖之功顧不重與慨自五宅易昏四流不泊情
漂愛燄業動心風譬諸春蠶成繭而繭遂縛身夏蟲語
冰而冰先喪魄自非識達真空色歸無象無以屏卻四

慮引登十善經云三界皆苦無可樂者又云五道衆生
共在一大獄中苟心係乎有則罪福同貫故總謂三界
爲一大獄佛問諸弟子何謂無常一人曰一日不可保
是爲無常佛言非佛弟子一人曰食頃不可保是爲無
常佛言非佛弟子一人曰出息不保便就後世是爲無
常佛言眞佛弟子夫無常顯證日陳於前而百代同歸
終莫之省此開士所以繫歛而智者因之頓悟者也自
由平等本諸佛說而泯勞未已疾苦羣嗟何以施救在
張正法蓋佛爲一大事出家豈僅爲自了生死已哉衆
生沈淪願拯拔之衆生迷謬願做覺之衆生纏縛願解
脫之衆生蔽障願開明之九州浩浩底以吉祥之雲橫

目蚩蚩潤以功德之水用能柔伏貪狠啟發昏愚振起
疲羸消除障礙運六道於慈舟迴超苦海驅衆生於彼
岸永離蓋纏破塵妄之念以印妙圓之體惕罪報之由
以修慈善之根悟未來之因以滅現在之業種福人天
有不可思議者矣衡山道階上人真粹天挺夙鑒道勝
幽討經典超出世維深懼宗門衰微慧命如縷崇闡大
教引爲己任爰與同志將於四月八日在京師法源寺
特開釋迦文佛二千九百四十年紀念大會研究教典
闡揚妙法自一日至八日建設水陸道場七日藉荐清
故隆裕皇太后及辛壬以來南北死事諸先烈並爲十
方善信度脫冤親伏維我佛降生忍土真實權應入雪

山之麓誓得種智坐菩提之樹初說華嚴靈蹟流傳法
身凝寂天花墮處豈無馬鳴龍樹之流蠟印傳時亦有
北秀南能之侶靈山授記未昧前因波匿觀河或傷去
日聽風柯之響密可傳心餐香積之廚真堪入律勝幢
百座地儼鹿園苾芻半千人疑鷲嶺將使微塵祇劫胥
徹光明邪見顛眸盡歸正覺遷懷生於壽域致薄俗於
純源首楞嚴經云毗舍如來摩持地菩薩頂言當平心
地則世界地一切皆平斯卽救世之良因設會之本旨
也上人處茲末法獨抱宏心以視布金須達止表精舍
於給園影石仙人但造伽藍於離越發願洪纖殆有別
矣於戲無明明盡慧眼照徹於人天自利利他人道不

踰乎忠恕不昧因果者科哲諸學之宏綱無住生心者
社會進行之密印不受物轉惟我法有自由一空諸相
惟我法有平等是以山莫峻於須彌師莫尊於刹刹既
吾土久沾法雨期國民永暢宗風不有教者其能國乎
所望多聞居士苦行沙門共樂無遮來參真諦爲緝坊
之龍象持緇俗之綱維稽首皈依顯揚聖教周星閱采
言符降誕之徵漢日流祥載叶通神之夢羣瞻寶相盍
起信心

家君七十壽引

家君生而敦厚異於常童幼爲先繼高祖王母所鍾愛
比長沈思下帷所學日進工制藝一試不售卽棄去專

治經史旁究素靈懸腕作書出入顏柳先王父卒於江蘇武進縣任所宦橐蕭然家計日重時先曾祖王母先繼王母均在堂家君爲祿養計服官淮甃深恥干謁沈滯累歲未嘗乞人一言曾以資序任白塔河緝私差裁革規費廓清積弊嗣應輪補泰州草堰場大使例先調江寧攷試沈文肅方督兩江治事嚴密面試論說家君援筆立就文肅顧家君曰君文氣深厚必有福澤詳詢家世蹶然曰蘭史先生爲君之祖耶此林文忠所稱爲吳中第一好官者余習聞之閱家君仕履者再歎曰賢者屈於下位吾輩之過也家君於光緒庚辰蒞草堰任次年辛巳夏值海嘯奇災大風雨挾潮而上瀰漫無際

海濱竈戶呼號奔走蕩析離居家君亟籌鉅款並捐廉俸周歷災區普放急振凡給米施衣修復廬舍補買牲畜至織至悉皆躬親其事不假胥吏之手自夏迄冬日與災民相處寢食皆失其時形神顛頓鬚髮半白冬振既畢規畫善後各事用前明舊法於沿海遍築避潮墩修范公隄以禦水患沿隄種樹疏鑿河渠儲穀於倉新陳相易竈民感之立石紀事嚴訓導作霖謂辦義振數十年所見官吏放振實心如家君者殆無其偶逢人輒稱道不去口越數年飛蝗爲害家君設局收買蝗蛹曾不數日蛹孽盡殲除患迅疾而絕不鋪張文牘以自表襮家君接人以和樞樞善下獨於上官不稍遷就某公

巡視各場盛興從索供張商民咨怨家君以計繫其寵
僕杖百餘械項示市萬口歡呼家君面達某公曰聽公
參處爲商民乞命不惜一官也某公慚沮謝過自此稍
斂戢同官聞其事者莫不咋舌程蘭陔師寄書式通曰
自尊公發仁者之勇而一路所經得免擾累陰受其福
者多矣家君老於鹺曹洞悉利病等所以裕國課而恤
商艱者朝作夜思不稍暇逸曾創爲重淋鹽之法以敵
川鹽蓄草濟煎力稽火伏故產鹽恆數逾常額每舉一
事必集紳商反復討論一以誠意相感是以去任將二
十年而舊日紳商之馳書問起居者歲時不絕蓋愛戴
之情歷久未已也家君淡於榮利自視儼然在任有年

凡敘勞可以晉一階者悉謝不與。遭先繼王母之喪服闋後卽絕意仕進。以兩世宦吳爲吳人所愛重。且寓蘇州尤久。與其賢士大夫相習。遂卜居鐵瓶巷。慕靖節康節之爲人。自號安遇。老人元和陸相國爲題堂額曰安遇堂。喜與二三老友啜茗清譚。春秋佳日徜徉山水間。暇覽陶蘇白陸諸家集。間亦作詩作字。必端正無譌脫。論事必窮源竟委。凡下筆必曲折詳盡。見者咸謂壽徵。家母姓施氏。爲外王父夢玉公長女。外王父由中書改外。以文采動一時。工詩詞。精鑒藏。家母染濡家學。見聞都富。及歸家。君周旋娣姒間。斂抑才智。深自韜晦。事先曾祖王母。先王父母。恪盡孝道。先王父病篤。曾封臂和。

藥以進持家節儉而祭祀必豐周恤不吝思慮縝密事
無鉅細必先期籌度手書於冊皮置器物皆有法度善
譚史事式通幼時自家塾歸家母每於燈前備舉列代
名人嘉言懿行可師可法者以示準則在家君任所佐
理內政條理秩然家君遂得壹意治公不問家事近歲
孫男女漸長家母勞心婚嫁無異中年家人以節攝請
不之應也式通人海浮沈修名不立無可以娛老親者
今年七月爲家君七十壽辰伏求錫之大文以符古人
夔壽勒銘之義俾式通得持歸以侑堂上之觴感幸何
極

贊銘

篝鐙紡讀圖贊

篝鐙紡讀圖周子養菴爲其太夫人作也太夫人系出
有媿世著清德惜嫵婉婉斑筠炤嫩穠矣若年爰嬪周
氏鐘鼓思樂衿鞶昭虔淑順含章內言不出足令歌芼
昔者頌其和平詠采蘋者昭其法度彤管有煒百行備
焉粵海多厲有女蘭摧穹皇降厄夫子玉折孤魂弱息
誼絕親交返骨無期圯城有淚哀動走壙犬護長行嶺
嶠流離生理殆絕瘴雲如墨朝起侵人箚煙成嵐夕視
猶鬼歸唁未聞于載驅閒關靡歌于車牽歷三十日行
千餘里足窮於跋涉性全於將毀斯亦極閨壺之奇節
竝山川而貞遠者也天實酷旤人命靡由旣積憂勞兼

傷疹溼喘息未定遽嬰疔疾沈痼新瘥又悲銜索撫念
幼子顧復何依感應空王夢超疾苦松心竹節用契菩
提遂持佛名以滌塵累氣體因而貞固神明益以澡練
煢煢影特破屋幽棲黽勉有無惟資杼軸辟纊易食發
楹陳書機軋軋而朝徹鐙熒熒而夜溫東方月出跂彼
七襄門前烏嗁驚茲伊晤書聲梭聲融融相和手經指
緯垂訓効功思唐俗之儉勤感幽風之栗烈追斷織之
誠貽式穀之謀遇旣艱於敬姜賢尤超乎陳寡矣況夫
葛屨履霜龜手繡文儋石無儲糟糠不飽時蒸濕薪寒
煙塞戶薰目盡眚淚袖泆瀾心力痺痺上格真宰貧不
隕穫意晏如也然境有豐約志同夷險損以益物節不

傷財吉凶賓客禮度稱情急難相聞質衣振濟善小必
爲誠至動物永錫嗣類寢致顯揚入守遺經出爲時棟
折蓼之教固有自己周子乃追懷聖善仰答劬勞流涕
申辭依稀嬰穉恩深報淺境邈思緜敬作斯圖以誌遺
痛丹青可狀來許永昭君子觀之僉曰宜也爰爲贊曰
古井無瀾嚴霜知節猗與淑媛此心匪石生撫藐孤死
矢同穴履險忘身翼雛引責冰堅槩苦精靈通神彪蒙
勤敦嫠室食貧不讀奚業不績奚存一鐙雙照中有淚
痕粲粲門子嶷然以立祿不逮養言之慚惻爰罄哀音
爰章懿德圖畫甘泉遐思古昔前沈後揚逞屈來伸儒
門再造鬻子恩勤中壘拔範越紐延芬遺徽不沫以詔

後昆

龔夫人寫經現瑞圖贊

迦葉頂受薩陀灑血維此毘梨輝映前哲一念炯然五
蘊悄竭藏海不波靈光迸發其一

荀氏書空諸天護澍豆盧無火神光燭素有感斯通因
迹成悟誰謂文字盡屬染汚其二

如自住空掌握珠瑩輝天鑑地無象無名在纏匪虧出
迷匪盈本無黑闇何有光明其三

灼灼赤文婉婉清標功超萬柳小萬柳堂吳芝瑛女士
手書楞嚴為近代寫經
之最著者圖繼大橋通州范无錯失
橋遺照圖形管有煒淑範孔昭

花開寶樹神歸玉霄其四

在昔法王至心苦行析骨刺血不惜身命毫光爛然蓮
華四映懿此精誠成佛已竟

其五

孫子鈞侍御象贊

丁酉戊戌間式通在京師通藝學堂與宇晴外部同治
旁行文字宇晴孟晉迨羣學行兼美嗣得見子鈞世丈
先生迺知名父之子具有淵源庚子以後結鄰宣南密
邇有道前塵歷歷蓋廿餘年矣先生舊主講席北學用
興養望銓曹不事干謁及居言路建議宏遠皆關大計
桑海躬經歸爲遺逸黃冠野服湛冥以終鑿楹有書祀
社無忝瞻仰遺象感歎萬端爰爲贊曰
亭亭學說海內所宗國人矜式詎域吳中先生立身嚴

於仕止沆瀣前賢行已有恥藹然道貌蔚爲清門名香
惇史瀛海桃源風景不殊人間何世再拜題辭哀時流
涕

遠威將軍徐君象贊

乙丑仲冬十二日碧夢過艸堂茗話念畏廬叔
節之家惓惓不已次夕招同鳳孫晉卿諸老讌
譚自謂比年捐棄詩詞專治經小學歸當壹意
讀古書越二日而凶問至矣傷哉

體兼上才果行育德苑囿典文塗分流別臨戎雅歌遠
圖謀國仁能洽下朋心合力咫尺龍沙以集鴻烈鯁我
北垂方獻三捷邊廷懷和忠用詳密鏤石燕然林泉飛

液志清天綱羣言難一先覺時雄誠感國疾孤音少和
並邁屯蹙人神波蕩天地閉革徒恨芳膏世載弦直之
死靡貳臨義罔忒言觀殄瘁千載不作谷靜山空江海
冥滅韜伏明姿惟此剛絜

思讀誤書室銘

卜析亥豕校勘權輿卯金之子董繁理都縣褫隋唐枕
祕淪缺單詞隻義瘁人捫釵翠翠翁子瑤笈探靈茂齒
儷賈精思邁邢農區稂莠醫洞癘結志士權書一黍不
溢古歡充室家法匪遐惠門紅豆實導先河

祭文

祭長沙張文達公文

惟公興學歲在辛丑帝有綸言稽首拜受風氣初開中
材卻走疇鍼膏肓疇發墨守與人謀始公任其難新程
初定衆喙索瘢公獨髦髦廢寢忘餐毀譽不顧求心所
安翼翼神京濟濟多士橫舍宏開萬方一軌英俊畢縻
波屬雲委三育發明百家競起公求宿學首薦桐城冰
銜旣錫觀學東瀛公貽書翰篋衍充盈苦心親見猶有
同行公所網羅實多巨子賀縣掌故新化地理湘鄉國
文武進歷史異域儒流動色俾美公務虛已議必從同
勸學初計師範是崇取材各省遐邇嚮風學成歸里期
牖愚蒙黑水白山古風質樸尙武精神及今悠邈智者
識時議興旗學受命更張昕夕商榷研習法政立憲胚

胎歐儒推闡界說日恢國多枝官育之成才公興仕學
肇始燕臺寶書西來百二十國字識旁行可使絕域館
併同文公司其職識洞殊方功收羣力神明苗裔泱泱
中原衛生無術強種難言公知其意醫學是尊勸導實
業一疏長存名士登科少年通籍與言就學如水投石
公愛後進循循誘掖讀書旣多新知終獲公選志士分
赴東西望其勤學力爲提撕知其貧病言之愴悽長願
諸生免世訶詆科學日新異書千百後海先河假涂翻
譯公延侯官引爲上客重過虎坊心傷陳迹從事編輯
張李黃鄒公所推重皆世名流羽毛自惜簡冊窮搜以
此詬病於公何尤公任學務四更寒燠境與願違憂心

如擣公意多傷公顏漸老湘水渺然歸思浩浩愛才若
命公出至誠沈張湯鄭積歲心傾未遂師事方寸怵怵
待商教育匪噉盛名公見後生幾無虛日或恤單寒或
賞著述雅重溫文亦憐直率休休有容个臣惟一公離
學界睠念如初聞有進步公意爲舒聞有困難公輒歛
獻可見公心粹然沖虛論公遭際光輝三楚知公獨居
抑鬱誰語誠至謗消身泰意阻憂能傷人病深如許長
沙星隕仲春風號神歸天上帝念勤勞詔書泣讀感動
吾曹商量舊學下問親切公今身逝名垂宇宙三萬生
徒不忘恩覆八百孤寒流涕思舊造象上京鑄金長壽
莘莘學子咸動悲音矧在下走夙侍清衿文以志痛往

事鉤沈惟公靈爽鑒此哀忱

祭張筱圃提學文

惟公早歲翔謨延陵經史博涉辭賦見稱名香文美聲
蜚實騰學士五絕大夫九能玉署夢闌金曹官改奮迹
枝官寄情荃宰遠望瀟湘言懷蘭茝文達留賢南游少
待學制一變異議萬端程功至緩謀始實難公感知已
籌畫心殫中宵屬草對食忘餐甫創校規終爲楚客新
舊相持調和無迹旣遏橫流亦砥頑石彌教旋司揀時
有策粵漢軌議合輿野心廢約事鉅上相謀深公有瞰
說必竭惘忱細流益海異苔同岑教育日昌專官迺設
興學瀋陽資公明哲閔厥愚柔義取通徹徧餉新知聿

更故轍公爲世用中多隱憂蒼茫百感俯仰千秋發言
沈痛時見賡酬傷肝致疾靈藥難求哀此達人倏成故
友家無餘財堂有老母身後公言聽諸衆口遺書不存
後死之咎素車慘慘落木蕭蕭薄陳魯酒悲動商飆設
位蘭若痛賦大招魂兮歸來京國非遙

祭孫子鈞侍御文

東武傳易淵源聖門明德相繼經術長存痛茲一老遽
及九原澤流賢嗣名在諫垣公爲茂才歲猶卅齒秉誥
庭闈孟晉文史鄉舉鴻騫英聲鵠起桑梓交稱椿萱色
喜大雅河間嗣音淵穆世有盛衰士鮮誦讀啟厥顛蒙
資公樂育邑令繫維邦人尸祝日華不墜風氣斯開規

循鹿洞價重燕臺聯翩上第卓犖羣才南菁濡染北學
胚胎睠茲後生胡能退棄公旣宦游衆殷師事桃李陰
成松楸歸視仲宣體弱靈均顏瘁一官吏部重夢春明
崔亮才望阮咸真清城狐肇鬻風鶴俄驚未達行在坐
困神京靈素旁通文章不露蘊藉曹郎鏘洋言路畏市
直聲恥舉細故爲國涕洟代民呼籲時局孔棘大計頻
陳人避驄馬敵識鳳麟拒交親貴絕迹要津懼爲璵璠
氣鬱輪囷履霜堅冰密雲不雨肉食無謀骨骸莫吐公
燭機緘憂深肺腑賴有佳兒慰茲名父時勤蛾術早賦
鹿鳴識周四裔躬涉重瀛白雲親舍紅海歸程哀銜易
簣書守鑿楹公之律身衷諸竺實公之厲節合於遺逸

全受全歸斯人斯疾賤子悲公潛然涕出嗚呼哀哉

祭孫仲璵文

里有先哲爲帝者師詩哀定海集署扼敬君承家學寢
饋文辭九能具曉四裔周知瓌頽世家終賈稚齒澆洽
棣華韋趙杞梓父矩子孳顏書導軌遺墨人間君能酷
似銳銀旭厯竺厲縑紉寸璆尺璧瑰質瑤相祥鸞上翥
神驥奮驤白鷺秋水梅花畫堂嶽嶽長沙今之懷麓精
鑒人倫自隨書局君被禮羅丹黃萬軸名理善譚俊厨
歎服君生盛闕沆度端凝處脂不潤粉署廉稱遷官郵
傳襄事山陵歸治羣籍清寂如僧燕雀處堂龍蛇起陸
率土犇鯨中原逐鹿灞岸王悲江頭杜哭君知自全鑒

於山木月波霞嶼雪寶珠林訪宅虞隱同鄉賀吟司關
可老是有退心久掌貨節長謝朝簪君愛賢妻高柔自
比舉案未終營齋雪涕荀粲繼亡葛洪若睡歿念慈親
訓遺令嗣譚元渺矣感舊潛然金昆泣下石交淚漣爰
潔肴醴敬薦几筵來歆來格靈兮在天

祭吳子修先生文

貞元接續儒術湮淪邦有碩德矜式羣倫天不憖遺萎
我哲人泰斗失仰湖山不春往古史官載筆仍世談遷
彪固蟬嫣弗替安平汝南文學相繼以視延陵並章譜
系公生雅族隨宦西川受書官舍失母髫年督部秉鉞
萬里黔滇功成還蜀童孫愛憐旭厯銳銀墳典邱索員

傲名高仲宣體弱旨悟真如理通反約閉戶自精養生
有藥讜言手錄志奠神州南陔絜養西泠唱酬蔭傾兩
代躬羅百憂楹書稷下封祀寢邱甲乙登科春秋十易
踵軌張朱乘輶梁益杜陵趨朝奉春建策行在溫綸夜
半前席匡襄百度制置三司滇池湘水使節載持敬教
勸學經師人師松風乍聽桑海俄悲論公福德克昌厥
後文獻徵存梁胡可偶論公遭際運遘陽九臨歿遺詩
重逢師友簪裾舊合杖履相親傾心道義回首音塵靈
光驚圯兜率歸真願念昔款款此明禋嗚呼哀哉

祭錢幹臣同年文

嗚呼卅年成世舊夢春明國求俊彥士奮科名公尤卓

舉吾榜之英音塵歆絕涕淚縱橫公家秀州名香文美
方雅鼎門通德故里椿蔭蚤傾荻書幼恃頭角嶄然應
官任子亭疑稽古翔譽爽鳩蓮峰鑒朗柏府聲道司囂
創制良佐運籌邊關建置牖戶綢繆分陝方隆運逢陽
九見危恥存臨難不苟神語空中當歸事母報答君親
十二年後論公才氣凌厲無前識通四裔神游九邊如
陳同甫如杜樊川元龍湖海鄴侯神仙論公德量汪洋
千頃莊謔由衷孤寒延頸廣廈風寒大裘露冷化鶴感
丁問牛思丙論公孝養孺子終身輿導八坐暉戀三春
迢迢仙馭哀哀鮮民歸從防墓遂厭洛塵公好道家自
忘疾革赤松從游黃庭抗迹回首題名淡墨猶昔願念

齊年來歆來格

祭郭匏廬先生文 晚晴簃詩社公祭

重規摘藻道濟掌綸蚤直禁闈晚作詩人未聞小極遽
選前塵知身來去如臂屈伸惟公蜚英鼎門國器終始
禮官迴翔要地談遷彪固名父令嗣不盡彙微願言詩
事桑海有淚柏梁無臺譚龍客集盟鷗館開竹垞詩綜
歸愚別裁發凡起例精過羣才論詩近代中有微旨首
推亭林上接子美京闕諸篇裔皇被紙不肯亡明寸心
千祀榕城風雅七子傳鐙杭序非實鄭錄足徵竹間十
日家學敬承韻語童習騷壇代興公富千篇溫柔敦厚
視分門戶等諸培塿亥旣徂年運遘陽九一代獻徵見

稱橘叟傾心四坐彈指十霜中冬屆序大雅云亡宮歸
兜率國往陳芳相逢天上秦易周張公操選政鑒洞得
失支流緜滋蒼萃若一攷正舊聞如秉史筆其生有涯
潛然涕出嗚呼哀哉

祭章觥室文

百年彈指世界微塵五戒十善二諦三輪哲人來去了
了前因同人思舊雪涕一陳惟君盛年騰驤王路晚丁
陽九哀時作賦感歎空花流連枯樹不辰胡悲無生早
悟君有夙慧儒釋精研說窮五際思通四禪倚聲獨秀
韻語彌妍倚山淡月遺集長傳君處濁世宅衷清淨出
見冲襟入敦穆行空山鼓琴臨風獨詠萬物皆流寸心

無競詩搜近代業紹選樓君預甄采命侶嘯儔西園游
讌北海唱酬時驚隙駟館閱盟鷗嶽嶽諸儒學分漢宋
君事編摩異義畢綜支葉繇滋纍疑聚訟稽鏡未終繙
帛疇共君之初志谷口躬耕石田無穫世網重嬰平居
孤憤遺以至情宛宛匹偶怡怡弟兄君契真如明於生
死意樹身城浮雲止水虛唄聲聞湛然逝矣留與人間
名香文美萬劫君免大患君除桎枯懸解苦樂迴殊彭
殤可齊歸寄匪誣強作達言君其鑒諸

祭汪伯唐先生文


庚午春道涂阻滯致緩葬期辛未正月公子彥儒自舊
京奉觀南歸送者泣下式通感舊茹悲不能無辭辭曰


濁世轉輪歲時易改公之云亡儵忽三載子有梅容人
察荃宰身歿名存精爽斯在公之事業中外皆知徵諸
惇史無待費辭公之似續克紹門基孫枝秀起食報奚
疑兵革頻驚市廛無恙疇策治安受公之貺今與正定
謂王聘老後先歸葬都人思舊流涕相向桐塢宅兆生前自
爲賢偶同穴魂魄所怡魏若新逝泉路交期是爲懸解
匪以塞悲送於故都玉棺俄發善護波濤涉津逾渤遯
矣柳車超然蓮筏擲筆汎瀾追懷靡歇

男蔭泰敬校字

志
金
詩
集

夏孫桐署





2013

志盦詩稿目次

王式通 書衡

卷一

甲午出都

題吳鏘如先生秋鐙卷爲祝齡作

六月二十八日萬壽節鐙詞

哭亡女蔭珠

贈言謇博同年

祝延以除夕題家書詩索和次韻

次和祝延元旦詩

越日祝延過談持詩索和走筆書此別有所感

壽張埜秋尙書用鮮厂學士韻

仲發年丈之官武昌以詩留別依韻奉酬

江亭賦贈蔣性甫侍御

贈張菊生

長沙張文達公挽詩

題島田彥楨爾宋樓藏書源流攷

南皮太保張文襄公挽詩

送江杏邨同年歸里

長沙張文達公墨蹟楊時百屬題

送樊山方伯之官江寧

樊山布政屬題所南翁畫蘭

和宋芸子年丈近作次韻

疆村侍郎屬題歸鶴圖

題周岫芝報答平生冊

卷二

馬嵬驛

樊山以戲亞蘧詩索和次韻奉酬

次和力畚感舊之作兼呈中實

爲仲仁題潘文勤書西苑南書房榻

爲徐印士題圖

題張滄海愁思集

題適盦詩存

爲楊冠如題圖

贈成澹菴

題竹山澹菴圖

黃陂馮氏姊弟索詩

題秦會之書楞嚴經偈句殘卷爲鄒盦作
爲沈盦侍郎題上元夜飲圖

翁文恭生日師鄭招入瓶社感舊哀時愴然成詠
題易一厂廣州詩冊

許靜仁屬題朱文公墨蹟

題草履平衡冠怒傳奇殘稿

題西陂尙書遺象

題漁洋山人手批鈐山詩選

卷三

師鄭以名賢生日詩屬題意有所感雜成六絕句
和陶廬宗丈七十自壽原韻

獨倚

丁叔雅挽詩

哭孫仲璵

題郭鷗史女士二喬觀書圖

莊思緘同年屬題艤舟亭圖

玉秀山房題壁

趙次珊館長重葺舫齋用朱芑堂韻自述屬和

題馬佳夢蓮先生夢迹圖

郭仁宏爲陽明製硯今歸蟄園名以青琅玕示客
徵題

題徐晴圃中丞從軍圖

吳子修提學挽詩

錢幹臣同年挽詩

贈沈呂生

題忍堪居士禮塔園圖用天琴翁韻

卷四

伯玉屬題其尊人幾道先生江亭餞別圖憶卅年
舊事愴然書此不足言詩也

題劉棻筠刺史籥雲仙館遺集

紹越千太保挽詩

乙丑中秋北海漪瀾堂雅集分韻得飛字

題錢竹汀畫象贈日本內田南湖

和石笥山房落花詩

齊照巖屬題文衡山天梯石棧圖用半園韻

題說劍樓藏劍拓本用坡鄰前輩韻

石鐘居士屬題元獨孤長老贈松雪硯

題徐筆珊先生九九消寒圖

題水竹邨人臨王廉州山水卷子

單太夫人桂陰課讀圖束筮屬題

題穎人愴荒集

爲陳潤菴題子鶴尙書遺翰

卷五

爲盧慎之題慎始基齋校書圖

樊山以都門離席詩索和依韻奉答

樊山贈詩譽及兩世疊韻志謝

雜書近事再疊前韻寫塵樊山

題阮性白所著李北海書思訓碑諸本真僞互勘

記

和散釋雨窗原韻

再和中秋原韻

世傳香妃並無其人作此正之仍用前韻

夏閏盦賦廣和居感舊詩七首爲補一絕

郭匏廬年丈挽詩

汪伯唐姻丈挽詩

和沅叔同年新春書懷原韻

題唐塲美人

題靖陶看雲樓覓句圖

次和纒蘅移居及留別南園詩

題陶元暉中丞遺墨用海藏翁韻

次和散釋述夢

和天琴翁七月二十日廣和居卽席之作

疊韻呈天琴老人

題嘉興譚女士遺象

卷六

哭馬通伯先生

次和天琴老人春望詩韻

疊韻答天琴老人

王式園屬題時賢書畫集率成三絕

次逸塘海濱詩韻

六橋屬題玉姬小傳

壽藏園五十晉九

恭題御書

哭嘯蘇

樊山先生挽詩

題韓斗瞻將軍遺墨

題無邊華盦圖

題握蘭籜栽曲圖

題朝鮮李昱應上萬文敏書

題惲孟樂太守

毓嘉

宣南話別圖

志奩詩稿卷一

王式通 書衡

甲午出都

歸心同別緒，觸處隱相和。
馬首來時道，魂疑夢寐過。
停車問舟楫，殘照下關河。
回首長安路，浮雲日暮多。
繫纜人如沸，江城半夕陽。
頓殊南北候，但見管絃忙。
蓬鬢欣新沐，衣塵惜帝鄉。
幸無行李累，無已棄書囊。
八年三十度，一度一登臨。
邱墓平夷盡，彫頤帷帳沈。
微醺觀物化，萬感養禪心。
仰視浮雲逝，孤踪不可尋。
去作京華客，匆匆又幾年。
何期重對酒，疑是舊離筵。
過此將何往，湘遭亦偶然。
孤懷當不寐，何日證常圓。

題吳鏘如先生秋鐙卷爲祝齡作

製萸削簡兩怡然韻事沈沈近百年
茂苑清風縣累葉舊時明月戀寒氈
僊人跨虎銷塵夢我輩塗鴉補墨緣
清絕一庭煤鶴影嗣芬猶有誦蘇傳

君祖著誦蘇樓詩集

六月二十八日萬壽節鐙詞

鳳城銀樹乍霏煙分得輝光到九邊
聞說天顏新有喜炎方軍靖跼飛鳶

岐薛金張輦道過玉泉湯沐挹流波
鼇山十二頻回望襤褸私憐熱客多

畫圖無逸奏經筵亭育堯仁遍八埏
一夜江淮飛急電流民誦舞詔書前

諭院撫急振災民

中使傳宣輟御餐求衣乙夜聖心殫曲江憂國頭空白
金鑑千秋著筆難

鳳腦妍華空紫禁
虬脂奇異絕丹除
官家儉德超唐宋
侍從何勞進諫書

掖輦行從聖母游
宮廷慈孝迥無儔
朝天螺女驚初見
震旦文明照十洲

一榻蘭缸歇嚮晨
六街華燭耀重闈
禁煙何必逢寒食
愁煞焚膏繼晷人

三島仙人絳色襦
雲璈停奏屐聲麤
分明百戲魚龍地
添續扶桑仕女圖

日本女士多
往天橋觀鏡

延喜年年許夜開
宸游虛望屬車來
金門待詔多厨俊

浪費馮商作賦才

宮體流傳夏玉音重門詆蕩五雲深平生未作鈞天夢

風月三千屬翰林

謂同社諸君

哭亡女蔭珠

嬉戲光陰下九天衙齋辟岬尙依然碧梧傍舍門臨水

回首巢痕十四年

兒生於西團官廨

勝衣就讀外家時記誦曾無一字遺散學歸來重展卷

挑鐙親課定盦詩

滄海橫流萬感儲蘭閨舊習戒兒除童年豈曉全球局

略識旁行四體書

爲讀輿圖計令先習英文

銳電傳音去復回蓼花風惡未知哀颿輪激浪三千里

悽絕舉帷哭汝來

見亡爲重陽前三日電至值
移寓失接到家始知見死

幾回北望白雲飛
病榻聲聲盼我歸
今日父歸見在否
宵深泣斷夢牽衣

華銓輕他耀首妍
儒門淡泊寶寒氈
而今痛定翻成悔
悔少嬌兒浪擲錢

髻齡解事過成人
甘苦他年賴爾陳
知否親心叢百慮
從今誰可話艱辛

阿母連宵淚未乾
重闈太息屢忘餐
傷心謀卜桐棺葬
待寫哀辭壽澤蘭

贈言謇博同年

十載聞聲纔識面
搏沙散去輒愁儂
燕臺舊話懷徐積

漢治風流見魯恭殺賊才兼作露布愛人誦起遍雷封
昔年名士今廉吏兩地虞山一笑逢

祝延以除夕題家書詩索和次韻

倉黃半載五移家無定人疑萼綠華春草夢生今夜月
寒梅信杳故園花明知精衛難填海豈有恆河可數沙
猶戀枝官真鑄錯歸心長繫洞庭茶

寄命熒熒百萬家忍含淚眼望京華微聞杜老江頭哭
寫入江郎筆底花函首敵求韓侂胄傷心人說賈長沙
蛤蜊且食無多語莫使春光老采茶

次和祝延元旦詩

誰驅嶽色入關蒼天府雄爭九域光約法治能開漢代

坑儒心可識秦皇居岐廣萃從龍彥醫國新求扁鵲方
豐沛烽煙猶未息敢同游子說思鄉

三峰西拱鬱青蒼佳氣都增蹕路光五夜夢魂依北斗
萬花心事戀東皇願從鮫海求奇製親向龍宮覓禁方
賦罷大言還失笑黑貂裘已做樊鄉

越日祝延過譚持詩索和走筆書此別有所感
飛來秀語奪山蒼嫫母平分越女光猶有清言追魏晉
難尋高夢到羲皇薜蘿鬼語知來歲瓊貝仙居在上方
同祝尙湖湖水穩伊人終老白雲鄉

壽張埜秋尙書用鮮厂學士韻

並時人物待權衡雅量恆箴察察明三見滄桑增感喟

十年樹木費經營坐中談笑關元氣海外孤寒起頌聲
葉語遍書箋九萬蘭臺述作有羣英

忍見神州竟陸沈留侯借箸運謀深萬間廣廈開宏抱
千頃湘波寫素心滾滾羣流歸巨壑惜惜上德儷清琴
卧龍早具匡時略抱膝曾傳梁父吟

仲弢年丈之官武昌以詩留別依韻奉酬

喚月靈妃事渺茫仙人三度見滄桑嬌鶯隔葉聲偏脆
瘦馬馱花汗亦香辛苦搏沙能幾日安排種樹漸成行
懸知嘯咏南樓夜玉宇高寒念上方

曉鐘仙仗景迷離三疊琴心入道遲南淀波光春似夢
東瀛花市雨如絲看朱成碧真無賴轉綠迴黃有後期

悵望江城吹玉笛一天眉月寄相思

江亭賦贈蔣性甫侍御

當代無如唐介直文公謝過已難望明知蕉鹿終成夢
簪見淵魚太不祥臣朔年來工譎諫子雲天許賦長楊
廣陵絕調今衰歇怕倚危闌對夕陽

贈張菊生

吏書多調語墨墨五千年鐵血橫今日金輪轉大千殺
機天發亟成法衆持堅此局終須挽中宵泣涕漣

進退惟君命何須悔直言餓麟知不噬窮鳥許離樊甑
破今何顧芝焚豈幸存免官由獨斷去國永銜恩

結習耽詞翰雕蟲愧壯夫多君懷璞玉風我補桑榆卓

舉觀書識深沈運甕劬一時厨俊盛能過是人無
此去庸非福新機畢力研離羣傷賤子別緒滿虛筵對
宇談元地登堂拜母年異時一同首夢境尙依然

長沙張文達公挽詩

內相鈞天夢悲秋嶺外歌

均見公退思軒詩集

憂心在君國淚眼

看山河瘴海詩篇富清時諫艸多西廊老供奉略似侍

延和

公題東坡居僖錄詩云一事類公差不恨七年供奉殿西廊

觀海難爲水看花且待春塵銷香不滅月盡夜長新已

下孤寒淚重思去住因九京何所恨天語惜勞臣

公歿後有

辦理學務尤著勤勞之論

未作乘楂使天驕識鳳麟起居頻問遠進退屢覘隣舉

世競羣智高名萃一真人亡邦國瘁慘澹九衢塵

問疾頒珍藥東朝禮數優上為天下痛獨使至尊憂洛

蜀關時局衡湘渺舊游桑田家未有清節自千秋

高館羅羣彥搜材到爨薪文章憐綺麗

公評式通駢體文有飛騰綺麗

之志節重嶙峋分隔心彌下憂深意轉親酬知私願在

長葆歲寒身

題島田彥楨齋宋樓藏書源流攷

意輕疏雨陋芳椒賓客文章下筆驕割取書城歸船載

蘋風悽絕駱駝橋

李宗蓮齋宋樓藏書志序盛稱潛園先生求書之勤謂乾嘉間石家嚴氏

芳椒堂南溥劉氏疏雨山房皆以藏書名嘗見二家書

目著錄寥寥豈足與先生比長絜短雖大言蓋實錄也儀顧堂前子弟佳一家志趣尙難諧清風輝映吳興錄

晉石厂承咫進齋

歸安姚彥侍方伯名觀元罷官後寓蘇州蕭家巷公子慰祖字公蓼父子

皆好藏書方伯刻思進齋叢書公蓼別刻晉石厂叢書

丁董羅陳嗜好偏書亡同損一宵眠重思獻縣違心語

泡影山河祇偶然

叔雅授經叔韞士可皆有書癖聞信相告束手而已紀文達言趙清常歿

子孫鬻其遺書武康山中白晝鬼哭何所見之不達邪

大地山河佛以為泡影區區者復何足云我百年後儻

圖書器玩散落人間使賞鑒家指點摩挲日此紀曉嵐

故物是亦佳話何所恨哉語最曠達然文達又言嘗見

媒媪携玉佩數事云某公家求售外裹殘紙乃北宋槧

公羊傳四葉為惆悵久之則仍未能達觀也故葉緣裝

太史詩云山河泡影談何易一見公羊涕不禁

翁潘大雅今銷歇江費風流並寂寥坐使靜嘉騰寶氣

人生快事讓君驕

陸氏爾宋樓十萬卷樓守先閣之書盡歸岩崎氏靜嘉堂文庫日本藏書

向闕史集部今驟待此宜

彥楨稱為人世大快事

疏草重尋一涕洟藏書初願總參差雷塘弟子思前夢

親見虛懷討論時

長沙張文達師擬奏設圖書館疏稟已具事不果行師於今春二月薨於

位回憶便坐雅譚光景在目不覺涕淚之何從也

調停頭白范純仁俯仰千秋獨愴神有客為書會乞命

湘濱宿草已三春

首用廣雅相國詩句光緒癸卯年相國在京湘鄉李亦元刑部名希聖會

進建館藏書之議相國有意提倡會以出京中止而亦元不久下世嗣無議及此事者

巴陵方與歸安陸一樣書林厄運過雁影齋空題跋在

流傳精槩已無多

亦元遺著有雁影齋題跋所見多巴陵方氏藏書庚子後大半散失

海外琳瑯亞漢京客探祕笈品題精微聞東士傳新語

翻案來朝畏後生

客秋九月二十八日在日本東京借仲弢子培兩提學至鞠町御料理地

宮內省所轄之圖書寮觀內府藏書典守者羅列精本請定甲乙意殊誠懇培老謂東游以來惟茲事差強人

意仲老戲曰君勿意
防島田明日翻案

歐化東行漢籍摧書生有志力能回竹添餘論篁村教

家學師承造此才

彥植所師為竹添君名光鴻字井井著有左傳會箋論語會箋棧雲峽雨

日記其尊人篁村先生名重禮學兼漢宋平生無他嗜
好但愛書籍藏弄二萬餘卷見鹽谷時敏所作篁村島

田先生
墓碑銘

未窺舊籍談新理不讀西書恃譯編亞槩歐鉛同一映

千元百宋更懵然

侯官嚴幾道先生每教人以瀏覽古書熟精西文為研究新學之根抵客

冬晤先生於上海語及近年國文之寢衰科學
之無實太息不已時先生新從京師襄校歸

三島於今有酉山海濤東去待西還愁聞白髮談天寶

望贖文姬返漢關

如海王城大隱深遺經獨抱幾沈吟白雲蒼狗看無定

難遣牆東避世心

南皮太保張文襄公挽詩

紀阮儒流傑林胡天下才个臣一身具風氣百年開夜
半宮茶賜春來社飯哀蕭蕭霜鬢冷王室夢千回
無競臨機定沈思置弈遲球時躬早瘁憂國病難爲力
竭調停術心傷諷諭詩長沙勲似舊遺愛匹陶祠
駑馬辭芻秣重勞過冀知迹疏酬顧惜意厚感心脾墮
淚登堂日聞名就傳時卅年開府始功紀晉陽碑

送江杏邨同年歸里

鈞天帝所夢銷沈上相良箴寄意深

張文襄曾屬人語
君日朝廷視君言

甚重宜慎
發取信

海有橫流荷作柱國無喬木柳成陰陽春祇

惜稀同調磁石終難引曲鉞眷戀庭闈吾獨羨
慰親頭
白倚闥心

長沙張文達公墨蹟楊時百屬題

要地無才天意悲薦賢密疏少人知

癸卯年事疏已至
國亟追回公貽式

通書有天
意之歎

一生忠實他腸鮮四海聲名眾日推明德宣

仁優禮遇江陵新鄭負交期

聞公
論及

歸從域外牀前拜已

是冬寒臥病時

幾輩湘賢佐中興天教一老繼胡曾清門嘉耦緣誰合

白璧微瑕論漫憑若谷虛懷歸磊落立朝大節見峻嶒

武鄉盡瘁酬臣志世說如何比信陵

與子同登元禮門自慚蕭艾伍荃蓀尹班永夕相賓主

韓孟忘形等弟昆老友性禾耐尋味書家藝棋溯淵源

夜闌華屋山邱詠譜入清琴有淚痕

君善琴

東坡春夢久銷沈對此茫茫百感深瞑目泉臺裛教育

公歿後有辦理學務尤著勤勞之論揮毫縑簡想胸襟大裘廣廈培材願

白日青天報國心流露精神見真意八賢手札本同岑

湘人藏有八賢手札墨蹟

送樊山方伯之官江寧

詩句驚人海內傳洛中行輩冠時賢歐蘇吏事精豪髮

衛樂清言闡密圓西漢循良秦地始南宗詞賦楚騷先

過江名士多如鯽蘭蕙蕭條絕可憐

大吳巨麗今非昔元氣彫殘待轉旋淮海清流尊泰斗

文章風尚等蹏筌新秋白下應官日舊夢興元艸詔年
親見東南民力竭萬方何處不滄田

論功三輔啟黃圖入奏千言炳紫樞人望禁中留陸贄
天教江左有夷吾吳都續賦煩才筆正始元音黜譎觚
誰與雲龍相上下能詩督部勝游俱

舊籍鈔存署掇英會稽師友數平生陶潛徑裏聯尊酒
李白文中見姓名老輩風流歸闕寂後來新語漸縱橫
越多君子公能說典錄沈吟動遠情

樊山布政屬題所南翁畫蘭

絹海風吹秋盈幅湘艸湘花悽入目靈均以後生斯人
泠泠相赴心一掬龍沈鳳杳不復還蟬蛻穢濁砭懦頑

筆底芬芳通楚畹夢中涕淚望匡山匡山塊肉今存否
香抱枝頭死相守酸魂落魄挂乾坤善畫王孫聞卻走
平泉沙社先後開著身無地同悲哀高譌擊碎竹如意
故人慟哭登西臺靈禽啄粟冬青引謝唐故事人寰震
平視修竹揖霽山幽蘭泣露心心印回首故宮見黍禾
蒲黃之輩何其多三百餘年無寸土畫蘭至此空滂沱
有父詩存清雋集有母書受寶林笈女弟同歸不二門
香艸靈根舉家拾清風郁郁本穴高野人夜夜南向號
吳會游蹤遍僧舍楚些怨思含霜毫翰墨流傳差可喜
不隨故宅歸流水

所南宅在蘇州樂橋東條坊巷

十空造成金字經百

拜重見鐵函史吁嗟乎正氣一譌光日星睟髮一編照

汗青與此畫兮相膠斲披縑千載長芳馨

和宋芸子年丈近作次韻

晚近危言息燭暉蘭陵禮學起中微風流儒雅相師久
獨立蒼茫入世非眉嫵苦招羣女嫉神清例與一官違
杜門各有千秋在白日堂堂忍放歸

早賦蓬山姓氏新晚爲元祐太平人御溝翠色歸纖柳
舊圃瓊柯化爨薪使者采風楂貫斗仙家留語海揚塵
玉堂回首如天上贏得談經奉大春

疆村侍郎屬題歸鶴圖

三年識字未酬恩今日銜書通德門喜爲故人添鶴日
願他終老莫乘軒

相公朝罷懶籌邊
訪鶴閒情絕可憐
羽翮養成親付與
機癡力已勝松禪

雪語堯年不忍聽
秋詞舊事記零星
潛夫一掬傷時淚
浩蕩江湖羨獨醒

題周晦芝報答平生冊

桐花鳳杳鬱清訶
館冷離珠憶語多
不與兩朝人物例
勝他一品顧橫波

儷影甘泉響佩遲
長安全盛復何悲
憐君重展麻姑象
眞見蓬萊水淺時

顰笑妍從彩筆傳
雲藍小袖態依然
郎君才調姬姜壽
活色生香五百年

男蔭泰敬校字

志盦詩稿卷二

王式通 書衡

馬嵬驛

玉顏一死答君恩天寶重譚謝調言誰與馬嵬同恨事

行人憑弔大元村

庚子拳匪之亂趙展如尙書實未附和而名列禍首蘇人請陸文端疏抹

文端曰馬嵬抹楊妃庸有濟邪大元村爲尙書故里

樊山以戲亞蘧詩索和次韻奉酬

漆絲可鑑影形知四坐憐然總受欺方說白頭公道在
未防黃髮冒榮非入懷華色撩紅粉搔首緇塵化素衣
一自離婁察豪末容光從此照希微

談元清祕院花開詞客風流接上台似客拔毛逃墨學

翻教侔色有詩材綠衣早悔公言誤青女新憐顧影來
白髮成虛同白簡搔頭一笑舊烏臺

春絲消息遠霜科見首神龍守黑多爲惜姿年求宋子
祇愁制禮有周婆調言豫作華顛想疑事今知蒜髮訛
待到羅城被恩寵百齡又廿鬢眞皤

櫛沐花間正盛年誤人練影望吳天嫦娥愛少三秋月

學士留青萬選錢鑷鬢幾曾點霜雪兜鍪何苦換貂蟬

用周盤龍事

黑甜鄉與溫柔近衆妙橫陳元又元

鳳毛不假攝生圖仙種何勞乞首烏霧溼雲鬢原有偶
星懸玉李漫長歎佯搔潘鬢經秋感持較蘇髻此日無
兩度蓬瀛顏色好年年綠髮照瓊梳

次和力畚感舊之作兼呈中實

拗蓮作寸已絲絲觸撥前塵付酒卮生與洲人有緣法

夢回吳下號天隨卷菴艸拔心猶在材館編存意可師

謂長沙張文達浩浩江湖何所往微波便託怯通辭

爲仲仁題潘文勤書西苑南書房榻

嚴徐東馬皆塵土南齋故事供談塵漢宮賜錦等俳優

唐殿簪毫致台靴晚近人物誰瑰奇潛齋一老吾所師

替海侍郎頗倔強廿年論學無差池舊游過眼真飄瞥

遺章兩艸何堪說潛齋替海兩先生遺疏皆余代草西掖承平事渺茫

風流文采都銷歇禁中禮數優詞臣坐看虞淵落日沈

一死能先差可喜百憂自昔況於今直廬題榜留瓊楮

萬善殿荒佛無語當年福地居神仙此日空廊雜牧圉
吳縣書歸吳彥藏後生流淚思同光乾清宮樹秋蕭瑟
數點殘鴉戀夕陽

袁珏生同年
曾作是圖

爲徐印士題圖

城郭人民兩別離舊游寥落不勝悲使君重泛溪行權
祇有梅花似昔時

自書削籍舊中堂追諡文恭國已亡遺墨淋漓生氣在
披圖流涕話同光

甲子編題歲月新分應隨遇作遺民故鄉巖壑眞如畫

余先世自嶧
縣遷山陰

輕換東華十丈塵

題張滄海愁思集

哀窈思賢意黯然郎君才語致纏綿似從展簞生悲日
重話抽簪助學年修竹天寒餘翠袖稠桑路遠渺黃泉
舊時月色梅花偶可有羅浮入夢緣

題適齋詩存

悵望修門遇已遲不堪風雅亦陵夷記從都會清嘉日
看到河山破碎時易代圭年長作客思鄉祭酒老填詞
二邱並重今猶昔高會中吳故事遺

我媿僑吳集未成壯君出塞挾秋聲窮途作宦眞疣贅
亂世論交見性情下瀝田耕陶靖節通天臺表沈初明
夢魂同在堯峯麓頭白孤兒涕淚橫

集中有堯峯省墓詩先君子墓亦在焉

爲楊冠如題圖

雪語堯年聽亦哀橫流尼歎力難回逍遙祇覺前賢達
曾向天池悟道來

眞靈位業本尋常兜率仙居亦渺茫惟有至情長不滅
鶴歸忍見海生桑

贈成澹菴

參軍俊逸厭譚兵蚤見僑吳集裏名坐上趙侯鴻寶氣
書中張聖太湖精平居禪宇忘塵劫亂世詩壇變雅聲
易義吾家言可狀峩峩清遠一儒生

題竹山澹菴圖

思誤邢祭酒博覽鄺大使吾生菰蘆中尙友兩北士吳

下初識君茲意頗相似把臂疑故交清言析元理詎知
譚笑間卽爲憂患始魁桀迭廢興士夫苦轉徙五季古
猶賢萬劫今未已旁皇七載中瞻烏靡所止更痛素心
人施沈難再起亡友施星衢沈友卿皆與君同節幕去歲復遇君話舊差
可喜多難悔身存知名久引恥相對胡惘然胸有千秋

史卜居在寒林煮字憑故紙河山舉目非益信吾土美
落落羊求蹤遙遙張邴儼江湖號散人東皋成一子尺

幅寄萬懷披圖忘彼此君戀烏拉城我憶胥江水澹堪
與緣督分蘇寓齊名同作陶廬視未能除愛根宿桑累如是

黃陂馮氏姊弟索詩

梯園盛文讌雅集紛簪笏雙玉台爲珥人坐與親俱髻

齡習榜書姊弟爲親娛奮筆仿磨崖老宿驚弗如近師
清道人遠契包安吳我不知書法喜聞人論書无競哀
六朝深斥鬼窟趨更生廣雙楫頗受石工愚訪碑與藏
帖茲事日分途姿媚與詭險相謗意迴殊調停蘄通驛
融會憑操觚能合南北宗罔象得元珠兩童方孟晉恢
恢力有餘以此勗光彩質直何敢諛

題秦會之書楞嚴經偈句殘卷爲鄒盦作

我憶微言郭養知北盟功罪至今疑海虞竟援龜山例
磨石文除宋太師

星宮奴僕陷難憑司命官家寵不勝一德君臣同薦福
心經石刻重思陵

品題斷簡與殘碑京洛文人總好奇七百年前天水碧

毘陵墨蹟阜昌詩

周養菴游蘇門百泉拓得劉豫守郡時詩刻

為沈盒侍郎題上元夜飲圖

相親已是亂離年孤負春宵月影圓幾輩貞元朝士在

劫灰和淚認甘泉

正月十二夜兵火燬東安門

夢華過眼了無痕水部鐙繁夾道喧

庚子前上元夜工部張鐙最盛蘊

藉曹郎今白首應憐憔悴到王孫

故事吳中父老知春疇譜入柳梢詞

見宋牧仲迎鑿三紀後黃子壽師會

於元夜書詞於屏風以志盛典

神功聖德三千牘忍誦遺山守歲詩

翁文恭生日師鄭招入瓶社感舊哀時愴然成詠

冥論廬陵語似偏南人宋室相無緣未回鸚鵡天家夢

已見牛羊日麻編削籍生前書柏墓易名地下痛桑田
年年避壽游蕭寺此意能知賴後賢

題易一厂廣州詩冊

伏闕當年賈董羣晚餘詞賦託荃蓀名題海湧三生想
體變匡廬四域魂無礙辯才禪可喻不依古法戰同論
宛陵詩入蠻姬手織遍弓衣有黛痕

許靜仁屬題朱文公墨蹟

取法平原爭坐帖賜書教授別畦町

賜書帖行書十行
教授帖行艸十七

行 敲傾狂怪評黃米獨重君謨有典型

用文公
論書語

西山筆勢鶴山同蒼鬱湛深讓晦翁道學名高書法掩
漫云迅疾似荆公

題章履平

鴻賓

衝冠怒傳奇殘稿

別譜吳宮惜苧蘿
聲名受累奈愁何
滄桑豔與衝冠怒
都爲紅顏曲筆多

七字誅心舊史官
千金求削一詩難
遺聞采入橫雲稿
試向延陵傳裏看

鸞影商山迹已陳
鼓詞聽唱語猶新
平西反覆無今古
獨少逃禪解事人

老溲風流想見之
梁溪詞客自哀時
重過丁卯橋邊路
袖得殘編付與誰

呂肖以作者是編
索題未幾逝世

題西陂尙書遺象

拜賜雕翎豔綺年
白頭開府富詩篇
靈巖雅事差能繼

寶華流風絕可憐

篋輿佳日恣山游玉墜流蘇抵八騶信有神仙兼仕宦
家家團扇畫圖留

張鹿經綸勝宋王齊名取況到黃揚朱顏南北同霜鬢
雋語流傳政事堂

鹿文端在樞垣張文襄自武昌壽以聯語云朱顏南北同霜鬢玉宇高寒

有晚香

著作淵源略可尋畫師為狀侍蘇心西皮合與東皮例

雅謔文和玩世深

賀縣于文和在京師大學堂嘗戲書東坡為東皮西陂為西皮語人曰如

教育普及恐坡陂皮三字皆不必分可益以南皮矣

畫象中吳祀事虔滄浪終古屬名賢生辰同肅縣津拜

舊夢依稀過卅年

黃子壽師官蘇藩曾集文士在滄浪亭為商邱作生日

樂春園畝久荒邱應社人才少賈侯猶有後昆珍舊德
貂蟬他日出兜鍪

題漁洋山人手批鈴山詩選爲黃生作

掩文無術弇州憾東溼微嫌卧子譏偶露一鱗饒遠致
論詩匏墨忍相遺

願生良輔甲科登未免焚香負秦陵秀句獨增臺閣重
桂洲應制媿同稱

李何交譽漸知名蔡澤輕肥念不榮晚歲自知詩格降
問年記否謝唐生

投詩萬里索知音一樣新城愛好心貽誤甘泉輕作序
禮家未許特豚歆

曩議甘泉從祀
據全集序主駁

餞客慈仁落木悲渭城復唱有清辭買詩便是臨觴地
能恕中書不汝疵

拜賜恩同異佞賢兩朝掌故藉詩傳金鑾密記詳名物
廣雅堂存十五篇

枯骨收憑一尹仁江陵書語劇酸辛遺編版本珍嘉靖
付與銷魂絕代人

憐才池北審瑜瑕書庫流傳閱幾家奇麗誰評鳴劍集
越人自愛沈青霞

漁洋兩跋抵雙琚好事文人後可如蕭寺精刊圓海曲

高齋新得化涓書

此董授經譚
篆卿近事

詩名十載動幽燕並世朱顏兩少年似學東堂耐清寂

閉門冰雪憶逋仙

男蔭泰敬校字

志盒詩稿卷三

王式通 書衡

師鄭以名賢生日詩屬題意有所感雜成六絕句
始屈終翁寄意深虞山史筆表同岑可知杜宇餘生淚
便是靈均九死心

身後嘉名典錄光

越祠典錄堂近增李悉伯先生神位

生前歸夢在湖塘

臘筵待作陳書拜日記新刊越縵堂

時印日記甫成

樹人苦為百年謀亂世羣才遍九州歲歲清和瞻畫象

辨香私奉嶽雲樓

嶽雲別業歲祀長沙張文達樓榜為鄭叔進丈所書

北門罷鎮晚開軒親酌坡仙酒一樽

庚戌端忠敏在舊京作東坡生日

日西園賓客散誰從蜀道賦招魂

數載新鬢對玉繩蕭然一榻似枯僧自從再世知初度
聞人譚于文香火因緣記昔曾

便作移家鄭子真百千萬劫未銷塵故人含笑陳芳國
實甫坐看吾曹歎不辰

和陶廬宗丈七十自壽原韻

家世梅羹自樂飢嘉名王玉勝韓絲夢懷人鑑求三篋
時方蒐刻張銛挫神鋒感五錐已慶巢居阿閣鳳不知
文襄全集肉食闕城鴟道兼孔墨容來學取瑟何煩示孺悲

健過蘇齋應壽倍聰如獻縣固名齊史修金匱隨螭首
地歷崑墟測駿蹏書帶秀延通德艸詩篇美比翰林齋
詞科儻踵承平事老筆能吟舞鏡雞

獨倚

獨倚危欄對夕暉鄉心已逐雁南飛
築亭竟乏三休計讀史難言五季非
材薄驚看荷作柱時移流涕柳成圍
夜闌手定籌邊策白羽當年見一揮

丁叔雅挽詩

四海彌天語不顛斜簪散幘望翛然
謨觴入室留珍帙波匿觀河逝盛年
聖解有時窮碧落綺詞無意近紅禪
異同自序江都恨取與潮州合一編

河間觀奕徒虛語碁局今真著散人齊
物早忘修短數離家祇覺友朋親龍吟
子夜歸滄海

著古琴名
滄海龍吟

鵬賦長

沙問大鈞成佛生天知不妄飾巾了了去來因

臨歿神
志湛然

哭孫仲璣

賢傳思湖墅嘉名補賜碑長公能趾美季子亦肩隨文
采清門擅莊嚴老輩遺風同庚子拜年異甲辰雌洛下
稱才藪開元憶盛時芳華蘭省表蘊藉水曹詩羣彥歸
書局斯人信我師公羊勤發墨顏氏笑論癡器審徐天
學心通顧日知一官牛馬走

遷郵傳部
以此自慨

八法鳳鸞姿倉

葛呼中夜梁鴻作五噫去聞關吏柝愁看玉京碁北斗
江湖遠東錢雪月奇桃花生聖解芥子納須彌面未觀
河皺情還在水移緇塵尋夙昔白業證修持偶失方相
慰神傷竟不支母虛東野報兄爲頽濱悲沫聚糞黏想
芝焚蕙歎辭夢中元伯語別後紫芝眉新論宗烹小

說治

縣

殘編封掘敬

文憲公有掘敬集

生高賓石壁歿配季真祠孫

楚流空枕韓康藥枉醫

力畬繼逝

舊游零落盡涕隕露車尼

題郭鷗史女士

葆蕙

二喬觀書圖

二女流離得壻歡
猗兒語足傲曹瞞
差強畫稟年難紀
拔腕猶書漢建安

教戰郎家是祖風
美人虹氣燭娃宮
小姑亦有弓刀侍
拜母歸來把卷同

談兵閨閣自嵯峨
文學華昭未足多
說與吳儂魂太薄

阿兄才氣壓頻伽

謂蟄雲詩語

金鹿同哀亦廿年
繡雲山渺玉油箋
華陽士女勞相問

吳寺秋陰禮畫禪

亡女蔭瑞字華陽岳氏未行歿

莊思緘同年屬題艤舟亭圖

進御丹青奏對辭宋臣蘇軾有亭遺南華九老曾游釣
及見純皇極盛時

黃竹訶聲託主文履霜戒漸賦同雲

洪北江館課雪賦有願訶黃竹語為

掌院所筆抹

北江風骨峻嶒甚低首琴臺又見君

劉蘇友沈友張友

屠敬宿

艸秋毘陵驛路感前游自憐湛

輩聲名賤輸與東坡一艤舟

玉秀山房題壁

兒子蔭泰築室西郊冠雲山之巔以娛老人因題曰玉秀山房有亭

曰懷蘇蓋蘇之堯峯先塋在焉

先澤長流越紐馨清風世世衍金庭笑將萬壑千巖勝

來換西山一角青

趙次珊館長重葺舫齋用朱荖堂韻自述屬和

溫公心學在潛虛體辨尊卑誼不疏竟見三綱摧固論
可知五厄到隋書獨登灞岸吟無象相食淮南識有魚
天爲魁儒留福地永嘉猶喜正音餘

澗瀝卜世望徒奢賸作東京錄夢華雪語堯年真訝鶴
日寒唐苑尙餘鴉論詩秋谷箴貽上折簡梁汾掾漢槎

總集文是居萊賢母教青燈一盞可傳家

見羅田周伯晉太史錫恩奉夫容室

九百虞初盡外魔學張三世見聞多建安荀紀尊炎德
長水劉書息辨波老以崢嶸支歲月間將儵忽看山河
重譚白髮籌邊事博到詩人六詠窩

用後村事

題馬佳夢蓮先生夢迹圖

佛家說六如如夢汜如電塵緣過去空真性定中見先
生匪逃禪上士早充選傳經通德門讀書招提院元菟
侍東征賀蘭恣西眺能詠乞鶴詩亦試射雕箭滄溟萬
里看山水四時眷勝游偕閨禡治行在畿甸太甲五雲
開上丁兩楹奠眾春魏國留喜雨廬陵譔妙蓮有宿因
歧麥致羣怵忠孝心可窺承平事堪羨十七幀珍藏九
萬箋題遍名父教長垂賢子交最善講舍欣綏同流光
慨轂轉重尋春夢痕都皴恆河面幸艸野未燒生桑海
真變獨居憂患殷手澤涕淚戀南皮作碑文桐城序詩
卷定州遺愛存世胄清風衍位業歸真靈畫象瞻炳綯

有相皆能離披圖夜驚眩

郭仁宏爲陽明製硯今歸蟄園名以青琅玕示客

徵題

世間寶物不輕見石田莘田傳十硯蟄園精鑿羅琳腴
綠端蟬腹高齋弁文山地接東西昌二百年後生清狂
大璫大藩不能致畫師晚侍姚江王子畏悔寫素瓊象
惟乾受講西銘枉讓與庚辰琢玉膚香荷葉擎仙人掌
去秋順德銷寒煙九華疑有從游緣降龍伏虎俱易肖
綠肪難得丹心鑄道人不慕特豚祀自有嘉名在譜史
八分結體殊莊嚴六法參禪皆歡喜雕鑿石髓見身雲
神通突過平濠勳能狀真實阿羅漢何知威武大將軍

文成履款遍天下此硯績刻都道雅異代仲呂傳二孃

同里玉川宗馬夏我思舊事醉頭陀深綠光字供摩挲

文恭文勤同贊歎中遭嘉定殿辭訶止軒宗丈自號醉

綠光硯手拓分韻廖嘉定目為玩物喪志往日貞元似轉轂摩由邏羽重寓

目得入書屏賜硯家差免孔子征西辱歛蒼洮碧相迴

環贈君偶語開心顏事辦黑頭姜白石妝添翠袖郭青

山

題徐晴圃中丞從軍圖

純廟武功號十全遺憾稽平陝楚川上賓執手虛末命

西南頻望哀填顛嗣聖繼志懲玩寇世臣奉詔征誅專

行軍司馬智且勇書生愛誦平淮篇前有甌北後龍壁

樞曹磨盾同騰騫從戎墨經度關隴策騎桃瓢躬控弦
以少勝多洵奇績勒銘姓氏南山鑄九地攻心弭反側
五雲迴首如神仙兵力苦爲地險限捷書未忍披甘泉
奏至有那彥成等辛苦萬狀不忍披覽之論召還使節平臺對口陳利鈍猶

河懸劫數一語有深意要憑修省銷戈鋌頭白詩貽舊
參從卅載往迹成雲煙元老戎旃屢起仆中丞締袞長

縣延憶昔薇垣窺篋策近自嘉道追雍乾前輩題名輒

仰止名人行卷曾流連

海鹽朱侍讀彭壽藏
有中丞鄉試朱卷

鼎門寶績

失復得爲譚佛法參因緣北江舊廬塵夢遠西園雅集
雲章聯晚見斯圖雜悲熹神州元氣誰回旋微管庸能
免左袵生晟此中殆有天先河後海差可例俛仰詒謀

百廿年

吳子修提學挽詩

歷歷光宣世蕉廊所見真孤懷容政地多諷託詩人已
歎家居壤猶聞黨論新瞻烏誰屋止萬象入哀呻

軼事吾能說行朝奏對辭

庚子自蜀至西安召見詢魚蠻子可信否公力陳其妄

渝賓知滿概井絡洞安危用晚才空老身歸國未移悔

餘編閩集吟緒異花宜

世亂恆祈死熙豐一夢過贈言念虛受

見虛受堂詩存

鳴盛讓

頻羅蘭芷餘馨在荃蓀寄意多孤寒齊下淚六詔與三
峩

共道天方醉相逢日易曛西行悲仲舉東渡見宣文未

采蓬山藥重思玉壘雲朝廷終不改志行表靈芬

錢幹臣同年挽詩

碎佛遺塵繼敬彊歲星隕又罷端陽思通神鬼朝周澗
名美公卿衍魏塘幕府文章邊計重慈闈心力法家昌
劇憐纜建關中節坐痛虞淵黯日光

堂餐院茗地頻移此局朝朝似舉棊句曲通明眞作相
華山若水早逢師板輿色養娛爲善麗服靈芬戲寄辭
終始秀才憂樂意獨憑儒效起瘡痍

一掬昭陵淚未乾從親地下願今完哀銜隔歲終依墓
論定斯人已蓋棺白傅宮歸詩語壯黃公壚邈酒痕殘
形神濁世誠何戀華屋山邱久等看

舊侶雲司已日稀海王講舍迹全非亂離相視翻溫噤
出處難言苦鏡機自謝學仙無鄴骨同悲失母絕萊衣
翰公十二年如約夢奏鈞天帝所依

贈沈呂生

寶月嬋娟麗句存杏花宮體儷西崑清言林藪新詩社
歸夢湖塘舊酒尊波匿恆河參白業道生蓬戶視朱門
羅裙擁楫人長伴柳下桐間賦小園

題忍堪居士禮塔園圖用天琴翁韻

聽慣寒山夜半鐘出門西笑媿塵容黃金世界秋花盡

用萬松龍山迎駕詩歸種堯峰幾寸松

結菴何地養禪心未許從容綺陌深祇有牟尼珠籜似舊

吟風弄月一天琴

歲歲花時議食單
小樓對塔客憑欄
雨飛護世城中膳
難作油鹽嚼菜看

寂寞城西好事車
松鄰書在酒尊虛
猶餘蜀客輕丹轂
獨艸元經意泊如

男 蔭 泰 敬 校 字

志盦詩稿卷四

王式通 書衡

伯玉屬題其尊人幾道先生江亭餞別圖憶卅年

舊事愴然書此

六藝淵源有本師方言旁究寶書奇棟梁榱桷誰收拾

教法湖州是首基

丙申丁酉間初設通藝學堂公為紳定規程此京師興學之始

使者朝天奏對還微辭似惜枉移山蓬萊采藥纔申約

倉卒登車涕淚潛

戊戌八月公偕余與張菊生夏棣三陶杏南詣日本使館訪伊藤博文商

留學事值其觀見方旋辭意感歎此歸校得公留箋云君宜自重願此後絕口不言時事又有瞻望國門潛焉

出涕之語蓋公出使館後知政變即行

揀金累歲苦披沙撼樹蚍蜉妄指瑕自寫寸心明得失

篋中書在付侯芭

壬寅春長沙張文達延公辦譯書局後有議之者因作書詳言譯事近此

書歸侯
疑始

九重同日拜經神吉語蟬嫣墨尙新今歲邇英空殿冷

柳枝何地折初春

辛亥七月十八日先嚴七十稱觴公贈詩有云端合擘箋書大慶九重

同日拜經神自注
毓慶宮本日上學

書法南宗骨采騰貴人不與與枯僧虎皮羊質歸平等

留鎮招提有慧能

癸丑四月釋迦生日法源寺曉鐘上人乞余爲文公書作長卷

踞火徘徊禮上賓叔皮王命論齷齪高名被賺堪濃笑

終有仁言贈故人

公與項城雅故稱制議起託疾杜門及事敗爲策安全語至誠摯

信達難時雅更難譯家深刻類申韓叢殘稟檢名詞館

諷籀心知字字安

公論翻譯以信達雅三字教人又云似申韓家言己未冬曾見名詞館舊

本中西文
皆公親筆

瘡野堂扃杖履虛陽崎歸隱渺愁予飛來尺素傷鉤黨

此是劉侯最後書

庚申冬得公自閩
論書未通問

亂世餘生爨下哀雞年應夢泣瓊瑰平生誤學屠龍技

誰為神州惜此才

公以辛酉九月歿於里第余挽之云
疇使其樵悴憂傷而死是能讀墳典

索邱之才

主客圖中半杳冥小斜川亦獨清醒愁心莫語江亭柳

見慣離人歲歲青

題劉策筠刺史

鳳紀

籥雲仙館遺集

關河行役感勞生骨月纏緜見性情孤鎮論兵雄北府
千金市策重西京華林賦馬才無敵桂海驂鸞政有聲

詩與義熙同歲盡免書甲子勝淵明

紹越千太保挽詩

廿載同聲雅論交太學初曹郎稱蘊藉餘子愧權譎官
貴躬方蹇時移迹未疏嶽雲樓設祭歲歲擷園蔬
失母相先後梅容慰倚廬皋魚哀靜止司馬著潛虛泣
受三公秩躬行五子書謬臺何可避微語輒欬歔

慘澹青楊第飄零白柰花陳兵徵國璽下殿走宮車道
已喪諸夏憂寧止一家紘千山凍雀伏枕望天涯

有子瑤林秀諸孫玉筍森守書思祖德祈死見臣心佳
傳名無忝行朝痛益深故人奇節重偷活悔沈吟

乙丑中秋北海漪瀾堂雅集分韻得飛字

朝坐山房攬翠微
晚吟瓊島彩毫飛
凌雲詞客才何有
喚月靈妃事已非
琴語魚游皆出聽
禪心漚起早忘機
玉階依舊清輝滿
不見仙人紫鳳衣

題錢竹汀畫象

贈日本內田南湖時年六十

詞館論才比華嵩
著書白首可廬同
幾曾家學私塘玷
遠壽聲聞到海東

和石笥山房落花詩

彩筆知難再畫蛾
門前驪唱又離歌
武皇海上求方藥
楚客江鄉帶荔蘿
絕代誰憐顏色好
異香合受折磨多
靈和縱使春還在其奈
修眉眾嫉何
罡風一夕起明光
曾見春陰覆海棠
弱質難禁蘭燄盛

離情獨縮柳絲長全空色相心無礙便辱泥塗骨亦香
此後曲中彈變徵休將胡語怨王嬙

墮鳥遺簪日欲斜杏松東望已無家瑤膏零落辭仙蝶
碧樹迷離宿暮鴉水面文章餘散綺陌頭蹏鐵帶殘葩
長生儻借雞皮術妙訣應須問萼華

陵雨酸風院落沈茵籬重被曉寒侵枝無餘蕊還尋斧
爨盡焦桐豈作琴賸馥爭思舐丹鼎孤英寧復贖黃金
名園他日求奇種莫說蜂房醞釀深

齊照巖屬題文衡山天梯石棧圖用半園韻

中吳文畫稱一絕玉磬玉蘭訪故宅舊藏殘楮如圭璋
乍觀奇品驚失色蜀山峻險不可登吞聲杜老江頭春

何如守此特健藥卧游夢見金門人

題說劍樓藏劍拓本用坡鄰前輩韻

屬鏤賜後窅不自古今無數宏血碧把劍何處弔徐君
且覽器銘樓百尺款識載入積古齋珍伴十卷錄金石
呂莊眷屬同一家付與延陵永世澤王朱題詠孫藏斯
歸嘉樂堂會傳疑雲煙過眼竊自熹更讀中郎皇女碑

近日
所見

石鐘居士屬題元獨孤長老贈松雪硯

有松雪
題紀

蘭亭定武本家刻縣千祀一鐙分眾鐙光明照遐邇十
三跋不窮神往趙承旨獨孤與東屏相較見臧否贈硯
慰北行情契證題紀流傳文項儔因緣結如是鹿原攜

自吳故主爲湯氏多事付大家改作憑纖指久藏樸學
齋罄海頻遷徙寶物歸征南仍未出鄉里庚辰汜丙寅
過眼皆青史獨有至人心超然空塵滓片石懷古歡鷗
波呼不起

題徐筆珊先生

思穆

九九消寒圖

窮陰沍天地一陽生於中君子不遠復知至以知終落
落古壘洗九英各玲瓏先春洩化理守靜葆淵衷梁苑
雪方霽金隄底新功想見含豪人官燭映酒紅幽尙過
雲煙明德啟雷風清芬流協氣萬彙爲昭融披圖試吹
律其應賡屢豐寶之水竹邨夜夜月貫虹

題水竹邨人臨王廉州山水卷子

平視司農揖奉常會心湘碧寫江鄉
婁東董巨遺型在
語妙蘭陵法後王

墨戲清暉譽一龍染香開繼是中峯
淋漓靜遠堂前筆
南北天教合兩宗

巖壑蒼茫萬象收不將疏秀盡廉州
畫家舊以疏秀稱廉州
馬家

一角真寒儉剩水殘山畫未休

臥憶蒙泉百道飛林巒皴點總依稀
白雲持贈山中有
雨遍人間莫便歸

梁苑消寒九九圖早從祖硯得驪珠
沈雄斂盡歸深厚
論畫楞伽入漸無
楞伽經言如學書畫漸成非頓

履畫時人侈宋元墨緣偏結鳳洲孫
水村煙景圖誰屬

廉州有仿摩詰
水村煙景圖

侔色應歸水竹邨

單太夫人桂陰課讀圖東筮屬題

一花一葉總清妍
夜讀歐陽信有緣
鵬翼扶搖九萬里
蝸廬徒倚十三年

暮暮朝朝心力磨
慰情餘事豔登科
故園東匯枝頭月
照見萱闈涕淚多

城郭東頭塔寺西
梵鐘聲與讀聲齊
鮑昭有妹生嬌小
慧悟禪機到木犀

飯顆躬炊樂素貧
竈觚踞聽瘁昏
晨分明女校真師範
寄語寒闈勸學人

女學東京奉大師
下田歌子盡人知
成才北宋歐蘇母

不擯登臺演說奇

中興盛業曾胡左絕代高才蔣趙洪學問勳名根本地
衡量教法畫圖中

慈竹檀欒耐冷姿秋花皎潔擷高枝承歡母氏開顏日
恰近科名殿尾時

茹飲光陰老檠冰廣寒仙種共秋澍詩書食報看鯤化
紀錄題名繼鶴徵

君曾膺經濟
特科之薦

錦衣金粟映清尊早飲香名齊女門再拜新邀親一笑
加餐雋母問平反

范蠡遺書學未沈衛文興國古猶今敢教封鮓勞慈訓
長抱脂膏不潤心

君先官刑部
後官商部

悽悽鐙影入心脾
緩緩雲飛繫夢思
教得佳兒識忠孝
含飴又是弄孫時

才子宏詞誦有年
高堂苦節筆能傳
阿蒙廿載居吳下
一起秋風便黯然

白塔無言卜巷居
式通十歲侍兩親居蘇州東白塔子巷湯氏故宅
青鐙有味

愛吾廬當時亦具為
滂志靜對瑤林受范書
幼受書親舍庭有

桂樹

南望湘江祝貞壽
善化黃筍腴侍御以母教成名徵詩介壽
東瞻吳會誦清

嘉綵毫還後嗟才盡
寫到春暉筆有花

題穎人儉荒集

山水因緣與友師
老來日作二邱思
遂昌手定僑吳集

懷古輸君有好詩余與亡友吳松鄰皆以浙人居吳松鄰恆謂蘇杭懷古詩最難著筆昔人皆無佳製余避其言相戒不作今稀園居士偶游蘇州徧詠古跡迺知事患不爲畏難則百無成就詩其小者爲陳潤菴題子鶴尙書遺翰

邊城碧血壯山河報答君恩在荷戈耳熟籲天兒有錄

紀聞得自外家多

式通外家爲會稽施氏與公有連

長信鐘聲卅載闌牛羊日麻久銷殘陶堂湘綺詩爭誦
故老能言勝史官

三十一
三十一
才
久
四

十一

男
蔭
泰
敬
校
字

三十一

志盦詩稿卷五

王式通 書衡

為盧慎之題慎始基齋校書圖

新語三盧是定評君家校勘學崢嶸古書晚出今何限
此事前賢畏後生

能藏能讀兼能校海內傾心兩木齋德化丹黃門下錄

汙陽鉛槧弟兄偕

祕笈楊

惺吾

陳

士可

典索賅題圖周

沈觀

左

竹勿

翰林才藏書紀

事詩如續應為鄉人賦八哀

通藝堂開盛俊厨疇人術愛復州盧

光緒戊戌在京師通藝學堂初識木

齋晚同哲弟論丁顧失笑今吾異故吾

卽園清話渺雲煙伯宛遺文雪涕編余近以松鄰集付梓地下故人應有語恥居王後媿盧前

百城坐擁策奇勲對壘藏園張一軍豈有講堂成馬肆
鼓鼙聲裏校書勤

樊山以都門離席詩索和依韻奉答

飢驅二妙發征車不是南歸賦遂初汐社潮音有消長
月泉秋士漸蕭疏酒痕郇國留賓饌詩事香山履道居
儻憶長安真樂處願君西笑漫踟躕

斜簪散髻日吟哦萬首詩逾務觀多玉局猶輸雙鬢色
對山長聽百年歌微聞野老嗟金盃不省村民起土鍋
主客圖中佳子弟傳家風雅似融何

樊山贈詩譽及兩世疊韻志謝

世講奇緣侍福車阿戎想望共言初
卿原慙長相嘲久佳不關人此意疏
槐國衣冠堪失笑華嚴樓閣豈能居
舊時陶令存英物謂治公雅拜階前走弗躅

經韻籤排次第哦史家鏡古異同多
國亡消息秦三戶客怨沈吟楚九歌
宰相孫曾工玉笛尙書姓氏漉沙鍋
說詩便是安禪法稽首雲門奈晚何

雜書近事再疊前韻寫塵樊山

不樂誰言坐少車思城壇坫盛如初
平反東澗稱詩穢

方望溪謂糾正梅村紀事疏吳詩多與華漢雙星猶昨

夜高齋十士似仙居擊鉢兩題一為八夕丁髯為訪梨

錢詩骨穢
一為宮僚雅集杯

渦去一見應蠲搔首踏

軟舞瓊枝佐飲哦囊傾餓隸強歡多鼓詞冬樹藏園譜

鐙謎春花圓海歌空谷天寒憐翠袖有言及亡友某姬者當樓月

夜饗銀鍋人間枯苑真懸絕一醉相忘問范何

題阮性白所著李北海書思訓碑諸本真偽互勘

記以羅原覺趙聲伯端忠敏楊惺吾四家藏本與蘇厚如新獲本互勘

大照師碑海上看牡丹詩並出金鑾北海大照禪師碑牡丹詩皆禁中藏

帖沈寐叟在滬得之雲麾又見蘇家本同是佳人再得難

多熱勝和帖不存世無法善孰追魂慰情賴有橋陵石

宋拓藏家取並論

臨摹斷是趙王孫一卷爰書眾證繁新聽橋西居士語

蒲碑冤獄要平反句圍所言

和散釋雨窗原韻

一代閩詩選夢雷叢殘送入讀書堆不愁虛室無長物
祇望神州有霸才游屐秋經黃葉路梵香宵盡白檀灰
糟邱讓與君家老聚麩功成便築臺用太白詩意

再和中秋原韻

樓宇高寒萬象收問誰水調譜歌頭石湖嬉戲思柔浪
吳中有石湖串月之俗春月歡娛勝素秋親在事從佳節憶客來
譚輒異書求蕭然一室耽清寂可是人間許散愁

世傳香妃並無其人作此正之仍用前韻

采筦輕將野語收娟娟寶月照層樓流傳屢畫椒風影

鬢歸魂柳樹秋

柳樹泉同人呼為哈喇插起譯言靈泉也

百輩才人辭太

費十全信史事難求松鄰題象詩沿誤削稟長銷地下

愁

松鄰稟內有題故回部巴圖汗可敦象一詩錢孫謂失實應刪

夏閨盒賦廣和居感舊詩七首為補一絕

食單品格比新城三世能知有定評今日舊京艱粥飯

霞川枉重酒家名

李越縵先生精飲饌曾見其與鄉人短札謂廣和居菜如漁洋詩非北人

格

郭匏廬年丈挽詩

衰世輕儒術誰能洞本原百年家學遠三疏禮官尊七

國誠私痛酬恩亦小言固知忠愛意惻惻在黎元

見公書讀

鈔本杜詩後

苦趣橫身語梨洲祇自憐

見公亥既集自序

呻吟聞老去芳悱

出天然索解明堂體題辭困學編

均見本集

詩家有元氣不

待鄭君箋

講舍交賢子

在光緒戊戌

重思拜紀年愁尋銅輦夢閒結月

泉緣身老詩皆史憂深逝即仙玉陽心不死功德贖三千

汪伯唐姻丈挽詩

厄閏摧邦獻曾看入洛初弟昆悲憫似

公與穰卿丈語輒憂時翁

壻潤清譽

公為沈寄篸師之壻

綦定官方進槎回國已除九原有

遺恨毒卉未全鋤

公使英時倡禁煙之議

行在警邊事遼東恣予求要盟羅刹亟失地伏波憂孤

憤排羣議虛聲識狡謀納言籌表餌終不棄維州

公力主拒

簽俄約卒從其議

世盡強秦畏縱橫測大瀛笑譚持義戰勝負決佳兵拒

虎謀能定連雞勢竟成澶淵孤注擲往事莫相衡

公首主參

戰

淵默雷聲喻微公世孰歸六安作高卧五際鏡先機枯

寂生如寄艱危眾所依慈悲明究竟

沈休文有究竟慈悲論

禪榻

客來稀

振綺存書目清時萬卷收家聲毛范匹績事董文傳經

寫樗寮本詩懷鐵畫樓雲煙都過眼无礙梵天修

風雪方僵臥書來一欠伸商量扶醉法愛惜不費身朝

讌先馳簡宵牀已飾巾眾生昏未覺作佛度迷津
勸學忘家計窮思至蓋棺斘金遺子少畫象狀心難校
厄身同盡人存責敢寬世風猶不薄八百泣孤寒
通藝初興學頻來語國聞早傳經世略晚定放生文林
激情相契天人迹頓分飲冰今繼逝同籥吉祥雲

和沅叔同年新春書懷原韻

綵勝銀幡象一新鷗波亭館已饒春家逢歲首開清讌
詩抱冰心淨點塵中祕書歸滂憲錄校讎義待實齋伸
門牆著籍多閨彥不羨梅如作部民

題唐塲美人

瓊璧昆吾異境開遺妍誰與拾娥臺女媧搏土留真面

鏡鑿心靈見別才

此是人間墨牡丹
纖腰莫當媚豬看
欠伸百態春嬌足
周昉圖中設色難

右慵妝

爲誰消渴可憐生
舜具鞋痕刻畫精
若使隔麻存淡拓
幌從帳底遇潛英

李唐舊俗在天涯
錦帶腰肢學點茶
真個墨華呼欲出
樵青風格勝東娃

右煎茶

萬歲魚專闕妙姬
烹鮮辛苦補芳姿
華鐙徹曙金尊啟

記取仙盤化鯉時

萬歲魚專上端魚
形文曰萬歲不敗

妙手調箏學煮魚
罽紋衣稱入厨
初漑堂鬻釜蕭條甚
斫鱸吳娘恐未如

右烹魚

拓象曾披武定年
買花玉女態嫣然
重看織影親中饋
不向如童受賚錢

供媚幽宮闕遠春
摩挲漢刻有前塵
誤他攷古洪文惠
疏訂槃匱翫麗人

右治具

題靖陶看雲樓覓句圖

昔漁洋門人就愚山問詩法愚山曰漁洋詩如華嚴

樓閣彈指卽見子則不然如作室者瓴甃木石一一從平地築起此論甚允靖陶覓句未知其爲漁洋爲愚山也

篋中書在付侯芭

壬寅春長沙張文達延公辦譯書局後有議之者因作書詳言譯事近此

書歸侯疑始

九重同日拜經神吉語蟬嫣墨尙新今歲邇英空殿冷

柳枝何地折初春

辛亥七月十八日先嚴七十稱觴公贈詩有云端合擘箋書大慶九重

同日拜經神自注毓慶宮本日上學

書法南宗骨采騰貴人不與與枯僧虎皮羊質歸平等

留鎮招提有慧能

癸丑四月釋迦生日法源寺曉鐘上人乞余爲文公書作長卷

踞火徘徊禮上賓叔皮王命論齷齪高名被賺堪濃笑

終有仁言贈故人

公與項城雅故稱制議起託疾杜門及事敗爲策安全語至誠摯

信達難時雅更難譯家深刻類申韓叢殘稟檢名詞館

諷籀心知字字安

公論翻譯以信達雅三字教人又云似申韓家言己未冬曾見名詞館舊

本中西文
皆公親筆

瘡野堂局杖履虛陽崎歸隱渺愁予飛來尺素傷鉤黨

此是劉侯最後書

庚申冬得公自閩
論書嗣未通問

亂世餘生牖下哀雞年應夢泣瓊瑰平生誤學屠龍技

誰為神州惜此才

公以辛酉九月歿於里第余挽之云
疇使其憔悴憂傷而死是能讀墳典

索邱之才

主客圖中半杳冥小斜川亦獨清醒愁心莫語江亭柳

見慣離人歲歲青

題劉策筠刺史

鳳紀

籬雲仙館遺集

關河行役感勞生骨月纏縣見性情孤鎮論兵雄北府
千金市策重西京華林賦馬才無敵桂海驂鸞政有聲

天上巢痕舊夢過關中赤緊起苙歌謝玉持節吳都晚
支許傾襟越紐多夜賦梅花雙管豔朝看菜色一心婆
自言致壽都緣淡理與禪宗較若何

題嘉興譚女士遺象

吾友芝顏有女名其瑜婉嫕明慧眉目如畫翦髻簪鍾秀間

字承歡既耽文史並精錄穎入校受書試輒冠眾勛學病肺絲憊經年熾阿今沈芳齡十五芝顏過我以遺象屬題觀言孝行淚潄潄下余會抱斯戚觸緒增欷傷淑命之不融知老懷之多感金瓠哀辭同聲有作左家嬌態小景長留玉骨生前華髮天上爲綴截句以寫幽馨

疏香閣與小螺盒愛女癡情總勝男終古彩雲容易散
阿翁秋淚漬書蟬

男蔭泰敬校字

志齋詩稿卷六

王式通書衡

哭馬通伯先生

唐松宋畫等閒看蘭若譚禪耐夜寒願制毒龍參貝葉
不隨飢鳳食琅玕鬚眉中歲垂垂老著作平生字字安
一載死遲應有恨及身孔釋見摧殘

桐城耆舊總溫然此是方姚以後賢講舍文論清讌夜
史家運厄火書年長哀碧血曾千語一掩黃腸共九泉
儻遇故人煩慰藉孤兒鍵戶理遺編

次和天琴老人春望詩韻

純熟詩如露地牛舊京景物彩毫收東華酒肆驚桑海

離情獨縮柳絲長全空色相心無礙便辱泥涂骨亦香
此後曲中彈變徵休將胡語怨王嬙

墮鳥遺簪日欲斜杏松東望已無家瑤膏零落辭仙蝶
碧樹迷離宿暮鴉水面文章餘散綺陌頭蹠鐵帶殘葩
長生儻借雞皮術妙訣應須問萼華

陵雨酸風院落沈茵籬重被曉寒侵枝無餘蕊還尋斧
爨盡焦桐豈作琴賸馥爭思舐丹鼎孤英寧復贖黃金
名園他日求奇種莫說蜂房醞釀深

齊照巖屬題文衡山天梯石棧圖用半園韻

中吳文畫稱一絕玉磬玉蘭訪故宅舊藏殘楮如圭璋
乍覩奇品驚失色蜀山峻險不可登吞聲杜老江頭春

何如守此特健藥卧游夢見金門人

題說劍樓藏劍拓本用坡鄰前輩韻

屬鏤賜後窅不自古今無數宏血碧把劍何處弔徐君
且覽器銘樓百尺款識載入積古齋珍伴十卷錄金石
呂莊眷屬同一家付與延陵永世澤王朱題詠孫藏斯
歸嘉樂堂會傳疑雲煙過眼竊自熹更讀中郎皇女碑

近日
所見

石鐘居士屬題元獨孤長老贈松雪硯

有松雪
題紀

蘭亭定武本家刻縣千祀一鐙分眾鐙光明照遐邇十
主跋不窮神往趙承旨獨孤與東屏相較見臧否贈硯
慰北行情契證題紀流傳文項儔因緣結如是鹿原攜

纔信閨中屈節賢
夢葛陂婆情恂
况影梅菴主語
纏綿玉簫儻慰
韋郎意應有西
川再世緣

壽藏園五十晉九

相逢公讌尙承平
世亂交深見性
情笠屐風流映
巖壑丹鉛事業
換公卿學能自
立皆心賞德恐
人知譬耳鳴滂
喜鬱華無此福
書林有子擷菁
英

恭題御書

元和陸文端公感歎疾自服必死重劑遂不起時洪憲方張也與君實迹異心同無慚支裔葉緣督作文端墓志於此不及一字疎矣激如家有御書爲文端所貽應命題詩謹識數語備他日史家之采

講幄曾陳筆諫辭
七齡宸翰鳳鸞姿
後來君實惟祈死
一寸丹心志墓遺

哭嘯蘇

名父堂堂有典型中興軼事語兒聽解從慈母傳琴學

泣拜經師艸墓銘

湘綺撰先德墓銘

龍喜湘中稱七子

龍喜社湘人凡

七鳳鳴鄴下譽雙丁益山舊館清如水伯氏淒涼賦鶴

鴿

叔寶風神濁世稀入都裘馬自輕肥金環側帽看如昨

玉筍當筵事已非老去香燈歸鹿苑望中門巷杳烏衣

君家居金陵烏衣巷

芝焚夜展同名錄

謂茫父

西檐覘星掩少微

虞山識士古韓歐著作才從試院收兩世墨緣留拂水

君受知於翁文恭及笏齋方伯

二分月色黯揚州

君兩失淑偶婦

犀槎

錢客尋詩集

尋詩集皆與朝鮮使臣酬唱之作龍喜社刊

鳳管延秋讀畫樓

君生朝事往事沈沈譚百一阿兄垂淚乞銘幽

蓬萊注籍便如仙風引舟回意惘然樂律心傾姜白石

詞人宮比柳屯田翱翔中禁宣綸地感歎尙書禮士年

君以工曹直樞垣張文達招襄郵傳歲歲與君瞻畫象永甯門館渺雲煙

華林風景似當時霸府徵才一涕洟仰秣今同牛馬阜

簪毫舊在鳳凰池梅花眷屬寒能耐槐國衣冠夢早知

遺橐爲君新點定江東終殿晚唐詩

東西列屋弟昆俱不問人間萬事殊絲竹中年慣陶寫

墳簾晚歲倍歡娛低徊汐社新詩本零落伽藍舊粉圖

君有松筠雅集圖序祕演先歸清淨土吟魂還共一僧無

懺愛蠲癡誓夜分聲銷猶憾有知聞君患失音已驚雞骨支

逾瘦未盡蠶絲吐尙勤

案多殘橐

靈運自酬成佛願令嫺親

製祭夫文沈吟子亦蒼生語天道無知不足云

玉貌圍城每過余

庚子年事

五噫引去問何如瞻烏太息亡

周始洗象同歌入洛初

此識君之始

鄧尉結鄰空有約松陵

合集未成書從今祇祝賢兄健長向湖東慰索居

樊山先生挽詩

一縣花明手自栽輕將華嶽換蓬萊不譚理學憑天趣
爲有詩名掩吏才桑海商量行樂法柘枝顛倒讀書堆
歲星事事都遊戲撼樹蚍蜉莫浪猜

哭子沈瀾又女孫齊眉伴杳痛誰言化爲菴艸遲收骨
賦到梅花便斷魂百八鐘聲中夜寂十三樓客幾人存

生辰別有修門感稽首西來未報恩

息壤盟曾在鏡湖清游每與李陶俱雲門寺主迎居士

樊浦村漁問釣徒少愛牽蘿環翠屋以上俱見越病留

絕筆泣紅圖詩止於此距百年文獻銷沈後賸有才人

殿曼珠

詔書罪己出長安都作興元陸九看幕府論才稱武庫

磨崖刻頌壯文瀾不教野語騰瓜蔓用詔書猶有閒情

詠牡丹卅載略園賓客邈祇留密記在金鑾

題韓斗瞻將軍遺墨

誓鑿凶門出淒涼戀母情將軍原不死遺墨尙如生顧

盼雲霄壯聲名朔漠驚岳家三字獄莫須有舊本視此

恨難平

題無邊華盦圖

棲蘆止灤總從容懺盡旃塗卽淨宗此意在家僧解得
少年多事學屠龍

晚覺清音勝綺詞滄浪妙悟善言詩羚羊香象何從會
祇在蘧廬一宿時

代序珠林偶體文牀頭人自捉刀勤無邊萬善花輝映
禪藻親徵爲細君

題握蘭移裁曲圖

世態彈碁局不平九歌莫再助商聲蘭因合在湘江畔
聽水聽風過一生

廉州有仿摩詰
水村煙景圖

侔色應歸水竹邨

單太夫人桂陰課讀圖東筮屬題

一花一葉總清妍
夜讀歐陽信有緣
鵬翼扶搖九萬里
蝸廬徒倚十三年

暮暮朝朝心力磨
慰情餘事豔登科
故園東匯枝頭月
照見萱闈涕淚多

城郭東頭塔寺西
梵鐘聲與讀聲齊
鮑昭有妹生嬌小
慧悟禪機到木犀

飯顆躬炊樂素貧
竈觚踞聽瘁昏晨
分明女校真師範
寄語寒閨勸學人

女學東京奉大師
下田歌子盡人知
成才北宋歐蘇母

不擅登臺演說奇

中興盛業曾胡左絕代高才蔣趙洪學問動名根本地
衡量教法畫圖中

慈竹植欒耐冷姿秋花皎潔擷高枝承歡母氏開顏日
恰近科名殿尾時

茹飲光陰老檠冰廣寒仙種共秋澂詩書食報看鯤化

紀錄題名繼鶴徵

君曾膺經濟
特科之薦

錦衣金粟映清尊早飲香名齊女門再拜新邀親一笑
加餐雋母問平反

范蠡遺書學未沈衛文興國古猶今敢教封鮓勞慈訓

長抱脂膏不潤心

君先官刑部
後官商部

男蔭泰敬校字

志盦先生博學豐才余晚居舊都始獲親炙嘗同蒐書
錄密邇之日爲多先生熟舊聞善譚吐而於詩文源流
正變尤善剖析而得其滙通偶有舉似必罄懷相告無
所秘惜所謂多聞而直諒者矣旣散處年餘先生遽歸
道山一日李釋龕詣余云先生病革時遺屬以所著詩
藁付君訂定今夏五月哲嗣孟羣偕黃君坦枉過述先
生意如所聞自惟譴陋恐累見屬之明又重違遺言則
謹爲汰存去取不敢云當尤以前後次序未能盡晰爲
歉也嗟乎先生往矣城東諸友或存或沒無復往日之
歡余今者猶得於此遺墨中諷詠往復如接先生語笑
意文字因緣信有如釋家所云夙締者耶惜無繇起先

三言牙夕

十一

男蔭泰敬校字

志龔詩稿卷五

王式通 書衡

為盧慎之題慎始基齋校書圖

新語三廬是定評君家校勘學崢嶸古書晚出今何限
此事前賢畏後生

能藏能讀兼能校海內傾心兩木齋德化丹黃門下錄

沔陽鉛槧弟兄偕

祕笈楊性陳士典索眩題圖周沈左竹翰林才藏書紀

事詩如續應為鄉人賦八哀

通藝堂開盛俊厨疇人術愛復州廬光緒戊戌在京師通藝學堂初識木

齋晚同哲弟論丁願失笑今吾異故吾

先公之遺意也戊寅冬日男蔭泰敬識